

**NATIONAL ASSEMBLY OF
SEYCHELLES**

*Wednesday 28th February
2024*

The Assembly met at 9am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab. Bonzour nou bann zofisyé Lasanble. Bonzour tou piblik ki pe swiv nou. E nou annan 2 viziter dan Galeri. Mr e Mrs Laljee. Nou swet zot la byenveni.

E nou a rebran lo repons lo mesaz lo Leta Lanasyon. E premye pou pran laparol, Onorab Naddy Zialor.

HON NADDY ZIALOR

Mersi Mr Speaker. Mr Speaker, ou ki pe ekout nou lo radyo. Pour bann ki pe swiv nou lo televizyon. Ou ki dan lakour, dan travay, dan prizon, dan lopital, lo bann zil elwanye. Mon bann frer ek ser ki pe viv avek en dezabilite. Sa travayer Seselwa. Ser, frer Lepep Seselwa, tou zanfan Sesel, bonzour.

Nou viv dan en pei ki pli zoli *au monde*. Enn kot sakenn

nou Seselwa, malgre nou diferans lapo. Malgre nou diferans relizyez. Malgre nou diferans oriyantasyon seksyel. Malgre nou divers dan lopinyon politik. Malgre nou bezwen spesyal, nou reste anba en sel paviyon.

Nou debout fyer konman en nasyon dan moman difisil e dan moman sikse. Nou reste ini. Sakenn nou ler nou leve dan bomaten, nou annan en rol pou nou zwe. Nou rol se anmenn dipen lo latap dan lakour. Me osi, pou fer Sesel marse.

Sa etidyan ki pe etidye lo ban lekol. Sa manman tousel ki pe fer de bout zwenn. Sa *housekeeper*, ziska sa zenn profesyonnel ki fek *graduate*. Nou tou nou sitwayen Seselwa. Nou tou nou form parti Gouvernman Sesel. Nou pe trimouse ansanm pour sikse Sesel.

Me malgre sa Mr Speaker, nou kontinyen fer fas avek defi. Defi konman bann endividi. Defi konman en pep. Me, nou reste avek en lespri pozitiv. Sakenn nou, nou rod en fason pour nou ariv ver nou destinasyon.

Mr Speaker. Ser, frer koleg, i a fer katriyenm repons diskour Leta Lanasyon ki mon reponn, ki nou reponn konman bann Manm Parlman.

Mon larepons ozordi, mon napa lentansyon pour

mwan atak okenn personn personnelman. Ouswa denigre karakter personnalite okenn endividi. Mon krwar dan linite e mwan mon'n pardonn zot byen lontan, Mr Speaker.

E la mon realize, ki konman en pep pandan 4an anba en nouvo Ladministrasyon, nou parkour in kourt. Me pour serten, i paret ki nou'n la pour plizyer deseni. Pour bokou, i paret ki 4an i sitan lontan konpare avek 43an. E la in annan plizyer lekspektasyon.

Sepandan, nou konman en Gouvernman, nou bezwen rod priorite parmi tou sa bann lekspektasyon. Mon konstate ki pa tou ki'n satisfè. E pa tou ki pou satisfè. Me, nou bezwen pran en letan, pour nou apresye nou lakonplisman konman en pep e konman en Gouvernman.

Mr Speaker, leta en nasyon i ganny definir atraver progresyon son pep. Leta en nasyon i ganny definir atraver son lenfrastruktir. Son servis piblik, stati lafors son lazènes, byennet bann dimoun ki vilnerab, dinyite son dimoun aze, pour sa enn ki viv avek en dezabilite. E byensir matirite son demokrasi.

Pandan ki nou'n ouver sa nouvo sapit dan nou demokrasi, nou'n bezwen revwar nou priorite konman en nasyon. Nou priorite

konman en pep. Nou priorite konman en endividi.

Kot ansanm konman en nasyon anba en nouvo Ladministrasyon, nou'n elev standar a en nivo. A en nivo ki zanmen in deza ete avan.

Pandan ki en group dimoun i kontinyelman rod bann keksoz negativ, san donn okenn solisyon pou nou bouz devan, nou'n vwar nou nou'n kontinyen travay sanses pou fer plizyer keksoz arive, Mr Speaker.

E la fodre mon dir, konpare ek sa ki ganny dir isi dan sa Lasanble. Wi, Seselwa i apresye. Plizyer Seselwa i apresye. Seselwa i apresye letan zot pas lo en semen piblik. Kot zot *drive* dan en konfor. Ki zot transpor pa bezwen al dan en garaz tou le mwan.

Parske zisteman, dan lespri pozitivite, sa Gouvernman in refer sirfas semen La Misère, Grand'Anse Mahé, Montagne Posée, Takamaka, Anse Royale. E la byento. Byento, en proze imans pe al terminen Mr Speaker. Sa i bann keksoz pozitiv. Sa i keksoz ki Seselwa i apresye, Mr Speaker.

(APPLAUSE)

HON NADDY ZIALOR

Letan en group dimoun i kontinyelman tir tou keksoz

negativ, i annan serten defi, wi. Me malgre sa, lo nivo sportif, nou Gouvernman in elev standar Mr Speaker. In les sport vin en priyorite atraver bann lenfrastriktir ki'n ganny renouvle.

La, mon mazin Stad Linite ki ozordi i annan en nouvo vizaz, en nouvo standar. *Palais des Sports*. Sitan zoli. Sitan eleve. Travay i kontinyen Mr Speaker. Sa i pozitivite. Sa i lapresyasyon Lepep Seselwa, Mr Speaker.

Sepandan, mon konstate ki ankor annan travay pou fer. La mon mazin Stad Popiler. Mon mazin bann lenfrastriktir lo nivo distrik. Egalman, nouvo sportif rezyonnal ki dan dan plan Gouvernman Anse Royale sa lannen, Mr Speaker.

Pandan ki nou pe koz lo leta lanasyon. Leta lazennes Seselwa i osi form parti nasyon Seselwa. E la, permet mwan adres lazennes Seselwa.

Lazennes Seselwa i en lafors dinamik dan nou pei. Plizyer lannen pase mon ti debout lo Stad Popiler, kot mon ti partaz en refleksyon avek Sesel.

Ozordi dan lespri pozitivite, ankor enn fwa mon anvi partaz sa refleksyon avek lazennes Seselwa e tou bann ki anvi fer Sesel bouze Mr Speaker, dan lespri pozitivite.

Nou'n sirmont bokou difikilte. Nou'n pas dan bokou

tirbilans. Nou'n investir dan nou dimoun. Nou'n batir nou nasyon. Se sa ki'n fer nou vin en pep pli matir.

Ou sa zenn. Ou ki pe viv avek en dezabilite. Ou ki dan lakour, kote ou ete? Eski ou la avek nou? Pour ou ki kapab. Pour ou ki anvi. Pour ou ki pe reve, me ou pa ankor leve. Mon demann avek ou ozordi, 2024, pou fer sa premye pa, e sosyete i ava vin zwenn ou.

Ou annan bokou abilite pou ou sirmont tou defi. Ki swa ou en zenn. Ki swa ou en dimoun ki ganny konsidere konman vilnerab. Legzanp i la. Loportinite i la.

Pour ou ki pe reve vin en travayer. Pour ou ki pe reve ganny en saler. Pour ou ki pe reve vin e ariv a nivo liniversiter. Mon dir avek ou, *dare to dream*. Pa zis reve, me viv ou rev. Ou annan en abilite. Fer li ozordi. Fer li pour Sesel. Fer li pour ou demen.

Ser, frer, donn lanmen batir Sesel. Donn lanmen batir ou demen. Ou rev, i nou rev. Mwan, byen lontan mon'n pare. Mon swete ki ou osi ou avann pare dan en lespri pozitivite, Mr Speaker.

Mon krwar dan en lespri kot sakenn nou, nou zwe nou rol. E mon napa okenn dout ki lazennes Seselwa i anvi loportinite pou li devlope. E bokou pe ganny fer pou anmenn lazennes lo en lot nivo.

La mon profite pou felisit Konsey Nasyonal Lazenés, pour bann nouvo linisyativ ki pe anmenn bann nouvo *trend* dan nou bann zenn.

Mon ti a kontan felisit bann zenn ki pe inisyé bann dann program lo nivo rezyonnal e lo nivo nasyonal. Sa, i bann keksoz pozitiv. Sa i sa ki Seselwa pe apresye, Mr Speaker.

Pandan ki mon lo lazénés, sa i fer mwan vin lo en size ki Prezidan Larepublik in adrese dan son diskour Leta Lanasyon. Lazénés vizavi lanplwa.

Mr Speaker, bokou travay in ganny fer e pe ganny fer pour plasman lazénés dan lanplwa. Mon pou agree avek Sef Deta, ler i dir ki nou bezwen fer plis an sa ki konsern plasman lazénés dan lanplwa.

Se pour sa rezon, ki mwan mon senserman krwar, pour sa arive i pa pou depan lo Gouvernman li tousel.

Wi. Wi, i annan zenn ki pa serye. Me i osi annan en gran mazorite lazénés Seselwa ki pe *focus* e pe travay lo son plan lavenir.

Wi, i annan zenn ki pa konsistan dan travay. Me, i annan bokou zenn ki pe *clock in* tou le bomaten, e i reste antouzyazme avek nouvo nide pou fer Sesel avanse. Souvandfwa, se bann vye

mindset ki ou vwar- ki pe vwar zot konman en menas.

Wi, i annan zenn ki'n tonbe. Me fodre nou konman en pei nou kontinyen donn nou bann zenn tou lankourazman nesaser.

Se pour sa rezon ki mon pe demande e mon pe demann tre for, de lapar lazénés Seselwa, ki Sekter Prive i pran plis letan pou donn lazénés plis lanmour.

Ki Sekter Prive, ler zot pibliy bann *vacancy*, e letan bann zenn i anvoy zot CV pour referans. Swa endividuelman, ouswa atraver Departman Lanplwa. Mon enplor zot silvouple, pou donn sa zenn sa loportinite, pour ki zot kapab progrese. Pour ki Gouvernman pa vwar li pe lager en lager li tousel.

Letan ki nou annan en *mindset* pozitiv, nou lev avek en lespri pozitiv. Nou desann nou al travay avek en lespri produktivite. E nou pei i partaz en lenerzi pozitiv.

Lazénés Seselwa, mon reste konvenki ki se ou, se nou ki dirizan ozordi pou anmenn en Sesel pozitiv demen.

Mon profit sa lokazyon pour mwan remersi tou zenn Onorab ki'n termin zot manda konman bann zenn Onorab Lasanble Lazénés. Mersi pour zot bann kontribisyon valab. Kontinyen reste angaze dan ou lekol e dan ou kominote.

An se moman, *SNYC* pe angaze pou organiz bann nouvo eleksyon, nouvo *Cohort* Lasanble Lazenés. Konman en zenn ki lo Komite Lazenés Lasanble, mon kontinyen donn mon komikman e devosyon anver lazénés Seselwa, Mr Speaker.

Pep Seselwa. Mr Speaker, nou'n sirmont bokou tirbilans letan ki nou ti pe ferm sapit lannen 2023. Lespri le 7 Desanm i en lespri kot konman en nasyon, nou'n solider avek nou bann frer e ser dan letan maler.

Nou'n zwenn ansanm avek en lespri pozitiv pour nou ed nou koleg Cascade e nou bann koleg dan nor. Nou'n fer li avek nou leker. En leker senser. En leker pour Sesel e non pa pour laglwar.

E la, mon anvi remersi nou Gouvernman ki'n demontre son komitman pou ed tou zabitan. San get zot kouler. San get zot lafilyasyon dan sa moman difikilte.

Mon zwenn avek lezot mon bann koleg, pou tir sapo avek Onorab Sandy Arissol, Onorab John Hoareau, Onorab Regina Esparon e pli enportan, Onorab Monthy. Mersi pour zot devosyon e zot komikman anver zot pep.

(APPLAUSE)

HON NADDY ZIALOR

Sesel i annan gratitud. Sesel i rekonesan Mr Speaker. Lavi i kourt. Lavi i vremen kourt. Ozordi ou vwar ou vwazen, ou vwar ou fanmir, ou vwar ou koleg. Me parfwa, par zis en koud telefonn ou kapab resevwar en mesaz ki dir avek ou, ou pros in ale.

Desanm bokou pros in ale. Sa destinasyon letan avyon i apoze, pa toultan ki ou ganny sans dir en dernyen orevwar. Pa toultan ki ou ganny sans dir ki kantite ou apresye enn a lot.

Ozordi, serten dimoun i reste konman en memwar. Me par kont, fodre ki nou kontinyen travay e nou gard nou leker tout an gardan sa bann bon memwar Mr Speaker.

Sesel i ankor enn fwa, dir mersi Onorab Rosie Bistoquet. Naddy i ankor enn fwa, dir mersi Onorab Rosie Bistoquet.

Mr Speaker, tre souvan nou viv avek serten lanmertim kot nou les laenn anvai nou leker. Kot nou les vanzans vin nou azanda personnel.

Wi. Wi. Dan lespri linite nasyonal. Dan lespri inifye nou pep, mon demann avek Lepep Seselwa ankor enn fwa, fer en pti tour *d'horizon* e regarde lekel ki vremen anvi vwar nou pep ini. E lekel ki anvi vwar nou pep divize, Mr Speaker.

Sepandan, mwan mon a dir avek ou, annou viv byen. Annou viv dan lanmour. Annou vin sa laspirasyon pour lape e rekonsilyasyon. Leta nou Nasyon i letan nou pe viv byen dan vwazinaz. Letan nou kre en latmosfer linite. E sa, i konmans avek nou konman bann dirizan.

Mr Speaker, enklisivite i enn bann topik ki konman en Manm e konman en dimoun ki pe viv avek en dezabilite, i reste touzour enn mon priyorite. E i reste priyorite Gouvernman LDS.

Bokou keksoz pozitiv pe arive an sa ki konsern sa group dimoun. Nou'n vwar en nouvo lasosyasyon ki pe promouvwar aksesibilite fizik. Kot nou'n vwar diferan lorganizasyon departman Gouvernman, prive. Menm lofis pli o lo later Sesel, Prezidan Larepiblik, in partisip dan 'Ramp Up, Rise Up' Campaign.

Kot sa lannen, dan lespri pozitiv, dan lespri enklisivite, nou pou vwar en *lift* ganny enstale *State House* Mr Speaker. Tousala i bann keksoz pozitiv.

Reouvertir Sant Vokasyonnel North East Point, ki pe al arive tre byento an Mars. E la, mon profit lokazyon pou mon dir mersi. Mersi pour bann dimoun ki'n ede, ki'n pouse pou fer sa arive

Mr Speaker. Malgre in annan bokou lenerzi e lespri negativ.

Mon swete ki sa fasilite i ganny servi tre byen. E sa i ava en zouti pou *empower* plis nou bann dimoun ki pe viv avek en dezabilite. Mon pozitiv, wi. Mon pozitiv aköz de plis an plis mon vwar en lenerzi ki anvi fer transformasyon pour sa group dimoun.

Mon santi avek en nouvo lespri kot Lekol Eksepsyonnel, avek en nouvo Ladministrasyon ki anvi vwar keksoz bouze, nou pou ariv bokou pli lwen.

Sepandan, sa group dimoun mon bezwen admet, ki i ankor annan serten defi ki nou pe fer fas avek. I annan bokou ki ganny abandonnen avek zot manm fanmir.

I annan sa msye ki *bedridden*, ki son *carer* pa konsistan. Sa zenn dezabilite ki bezwen ganny *empower* konsernan son drwa. Sa enn ki li i pe rod en lanplwa. Mwan mon pou dir avek zot, annou pa perdi lespar. Annou gard en lespri pozitiv.

Servis piblik i leker en Gouvernman. Leta en pei i ganny mezire par lafason ki nou delivre vizavi nou piblik. Mr Speaker, fodre mon dir ki bokou *public servant* i konpran ki direksyon nou Gouvernman i anvi anmenn Sesel. Bokou pe delivre.

Ki swa sa ners dan klinik Anse Boileau. Ki swa sa profesyonnel ki mon'n zwenn semenn pase dan *Outreach Programme Mental Health*, ler nou pe fer *door to door*. Ki swa sa *physiotherapist*, sa zofisye lapolis, sa *teacher*, sa resepsyonnis. Sa zenn ki pe met lespri pour materyaliz diferan proze lo nivo kominoter. Ozordi mon dir avek zot, ki Sesel i apresye zot devosyon.

Me, nou bezwen fer sir ki nou travay ek nou leker. Travay pour nou pei. Osi lontan ki nou kapab, nou Gouvernman pou valoriz zot, Mr Speaker.

Dan mon parkour lavi, mon'n aprann apresye sak ler ki mon respire. E sak nouvo zour, i en loportinite pour sakenn nou fer en keksoz pli byen. Pli byen ki nou ti fer yer.

Mon dir avek Lepep Seselwa, pa zis krwaz nou lanmen e fer en lalis demann ki nou anvi, ouswa ki nou ti a swete. Me donn en koudmen pou fer Sesel vin meyer. Pa aye nou prosen zis akoz in sakrifye e in aprann fer sikse. Me partaz son sikse avek lezot.

Letan enn ou frer ouswa en zenn i fer progresyon dan lavi, pa bezwen zis regard son bout negativ. Me felisit li letan i fer byen. Napa plas pour laenn. Napa plas pour zalouzi. Napa plas pour rankin.

Zalouzi i kapab fer ou leker gonfle, me i pa pour fer ou avanse Mr Speaker.

Rod fason pour nou grandir ansanm konman en nasyon. Dan plas rod tou keksoz negativ, me zanmen donn en solisyon. Sa i diferans ant *LDS* avek bann lafors ki pe debout kont nou, Mr Speaker.

Si ou. Si nou, nou atrap lanmen kanmarad ansanm e pran en moman apresye sa travay ki nou Gouvernman, ou Gouvernman pe fer.

Wi, parfwa ou fristrasyon i egal ou lekspektasyon. Me nou bezwen reste realis. Reste rezilyan. Mwan mon konvenki ki sel Gouvernman ki'n vin fran e ki onnet, e ki pe travay ek leker pour son pep, se Gouvernman *LDS*, Mr Speaker.

(APPLAUSE)

HON NADDY ZIALOR

Mon profite pou lans en lapel avek tou Seselwa. Sesel i nou pei. Sakenn nou, nou annan en par dan Sesel. Annou reste pozitiv. Annou kontinyen donn en koudmen pou fer Sesel avanse.

Nou reste angaze pou fer Sesel vin pli mye. Angaze pou annan en Sesel pozitiv. E pour ou ki kontinyelman pe mazin Sesel. Ki kontinyelman pe atrap lanmen Sesel. Pour ou ki pa pe swet maler Sesel, me ki

kontan Sesel e pe defann Sesel, mon dir avek ou ki nou, nou pa pou zanmen les tonbe! Mersi Mr Speaker.

(APPLAUSE)

MR SPEAKER

Mersi Onorab. Mon a prezan pas laparol avek Onorab John Hoareau pour son repons.

HON JOHN HOAREAU

Mersi Mr Speaker. Bonzour Mr Speaker. Bonzour tou dimoun a lekout. E osi bonzour spesyal pou bann dimoun Beau Vallon. Mr Speaker, yer mon'n ekout bann Manm parti minoriter koze. E mon'n fer en lalis omwen 50 keksoz, ki swa i pa fonde, swa i mansonz.

E mon ti dir mon ava klarifye sa bann keksoz. Me apre mon'n dir non, mon pa pou vin konfrontasyonnel. Me plito mon ava anvoy en lanmen avek zot. Mon pou donn zot en konsey tre senser, si zot oule reste relevan dan sa klima politik Sesel fodre zot rezet larogans.

Rezet latak personnel, e zwe zot rol koman en vre Lopozisyon. Aret pares, olye gele avek en litani problem imaziner, vin avek en alternativ montre sa pep ki zot annan en lide diferan. *Be part of the solution, rather than part of the problem.* Par egzanp, si ou vwar i annan en *flood*.

Ou koman en dirizan si ou vwar i annan en *flood* La Pointe Larue. Ki ou ti pou fer diferaman? Eski ou ti pou met sa trafik lo ou ledo pou anmenn zot Anse Aux Pins? Eski ou ti pou donn lezel sa trafik? Eski ou ti pou rod en salan pou met zot lo la? Dir nou ki ou ti pou fer.

Oubyen napa dra lopital. Eski, a en moman ti annan dra lopital. Eski ou pou rode sa ki responsab pou fer napa dra lopital e pran aksyon kont li? Oubyen ou pou asiz laba e ou pou zis kritike. E ou pa pou pran aksyon pangar sa madanm ek son 3 piti a vin gele kot Onorab Lemiel.

Mr Speaker, Diskour Leta nou Nasyon prononse par Prezidan Larepublik, i touzour en loportinite inik kot nou bezwen fer en refleksyon profon lo kote nou sorti, kote nou ete e kote nou pe ale.

I en moman dan letan kot sa refleksyon i anmenn nou pou demande plizyer kekyon tel ki. Eski mwan konman en sitwayen Seselwa mon bann dwa Konstitisyonnel pe ganny respekte?

Eski sa la demokrasi ki mon pe viv ladan i kre lespas pou mon lopinyon ganny ekoute menm si i diferan avek lezot?

Eski mon zanfann pe ganny en bon ledikasyon ki permet li vin sa zonn ou fanm ki i anvi vini demen?

Eski ler mon bezwen en servis ki Leta i ofer, mon kapab ganny akse avek san gran difikilte?

Eski i annan posibilite pou mwan ganny en lanplwa san diskriminasyon. En lakaz si mon kontribye avek *HFC* e mon zwen bann kriter ki'n ganny etabli?

Eski mon lavi konman en zenn, en travayer, en pansyoner pe progrese, lekonomi pei pe avanse, mon pe viv dan en lanvironnman ki sen?

Mon mazine pou bokou nou, larepons pou varye lo tou sa size e sa i normal. Akoz ou larepons i pou depann lo ou lekspektasyon lo performans *Gouvernement du jour*. I ti a swetab ki tou dimoun ti ava annan en repons 100 lo 100 lo tou sa size. Me nou tou nou konnen ki sa pei pa parfe. Sa lemonn pa parfe e otan ki imen pa parfe i pou annan konplent, i pou annan dezapwentman. Me i pou osi annan satisfaksyon, aklamasyon e bokou reisit.

Konman en ti pei avek en lekonomi vilnerab, en pep mwens ki 100,000 zabitan, nou pe fer fas ek tou defi ki sa lemonn globalize i poze. Plizyer dirizan i'n fer nou realize avan ki nou pa pou zanmen kapab satisfere tou dimoun a tou moman. Ler i annan en latou Lerop, ou en lerim dan

Mwayenn Orian, Sesel nou soufer avek en lafyev.

Set a dir bann lefe sanzman klima, lager *Ukraine* e Larisi, e tou resaman lager *Hamas* avek zwif. Enstabilite dan lanmer rouz, ki'n fer re sirfas piratri dan Losean Endyen. Bann lafors zeopolitik rezyonal, bann problem epidemyozik tanzaot, i annan bokou reperkisyon lo lekonomi e nou fason viv.

Lafason ki nou navig sa kouran global e fer fas ek tou sa bann defi i fer ki Gouvernman *LDS* i'n bezwen travay dan en fason *smart* pou servi sa resours tre limite ki nou annan pou zener maksimonm benefis pou nou lepep.

Sa in mark sa letap transformasyon, ki nou'n koup labi e koripsyon e met lanfaz lo *rule of law* e responsabilite sak sitwayen. Se sa sanzman, se sa diferans dan nou fason dirize an konparezon avek nou adverser ki'n pas avan nou.

Alor leta nou pei en 2024, se en pep ki yer in swazir pou elekte pou la premye fwa dan listwar Sesel en Prezidan ki pa'n konmans son manda par pas baton oubyen koudeta. Sa Prezidan i'n met en tim Minis ansanm ki'n konmans travay depi premye zour e dan 3an i'n akonpli sitan bokou.

Komansman avek reouver pei pou biznes, reparasyon bann lenfrastruktir spor ki ti'n tonman rin, konstriksyon port, lekòl, lakaz e lezot.

En Gouvernman ki'n vin o pouvwar anba en tenm "Sesel pour tou son zanfan". Kot i'n konmans en kanpany linite nasyonal atraver eliminasyon en konsepsyon 'ek nou pa ek nou' ki ti'n anzandre dan tou kous Gouvernman e servis piblik. Menm si nou ideoloji sete pou anmenn linite nasyonal, en promes dan nou manifesto. Me, ki nou'n vwar?

Nou'n vwar kot Lopozisyon i'n esey fason pou sabotaz sa prensip e anmenn divizyon dan pei. Zot ti konmans par dir zot bann siporter dan en zot kongre, pou anmenn politik dan travay, senm negativite, tren lipye e pa don sipor pou fer marse zot lorganizasyon.

Zot bi sete pou senpleman retard travay Gouvernman LDS e senm konfizyon partou. Me sa pa pou marse, i pou fiz ek zot parey en petar fize. Pep Seselwa dan son gran mazorite pou anvoy zot deryer kannal Ile Sèche ankor enn fwa an 2025.

(APPLAUSE)

HON JOHN HOAREAU

Akoz senpleman sa pep in swazir demokrasi e devlopman dan plas retourn dan la diktatir ek koripsyon parey lepok SPPF.

Leta nou pei ozordi set en Gouvernman LDS ki dan selman 3an i'n akonpli, in akonpany son pep ver en demokrasi vibran e modern. Ki ozordi i en model sikse lekonomi lo nivo mondyal. Kot *the rule of law* i'n vin prensip fondamantal nou fason fer.

Ozordi tou Seselwa i'n ganny en lavwa pou kritike ki mannyer zot ganny bezwen. San menm ganny met dan prizon oubyen ganny bate parey ti leka anba Gouvernman SPPF.

Anba sa prensip *rule of law*, sa bann ki'n fer koripsyon dan lepase e ti krwar ki zot par lao Lalwa pe ganny *deal* avek. Se sa lazistis ki nou'n promet sa pep.

Alor i pa drol si *Transparency International* i'n rekonnèt zefor ki Sesel pe fer. Alor, *Transparency International* in vwar ki ledikasyon, sansibilizasyon, latransparans e bann ka koripsyon ki'n ganny prosekite in fer ki nou'n pran en pozisyon pli o dan Lafrik avek 71 pwen. Ki'n met nou parmi bann pei Eropen ki annan mwens koripsyon dan lemon.

Mr Speaker, mon vreman touse ler Prezidan Larepublik ti

fer en leskiz lo lapar Leta Seselwa pou bann atosite e soufrans ki bokou nou frer i'n pas atraver e in sibir anba diktatir Prezidan Rene. I pran en gran zom pou annan sa liminite e pou demann pardon avek son pep pou en keksoz ki li menm i pa'n partisipe pou fer.

Si parti *US*, e la mon pe adres zot direk lo lot kote latab. Si zot annan okenn pider e zot annan en leker imen, fer parey, demann pardon sa pep. Desosye zot avek sa ki Albert Rene ti reprezante, e pep Seselwa i a get zot dan en lot loptik.

(APPLAUSE)

HON JOHN HOAREAU

Prezidan i'n osi promet pou met an aplikasyon bann rekomandasyon *TRNUC* ki Lasanble i'n fer pou anmenn sa dernyen bout reparasyon dan lavi bann viktim. E sa pou konmanse byento avek en Lalwa pou kre en Komite Reparasyon pou get dan ki fason pou ganny finansman pou bann viktim.

En memoryal pou bann viktim ki mwan mon apel zot bann ero la demokrasi pou osi ganny fer. E la mon oule salye travay ki Fondasyon Gerard Hoareau in fer pou zisteman rod en sit pou sa memorial. Konpansasyon apre

konpansasyon e ankor konpansasyon se sa leta det ki *SPPF* i'n kit sa pep ladan.

Mon bann ser, mon bann frer, leta nou pei ozordi se en leta kot menm ki nou'n ganny tape for par lepidemi *COVID* dan lannen 2019/2020. Menm si nou'n erit en pei ki ti annan zis R14milyon dan kof Leta pou pey en saler pou travayer pou zis 4 mwan. Menm si lager Lerop e Mwayenn Oriyan pe enpakte lo pri lavi. Menm si nou'n fer fas avek en movetan e dezase le 7 Desanm lannen pase, nou sekirite nasyonal in reste stab e nou lekonomi i'n kontinyen grosi pandan lannen 2023.

Nou pep i'n reste rezilyan e zis avek en krwasans 3.8 pousan an 2023, nou lekonomi i'n permet nou don logmantasyon 10 pousan lapey an Avril lannen pase. Lazans Proteksyon Sosyal in ogmant peyman bann benefis sosyal ant 81 pousan pou *semi-orphan* ki pli ba ziska 233 pousan pou *expectant mothers* ki logmantasyon pli o. E menm en nou benefis i'n ganny entrodwi pou *multiple birth* ki ariv ziska R6,633.47sou tou le mwan pou sa premye 5an dan lavi sa zanfan.

Zanmen dan listwar sa pei, ki'n annan bann logmantasyon sitan o dan benefis sosyal. Nou'n vwar

larzan pou don tou zanfan lekòl Leta goute e dezennen si zot anvì. Tousala in arive malgre fo propagann e politik bon marse ki *US* pe kontinyen fer ler zot dir ki nou form parti en Gouvernman liberal, ki pa'n pran swen avek son pep e ki son zanfan pe ganny malnitrisyon.

En ler ou a krwar Lopoziyon, *US* i devret pran konsey Lepap Francois e mord zot lalang. Mord zot lalang sitan for ki ler i anfle i ava gonfle dan zot labous e zot pa ava kapab koz mansonz.

Mon pa dir ki tou i parfe, mon rekonnèt ki bann benefis i bezwen ganny donnen dan en dele letan pli kourt. Me sa i reste en defi pou Lazans Proteksyon Sosyal.

Sistenm ki an egzistans i ankòr manyel. E avek led *World Bank* ler tou sa bann prosedir i vin nimerik, mon konfidan ki bann kliyan pou vwar en rediksyon dan letan ki bann prosedir i ganny fer.

Mr Speaker, leta nou pei an 2024 i en leta kot nou zanfan i ganny akse avek en ledikasyon ki modes. Lannen apre lannen, nou pe vwar progre dan lakonplisman bann zanfan dan legzanmen lekòl, dan legzanmen lekòl lokal e enternasyonal.

I annan ankòr bokou plis pou fer pou aprann atraver leksperyans bann lekòl

prive ki pe fer bokou sikse. Me mon satisfè ki Minis Valentin pe fer bann sanzman neserer dan lekòl pou anmenn plis lotonomi. E fer lavi bann ansennyan vin pli byen ensi ki laprantisaz vin pli efektiv.

Lo kote pos segonder, bokou plis latansyon fodre ganny mete lo lafason ki seleksyon i ganny fer. Fodre a tou pri latransparans e meritokrasi i vin labaz enportan lo ki zanfan i ganny admet dan pos segonder.

E la konman en ansennyan par profesyon, Mr Speaker, mon le profit sa loportinite pou ankouraz bokou plis zenn pou pran sa karyer nob dan ledikasyon, la ki nou pei i bezwen ou pou pran larelev. Pou ou donn lanmen pous sa lazanda transformasyon.

Mr Speaker, servis piblik i pre ek mon leker anvì ki mon'n fer bokou travay lo la size dan mon letid. Nou servis piblik i reste en gran defi e en sours fristrasyon e dezapwentman pou bokou dimoun.

An dizan sa, nou bezwen osi rekonnèt ki bokou i pe deza ganny fer par Biro Servis Piblik an kolaborasyon avek Lenstiti *Guy Morel*. Tel ki koman bann kour pou lev nivo bann CEOs e lentrodiksyon *Result-Base Management* dan servis piblik. Bokou *civil*

servants pe aprezan pran konsyans zot rol e pe don en bon rannman dan travay.

Malerezman leta servis piblik an zeneral i montre ki i annan bokou plis travay pou fer. Premyerman nou bezwen valoriz kour ladministrasyon biznes e donn sa kour pli gran lanpler dan pos segonder e liniversite. Nou bezwen en nouvo zenerasyon *managers* ki *manage and lead*, non pa *managers* ki fer zis enn me pa fer lot.

Se selman ler sa de rol i konbinen ki nou pou vwar vre sanzman dan nou servis piblik. Parey dikton i dir '*There are no bad workers but bad managers and the buck stops at the head*'.

Dezyenmman Mr Speaker, i annan osi en problem latitud parmi serten travayer ki gat nou servis piblik. Kot fason fer dan lepase in reste fason fer ozordi.

Ankor enn fwa, lo sa kote latab konman bann dirizan ki serye e responsab nou pe sipliy avek travayer, pou kit politik se ou. Kit lapares se ou, kit malis se ou e kit tren lipye se ou ler ou antre dan ou landrwa travay. Realize ki sa lapey ki ou pe gannnen lafen dimwan pa sorti ni *Maison Du Peuple*, ni *Arpent vert*. Me i sorti dan kof Leta, dan kof piblik. E i en lapey ki ou'n

agree pou sa travay ki ou'n agree pou fer.

Se selman ler ou annan en bon latitud, e en lapros pozitiv e ou met ou pei avan politik ki travay pou mars korek. Mr Speaker, leta nou pei. Leta nou Sekter Konstriksyon ozordi i bezwen bokou plis latansyon aköz mankman materyo swivan sa leksplozyon kot lakonpanyen CCCL.

Malgre pri materyo pa'n monte me lefe i reste ki *pickup* i bezwen *park* pou plizyer erdtan pou ganny materyo ki limite. Alor sa i fer cours vin pli ser. Sa dan li menm i anmenn pri konstriksyon pou vin en pri pli eleve e ogmant letan pou konplet en proze.

An menm tan sa lenflasyon i annan en lefe kaskad lo pri lavi, sirtou lo bann pti zil parey La Digue ek Praslin ki par lao cours *pickup* zot bezwen pey bato e pey ankor en *pickup* ler materyo i debark lo zot zil.

Mon pe sipliy ek Gouvernman, si zot kapab deswit lans en expression of *interest* pou Sekter Prive investi dan en *mini quarry* e ede premyerman dan prodiksyon materyo konstriksyon pou bann bezwen Gouvernmental parey SLTA e proze Gouvernman.

E dezyenmman pou retir presyon lo lakonpanyen

UCPS. I neserer osi pou annan en *backup* an ka masin kot UCPS i kase.

Mr Speaker, nou bezwen pran byen swen ler nou fer sa *quarry*, kot nou fer li dan en landrwa kot i pa pou afekte nou bann dimoun.

Mr Speaker, *tourism* i reste en sekter kle nou lekonomi, ki anmenn anviron \$40milyon par an, ki koresponn avek anviron 38 pousan nou prodwi domestik brit. Sa sif i sif ofisyel me nou konnen ki bokou plis larzan i sipoze pe rantre dan nou pei.

Nou vwar ki bokou de fwa se bann lakonpanyen enternasyonal ki pe investi dan sa sekter pou fer bann lotel 5, 6, 7 stars. Me nou bezwen osi demande ki retonbe finansyel i annan dan nou pei e kote ki nou pep i benefisyè?

Leta sa sekter dan nou pei i montre ki bokou larzan pe zis retourn aletranze. En gro sonm atraver *booking* i ganny fer an deor Sesel e ki pa zanmen ariv Sesel aköz *transfer pricing*. En lot gro sonm ki al dan pos travayer etranze ki'n swa konstri sa lotel li menm, oubyen atraver lapey ki relye avek loperasyon sa lotel. En gro sonm i ganny repartir kot *Headquarters* sa lotel ki baze aletranze pou son bann *shareholders* rekiper zot lenvestisman.

Sesel nou ganny en ti pousantaz ki rantre konman reveni *tax*, ki menm de fwa sa lotel pa deklar okenn profi. En pousantaz ki antre atraver *lease payment* lo sa propriyete. Petet en sonm pou lilitite piblik ki menm osi annan de fwa, i tre limite aköz zot prodwi zot prop delo desalinen, e zot osi annan sistenm fotovoltaik pou elektrisite.

Petet en ti larzan i ganny depanse lo *tour, car hire, oubyen aste serten lobze artisanal*. Alor, napa gran zafer ki rantre dan nou sistenm finansyel. Malgre sa biznes i eksplwat nou labote nou pei e nou lakey salere.

Mon apresye ki Gouvernman i'n entrodwi en *tax* lo lanvironnman, aköz prezans bann viziter i met bokou presyon lo nou resours e lenfrastruktir. E sa kalite *tax* i enn ki an egzistans partou otour lemonn, se pa en lenvansyon Sesel.

Mr Speaker, petet konman en Gouvernman nou bezwen pli inovatif e rod fason pou fer ki plis touris i premyerman depans plis e dezyenmman, ki o mwen 95 pousan sa larzan touris ki'n ganny programen pou depanse i reste Sesel.

En bon fason fer sa, se pou ankouraz *local ownership*. Biznesmenn ou group

biznesmenn Seselwa ki annan en bon plan biznes e pou kapab zer en lotel i devret ganny akse avek bokou plis finansman atraver bann fasilite finansyer. Kot zot a kapab aste bann lotel ki swa an egzistan oubyen pou konstri de nouvo avek bann kondisyon lenvestisman ki avek lentere ki favorab.

Sa larzan ki *DBS* pe ofer ozordi i tro pti morso e pa reflekte sa realite. Mon konvenki ki atraver negosyasyon avek bann pei zanmi ki annan bokou larzan e i annan posibilite pou kre en *credit line* pou en serten nonm lannen pou fasilite sa kalite lenvestisman. E la mon pe propoz en fon omwen \$50milyon pandan 5an.

Fodre ki Seselwa i vin propriyeter sa sekter kle dan son lekonomi si nou anvi nou pei i benefisye plis avek sa lendistri.

Leta nou Pei e Leta nou Nasyon an zeneral i reflekte leta tou nou bann distrik parey en lasenn avek 26 mayon.

Dan mon distrik mon satisfise ki bokou devlopman pe arive. Tou bann semen primer i'n ganny re sirfas e zot dan bon kondisyon. Si ti napa problemn materyo konstriksyon, bokou plis bann semen segonder ti pou'n ganny en nouvo sirfas koltar.

Lannen pase nou vwar konstriksyon dezyenm faz miray lo lans ant restoran *La plage* e sa *open-air gym*. En miray ki pou anpes lerozyon detri nou lakot e nou zoli lans ki ganny rekonnet konman enn bann pli zoli lans dan lemonn.

Avan sa, son premye faz in ganny konstri ant *La plage* e *Pizzeria* e i'n osi prouv son lenportans apre ki bann rad mare e bann move letan an Desanm e boner Zanvye pa'n fer okenn domaz lo lenfrastruktir tel ki semen e batiman o bor lans.

Fodre dir, ki si nou ti'n ekout sa pti group Lopoziyon ki kont tou devlopman dan Beau Vallon, ozordi nou ti pou napa en semen e naryen pa ti pou bouze.

Atraver fon Gouvernman Lokal pou pti proze dan distrik nou'n osi konstri *bus shelters* lo semen prensipal pou don plis konfor bann pasaze. Peron Le Niole kot Mrs Dupres in fini konstri. E premye faz *playground*, *La Batie* pe konmanse. Drenaz kot Mr Labrosse, Pascal vilaz pres pou konplete.

Anba bann gran proze Gouvernman, premye faz lagrandisman bann kontour e semen Beau Vallon e *retaining wall* pou anpes glisman teren lo sa semen in konplete. Lasanble in siport mwan e vot

ankor R4 milyon dan Bidze 2024 pou dezyenm faz sa proze kot ankor miray pou ganny konstri an desandan kontour *La Flûte* kot bann bis i ganny problem pou krwaze. Tousala se pou donn pli bon sekirite bann pyeton e motoris lo sa morso semen.

Sa lannen nou pou osi vwar komansman *14 unit social housing* Pascal Vilaz anba fon *Saudi*, ki sa i pou soulev demann pou lakaz dan distrik.

Pli gran devlopman ki'n konmanse se konstriksyon anviron 40 *kiosk* pou labwason, manze e lavant lobze artisanal lo sit Bazar Labrin.

Sa proze pou kout anviron R15 milyon e sa i en donasyon ki *Laxmanbhai* in fer. La mon oule profit sa lokazyon pou dir en gran mersi *Laxmanbhai* e osi Minister pou Lantreprenarya pou met sa *icing* lo sa gato ki nou pe kwi.

Me mon demande osi ki bann laplikasyon kot bann dimoun ki ti la deza avan lo sa sit, i ganny respekte ki zot osi zot kapab ganny en plas dan sa landrwa. Byento aktivite Bazar Labrin pou retournen, e Beau Vallon pou vin pli vivan. Sa bann aktivite pou donn loportinite bann zabitan e lezot dimoun ki'n fer demann pou en *kiosk* met en pe plis larzan dan zot pos. E osi en pe

manze lo latab zot bann fanmir.

Mon le profite pou demann bann vander ki ganny sa loportinite pou fer biznes pou zot mentenir en bon nivo lizyenn, en bon prodwi kiliner e osi mentenir disiplin ek lord. Sa landrwa i en landrwa pou bann fanmir e pa en landrwa pou zot vin fer lager oubyen vann drog, oubyen fer lager avek gran kouto.

Mr Speaker, mon le osi profit sa loportinite pou reasir e fer konpran piblik ki avek sa devlopman, nou pou bezwen koup serten pye dibwa. Tou prekasyon in ganny pran pou koup zis pye dibwa ki dan bann landrwa egzakt kot sa proze pou ganny fer. An plis ki sa, selman 3 pye takamaka avek en dyamet apepre 30 santimet ki'n ganny koupe. Leres se swa pye sed, pye koko oubyen pye bodanmyen.

Nou pa pe al koup 30 pye takamaka parey sa fo nouvel lo *SBC* in dir. I pa'n zanmen nou lentansyon pou fer sa. Mon ti a osi apresye ki *SBC* ti a fer en pli bon zefor dan le fitir pou donn nouvel ki korek. An plis ki sa avek sa *seawall* nou'n sov omwen 25 pye takamaka ki matir, ki o bor lans ki radmare ti'n tir tou disab ek son rasin, e ki ti pres pou tonbe. I ti ava enteresan pou vwar *SBC* fer rapor lo la

pou etabli en balans dan zot nouvel.

Mr Speaker, an konklizyon mon ti a kontan fer resorti ki Leta nou Nasyon Seselwa i enn kot nou Gouvernman pe fer le mye avek resours ki a son dispozisyon. I annan bokou zefor pou repar bann lenfrastruktir debaz, konplet bann diferan proze ki swa lekol, lakaz, ou lopital dan diferan distrik.

Nou'n osi fer sir ki bann benefis sosyal in ganny targete pou zis bann ki bezwen e napa labi. E tou nou bann sekter enportan pe kontinyen fonksyonnen malgre tou bann defi ki nou pe fer fas koman enn ti pei dan sa lemond globalize.

Sel keksoz ki mon pe demann pep Seselwa, se ki bann zanfan kontinyen etidye for a pran tou loportinite pou zot epanouir.

Bann travayer, travay konsyansyezman pou zot prop benefis e pou benefis pei. Bann *senior citizens* rezouir en retret dan dinyite e kontinyen pas zot bann bon konesans avek bann ki pli zenn. Se Selman ler i annan linite parmi nou pep ki nou pou kapab progrese. Ki Bondye i kontinyen beni nou pti pei. Mersi.

(APPLAUSE)

MR SPEAKER

Mersi Onorab. Mon a pas laparol prezan pou Onorab Conrad Gabriel.

(APPLAUSE)

HON CONRAD GABRIEL

Mersi Mr Speaker. Mon a dir bonzour tou dimoun a lekout. Bonzour tou pep Seselwa ki pe ekout nou, pe enport kot zot ete. En bonzour spesyal pou zabitan La Pointe Larue.

Mr Speaker, dabor atraver ou avan mon komanse. Onorab Hoareau, in dir nou rezet larogans e latak personnel. Les mwan *remind* ou ki ti a pli bon ou dir sa ek ou Prezidan. Akoz se li ki arogan, e fer latak personnel. Mersi.

(APPLAUSE)

HON CONRAD GABRIEL

Mr Speaker, dabor ankor enn fwa mon ti a kontan remersye tou zabitan mon zoli distrik Pointe Larue. Mersi pour zot rezilyans, determinasyon e disiplin dan sa bann moman difisil ki nou pei pe pas atraver. Mersi pou zot tou. Tou Seselwa, pe enport kot zot ete. Mersi pou zot sipor.

Leta nou Nasyon in ariv en staz kot Seselwa i bezwen double e menm triple zot zefor pou fer 2 bout zwenn. I fermal

pou bokou fanmir, Mr Speaker. Nou tou ki la dan sa Lasanble nou konnen ki poudir plis ki vre. Me i annan ki pou prefere anval lalang, oubyen ti a pli meyer si zot mord zot lalang, Onorab Hoareau.

Prezidan in sanz *tune* e pran en tonasyon tre kalm pou delivre *speech* Leta nou Nasyon, ki normalman i pa son *style*. Nou konnen akoz i sanz *tune*, eleksyon pe aprese e ou remarke ki de zour an zour *LDS* pe perdi popularite.

Les mwan dir zot ki si Leta nou Nasyon i koumsa ozordi se pa lot ki Prezidan ek sa Gouvernman *LDS* ki responsab.

(APPLAUSE)

HON CONRAD GABRIEL

Zot in retir tou bann bon Polisi ki ti egziste e sey re envant larou. In bliye ki rol en Gouvernman se pou asir en lavi abordab pou son pep e pran byen swen ek son pep. Prezidan i oule fer tou keksoz e bokou bann Minis ki dan sa *cabinet*, zot krwar zot konn tou keksoz. E sa Mr Speaker i apel *micro-management*.

Li menm pou al Beau Vallon pou al get pye takamaka ek pye koko ki'n preski fini ganny koupe malgre son *executive order*. Zot

be kantmenm dir, balanse *comme* dir marmay.

Nou annan en Gouvernman ki napa tolerans e sey son mye pou ridikiliz nou bann dimoun ki travay dan medya e lezot sekter kle nou lekonomi. I vwar problem ek tou dimoun e zis li ki koz laverite. An dot mo, i pa kontan ekoute, e sa i kre fristrasyon dan servis piblik e menm dan son prop administrasyon.

Ou kapab lir lo figir bann Minis ler zot vin reponn kestyon dan sa Lasanble. Nou konnen osi ki bokou bann Egzekitiv dan Gouvernman pe zis pez zot tanperaman akoz sistenm konmela pa permet zot eksprim zot lopinyon parey zot ti a voudre. Mon dir zot pran kouraz akoz 2025 zot osi zot pou selebre sa gran soulazman. En pwa lour pou sorti lo zot ledo e osi byen ki lo ledo tou Seselwa.

Nou konnen ki nou pe pas dan bokou difikilte e sa detrwa mwan ki'n pase pa'n fasil ditou pou bokou fanmir Seselwa, espesyalman bann dimoun Petit Paris, Providence, Cascade dan Nor Mahe e san oubliy mon prop distrik Pointe Larue.

Lavi pou sa bann dimoun ki'n ganny afekte pou nepli parey. I pou reste en kosmar pou bokou zanfan e osi byen ki adilt ki'n sibir sa leksplozyon

kot CCCL. En sikatris ki pou marke dan listwar nou pti pei.

Gouvernman in *fail* pou zer sa sityasyon parey ti devret. Bann *statement* ki pa ti apropiye in ganny fer apre sa lensidan ki'n fer ki bann lakonpanyen lasirans prezan in reakte lo sa bann *statement*. Sanmenm ki'n arive ler nou tro enterfer e napa *statesmanship* dan konportman en dirizan.

(APPLAUSE)

HON CONRAD GABRIEL

Mr Speaker, nou ti demann en *private enquiry*, me Gouvernman ti kategorikman refize. Akoz? nou demande akoz. Byento, laverite pou sorti. Nou bezwen sezi sa moman pou nou fer bokou refleksyon lo lavi an zeneral. Nou bezwen fer bokou lapriyer nou bann frer ek ser Seselwa.

In ler pour nou met tou nou diferans dekote, e travay pour sa zoli Sesel, ki apel nou pei, nou patri, ki nou kontan. Sa sel Sesel ki'n bers nou depi nesans, e ki'n donn sakenn de nou en sans pour epanouir e progresse dan lavi.

Me malerezman nou pe regrese dan plas fer progresse. Annou aret fer nou pti Sesel plere, pour lanmour *de Dieu*.

Mr Speaker, problemm i vin pli grav de zour an zour, espesyalman letan ou annan

en Gouvernman ki pa ekout soufrans ki son pep pe pas atraver. Malgre Lazans Proteksyon in vin ek serten revizyon, i pa reflekte larealite aktyel.

Eski en bon *survey* ti'n ganny fer avan? Koman en pep, nou bezwen kontinyen reste solider avek kanmarad. E koman en Gouvernman responsab, ki annan konpasyon pour lezot, e konpasyon pour sa ki'n met zot la, zot bezwen a tou moman asire ki napa en Seselwa ki al dormi vant vid.

Annou pa les en katastrof devlope dan nou pei, zis akoz en dimoun i lafen. Bokou fanmir pe trimouse pou konbat pri lavi ki pe kontinyelman monte. E la mon mazin sa bann dimoun ki bezwen esper ziska 65an pou benefisyé sekirite sosyal. Sa i fermal, Mr Speaker. Malgre ki Prezidan in sey eksplike, me napa gran keksoz ki i pe fer pou amelyor sityasyon lavi Seselwa.

Ladres Leta Lanasyon, in *fail* pou donn konfor pep Seselwa lo ki Gouvernman pou fer pou adres sa size pri lavi. Ki sa ladministrasyon ti swadizan annan tou solisyon pandan zot 30an kanpanye eleksyon.

Alors Mr Speaker, dan sa Sesel avek en tel ladministrasyon o pouvwar, sa

ki annan pou reste annan. Sa ki napa, pou touzour napa. Se sa lager ki per fondater ti anmennen pou pep Seselwa. E se sa prensip ki nou parti i krwar ladan. Lazistis sosyal pou tou Seselwa benefisye.

(APPLAUSE)

HON CONRAD GABRIEL

Plis zefor i devret ganny fer pou ed Seselwa ki mwen fortinen espesyalman bann dimoun aze. Sa group dimoun i santi zot rezete apre tou sa zefor e kontribisyon ki zot in fer pou batir sa pti pei Sesel.

Mr Speaker, kritik pou touzour egziste, me nou bezwen kritik dan en fason konstruktiv, e fer li dan en fason kot pou ed pei fer plis progre. Mwan personnelman, mon krwar dan en Sesel ki annan linite e responsabilite. Mon fer bann kritik ki konstruktiv. Mon pa la pou detrir ou denigre person.

(APPLAUSE)

HON CONRAD GABRIEL

Sepandan Mr Speaker, tousala i devret komans avek Prezidan li menm, apre son VP, apre bann Minis e annou pa bliy bann endividi ki asiz lo sez *speakership* e zis tanzantan tenny mikro ede par son parti LDS...

(Interruption)

MR SPEAKER

Hold on Onorab! Onorab, ou retir sa silvouple. Ou pa kapab dir Speaker sa kalite remark.

HON CONRAD GABRIEL

Ok Mr Speaker, mon a swiv ou gidans.

Se sa Linite dan Diversite, ki nou pe rode.

O kour mon manda, mon pou esey mon mye pou inifye tou mon zabitan. Fer zot vwar ki malgre nou lopinyon diferan, me nou koman en kominote, koman imen, koman bann frer e ser, nou kapab kontinyen viv byen e ed kanmarad a tou moman.

Anmenn plis linite, progre ek prosperite pou tou dimoun. Malgre latas devan mwan i difisil, mon determinen pou fer en diferans malgre bokou lobstak. Mon bann adverser pe sey zot mye pou mwan tonbe. Me mon met tou dan lanmen Bondye tre o.

(APPLAUSE)

HON CONRAD GABRIEL

Ou ki vwar tou e ou ki konn tou.

Si Gouvernman i vreman senser, Silvouple aret fer krwar ki *US* pe sey diviz sa pep kan o kontrer se zot ki'n fer tou pou kre divizyon par senm fo propagann. Politik bon

marse in fini. Seselwa i byen entelizan e konnen ki keksoz pa fasil. Fodre sa Gouvernman i aprann ekoute. Zot prop siporter i mekontan avek serten desizyon ki pe ganny pran. E an zeneral dezapwente avek la fason pei pe ganny dirize. Pirman diktater *at its best*, Mr Speaker.

(APPLAUSE)

HON CONRAD GABRIEL

I pa drol ozordi *LDS* in perdi sipor trwakar son bann siporter. Silvouple annou aret met politik dan tou keksoz.

Ler mon observe, mwan mon dir rezon ki keksoz i koumsa ozordi i tre senp. I annan bokou lalang ki'n ganny koze pou konvenk pep Seselwa ki keksoz pe mal ganny zere anba Ladministrasyon *US*.

Par egzanp ou'n tann kof ti'n vid kan sete lefe lenpak *COVID-19* lo nou lekonomi ki ti afekte reveni pei. E non pa fason ki nou Gouvernman ti pe zer pei. Nou'n tann bokou parol lo swadizan pli bon governans ki *LDS* ti pou anmennen. Me par kont ozordi nou vwar ki latransparans in regrese dan Sesel anba sa ladministrasyon.

(APPLAUSE)

HON CONRAD GABRIEL

Prosedir *procurement* in ganny manipile, napa en bon lankadremman dan zesyon bann proze kapital. E zesyon nou Bidze pa'n *attend* son target parey nou'n vwar an 2023. E dan mon larepons Bidze mon ti fer kler serten keksoz.

Me par kont, Prezidan i dir nou, nou'n fer sirplis kan anefe target fiskal ti bezwen bese lannen pase. Sa Mr Speaker, i Leta nou Nasyon ozordi.

(APPLAUSE)

HON CONRAD GABRIEL

Sel bi Gouvernman di zour, sete zis pou ganny pouvwar an 2020 a tou pri. E dek ki zot in ganny pouvwar zot in swa kit tou keksoz parey oubyen tir bann lankadremman administrativ, otour zesyon bann Polisi ouswa program Gouvernman.

E pli enportan zot in *fail* pou adres bann size ki swadizan zot ti annan solisyon. Ankor enn fwa Mr Speaker, sanmenm ou vwar ki pou en 4enm fwa, Ladres Leta Lanasyon in *fail* pou adres problem nou pei e nou pep. Mon demande alors oli sa bann solisyon e gran promes ki zot ti fer?

Alors Mr Speaker, mon demande ki silvouple annou aret met politik dan tou

keksoz. Si parti *US* i fer en propozisyon pa zis get sa koman politik, o kontrè analize. E sa i a ed Gouvernman pran bann bon desizyon ki pou dan lentere nou pep.

Nou pa kapab pe pres linite e larmoni e an menm tan sey denigre en group aköz son lopinyon i diferan. Legzanp i annan bokou pou site. Maltrete pandan sa preski 4an in fer nou vin pli for e pli determinen ki zanmen.

(APPLAUSE)

HON CONRAD GABRIEL

I annan ki ti dir ki i pou rod nou pou maltret nou. Eski sanmenm sa linite ki Prezidan pe rode? E mon asir Lepep Seselwa ki sa 10 nou lo sa kote latab, nou pou kontinyen aport nou soutyen e aport nou kontribisyon e ed sa pep pou demaske sa bann demagozi ki sa Gouvernman pe fer.

(APPLAUSE)

HON CONRAD GABRIEL

Mon kontinyen repete, sa Gouvernman fodre i aprann ekoute e konsilte sa pep avan nou melanz nou dan keksoz ki pa konsern nou. Nou pa kapab pe pres linite e larmoni e an menm tan denigre en group aköz zot lopinyon, Mr Speaker.

Prezidan i dir letan ou pourswiv Gouvernman ou pe pourswiv ou prop lekor. Aköz Gouvernman se nou menm. Be Mr Speaker, le 3 Oktob 2006 letan ti ariv lensidan kot *Library*, i pa ti realize ki Gouvernman se nou menm.

(APPLAUSE)

HON CONRAD GABRIEL

I enportan fer remarke ki si ou pe perform e fer ou louvraz byen e pa viktimiz dimoun, Seselwa pa pou bezwen pourswiv ou. Ti pou napa rezon ou nesesite. Me ki mannyer ou pe revanze e pe pini serten endividi, Seselwa pou napa lot swa.

Sa i anmenn mwan lo sa pwen *Executive Leadership Program* ki ti deroule *UAE* resaman. Be i montre ou klerman ki zot ti senpleman bann apranti ki ti lo *learner* mannyer pou diriz en pei. Zot pran pei an 2020 e se an 2024 ki zot al aprann *executive leadership, Dubai*. Me zot o! Sa i fer riye sa.

(APPLAUSE)

HON CONRAD GABRIEL

Sanmenm ki arive ler nou apwent zis bann swadizan siporter *LDS* dan pozisyon Egzekitiv ki napa en sou leksperyans dan ladministrasyon piblik. Zot

bezwen alors al fer laklas. E deplis, ou vwar ki i annan Minis ki ni *leadership skills nor qualities* zot napa, e bokou pa'n zanmen zer en lorganizasyon. Selman zot le anvoy zot bann Egzekitiv *training* kan se zot ki pli bezwen *training* dan *leadership*.

Mon demande ki pou arive prezan ler sa bann *executive* i vin met an pratik sa ki zot in vin aprann vi ki bokou Minis i krwar zot konn tou e pa konn zot rol? Mr Speaker, Seselwa pe esper ek pasyans pou donn zot en gran konze an 2025.

(APPLAUSE)

HON CONRAD GABRIEL

Mr Speaker, koripsyon i en lot size ki pe vin de plis an pli alarman dan nou pti pei Sesel. Sesel pe pas atraver en peryod kot i annan plis koripsyon pandan zis 4an ki sa Gouvernman in o pouvwar. Legzanp i bokou pou nonmen.

Nou tann zis en sel *case* tou le zour Ankour. E pourtan, nou ti ganny dir ki ti pou annan ankor plizyer ka ki pe al Ankour byento. Sa ti an 2021 ler sa 50milyon pa ti ankor vin 100 milyon.

Ki'n arive Madanm komisyoner? Deplis, sa menm lorganizasyon ki pe *investigate* bann ka koripsyon, i napa en

kad gouvrenans Komisyoner. I napa en kad Gouvernman pou li. Komisyoner pa raport ek personn. Dan deba Bidze 2024, Komisyoner ti dir ki Oditer Zeneral ek son *financial controller* ki fer gouvrenans lo li.

Sa i montre ou Mr Speaker, Leta nou Nasyon, kot bann bon pratik gouvrenans dan Gouvernman nepli egziste. Alors si nou anvi annan rezilta lo koripsyon annou komans par adres gouvrenans ACCS.

Fodre note ki bokou larzan, mon repete kantite larzan in ganny depanse ek sa Komisyon Anti Koripsyon. Bokou proze ti'n kapab ganny fer. Mon poz sa la!

Mr Speaker, mon al lo sa proze semen ki Minis Derjaques ti pe fer. Sa i konsernan sa *3rd lane* Pointe Larue, ki pou al fini Anse Aux Pins dapre li. Sa pa pou rezourd problemm semen Pointe Larue. Nou bezwen rod solisyon *long term*.

Mr Speaker, i montre ou klerman ki i pa pe konsilte pou rod bann pli bon solisyon a lonterm. E apre nou pou bezwen rod *fire brigade* pou tenny dife. E sa i fer ki nou pei i sorti premye dan fer gaf. Gaf Mr Speaker, atraver ou pa koz lo la. *Plenty, too much*.

(APPLAUSE)

HON CONRAD GABRIEL

Solisyon ki nou ti konmans travay lo la avan 2020 sete pou premyerman fer semen *2 lane* sorti Anse Aux Pins pou al *Nageon Estate*. E dezyenman aste later Mellon e fer propozisyon pou zwen semen Anse Des Genets sorti erport e desann *Nageon Estate* e kontinyen al Anse Aux Pins, Capucins, Green Estate e Au Cap. Mon krwar Onorab Andre i konn sa byen.

Mr Speaker, i annan nou ki bliy sitan vit. Mon kapab dir ek senserite ozordi ki se Gouvernman sortan ki annan vre solisyon pou problemm pei.

(APPLAUSE)

HON CONRAD GABRIEL

Eski sa Gouvernman i oubliye letan sa pon Anse Aux Pins ti kase? Kwa ki ti fer trafik bouze pou ariv *Reef Estate*, *Green Estate* e dan Sid Mahe, sa se gras a Gouvernman avan ki ti'n agrandi semen *Capucins* dan leba sorti kot terminal bis *SPTC* e zwen ek semen *Reef Estate*. Eski nou realize Mr Speaker si sa pa ti'n ganny fer? Ki lenpak ti pou annan pou sirkilasyon trafik?

Mr Speaker, sa proze semen ki mon pe koz lo la i vremen enportan dan devlopman nou pei. En keksoz danzere ti arive dan sa peryod

gro lapli le 21 Fevriye. Se ki nou'n les transport piblik servi semen *runway* koman en *bypass* pou mont dan sid. Mr Speaker, sa i danzere.

Menm si sa semen ti pou kout en pe larzan, me i ti pou enportan ki nou fer li pou benefis pei. Si Gouvernman i antre an partenarya avek *UCPS* e konmans en konversasyon, mon konvenki ki zot ti pou donn sipor pou fer sa semen *Anse Des Genets*. An tou leka si zot pa fer li, 2025 *US* a fer.

(APPLAUSE)

HON CONRAD GABRIEL

Mr Speaker, koman en dimoun ki'n atase ek sport pli prezizeman *Basketball* pou plizyer lannen, mon santi mon tris letan mon get fason Sport pe ganny administre dan nou pei. I fer lapenn pou vwar *sportsman* bezwen al tap laport pou rod *sponsor* e mandyan pou al defann paviyon Sesel.

Eski nou senser letan nou pe rod nou premye meday *Olympic*? Kestyon pou en sanpyon. Mannyer *LDS* pe *run border* mon krwar pa. Nou pou kontinyen reve. Mon konnen pou dir i annan bokou atlet ki pe persevere e donn tou pou akonpli zot rev. Me bokou baryer e lobstak pe anpes zot al pli devan.

En Gouvernman responsab ti'n devret fer plis ki sa. Mon asir ou ki byento nou pou montre zot mannyer i diriz en pei. Nou pa ni pou bezwen al *course Dubai*.

(APPLAUSE)

HON CONRAD GABRIEL

Mr Speaker, sa Gouvernman i dan problem, gro problem. E sa i demontre klerman dan sa Diskour Leta nou Nasyon.

Mr Speaker, lakantite krim ki pe ogmante Sesel i tre alarman. Napa en zour ki pase kot ou pa tann en bate, en pike, en labi seksyel ouswa en touye. San oubliy sa lot konponan savedir aksidan fatal, swisid, disparisyon lo later, disparisyon lo lanmer, noye dan delo sale, lakaz brile, mor sibit, *etc...*

Ou a krwar nou'n tonm dan en nespes *curse* ki pa pe kit nou. I tris e alarman ler ou tann sa bann kalite nouvel lo radyo ek televizyon. Koripsyon dan lapolis pa pe ede pou konbat krim dan nou pti pei. Egzibit i perdi ouswa ganny vole.

Drog i ganny vole. *File* i perdi. Napa en lord ni en direksyon e avek sa zafer Ibou ki pe kontrol loperasyon anti-drog, keksoz pou vin pli *worse*, krwar mwan. E tou-le z-an sa Lasanble pe vot plizyer milyon pou en servis Lapolis ki'n fini

gate ek koripsyon. Oli ranforsman la demokrasi dan tousala ?

Kote ki'n al mal Mr Speaker? Par kont mon rekonnet ki i annan bokou zofisye dan lapolis, ki pe fer en bon travay.

Oli nou bann talan lazenes? Prezidan in koz lo Federasyon Foutbol ek *Basketball* me sa pa pou al pli lwen. Zis pou dir in koz lo sports. Se tou.

Comme dir sanson "*you can fool some people sometimes, but you can't fool all the people all the time*".

(APPLAUSE)

HON CONRAD GABRIEL

Mwan mon swe se ki sa lannen 2024, Egzekitiv i vin pli serye ek bann zabitan Pointe Larue pa ganny zis promes parey zot in fer avek Nageon Estate *redevelopment plan*, ki zot ti dir pe al komanse an Septanm 2023. E 6 mwan pli tar keksoz i ankor parey.

Luciana Amedee, Sylvianne Roseline, Mrs Rapide e lezot ankor pe espere apre ki zot ti'n ganny promet dan sa *meeting* piblik ki ti fer le 6 Zen 2023. Pa vin dir nou ki Semen Adela pe al konmans e pou fini dan 3 mwan, kan i ankor parey. Silvouple zabitan Pointe Larue in fatigue espere e nou'n ganny

ase ek sa Gouvernman ki napa ni en bi, ni en plan konkret pou sa pei.

(APPLAUSE)

HON CONRAD GABRIEL

Sa ladministrasyon ti sipoze vin fer pli byen, oli? Eski zot pe fer pli byen? Zis koze, *no action*. Eski nou pli byen ki nou ti ete oparavan? Larepons pou serten ki dan lopilans pou wi, me laplipar Seselwa la deor larepons i non.

(APPLAUSE)

HON CONRAD GABRIEL

Lavi i en soufrans Mr Speaker, an dot mo en martir e senpleman en kosmar. Alors, mon enplor ek Gouvernman, pran swen ek sa pep ki'n travay dir pou batir sa pei, espesyalman bann dimoun aze, akoz si ou pa fer li, lepep pou dir ou en senp keksoz *pack and go*.

(APPLAUSE)

HON CONRAD GABRIEL

Lo en lot pwen dan sa *SONA*, Prezidan in dir ki bann *teachers* i bann imen zot osi. Be Prezidan, tou travayer Sekter Piblik i bann imen. Alors akoz ou pa donn zot, zot trezyenm mwan saler plen.

(APPLAUSE)

HON CONRAD GABRIEL

I enportan note ki ou *Cabinet* pe pran tou sa ki pou zot.

(APPLAUSE)

HON CONRAD GABRIEL

Allowance palto, ledan e *you name it*. Akoz ou pa donn zot, zot *long service allowance*?

(APPLAUSE)

HON CONRAD GABRIEL

Sa ti pou retenir zot e ankouraz zot pou fer pli byen, fer en pli bon travay.

Ti annan en sistenm ki ti pe marse e *LDS* in vin deranz tou. Alors ma zis rekonfor Lepep Seselwa, par donn zot sa garanti ki en Gouvernman *US* pou redonn zot, sa bann *allowance* e zot trezyenm mwan saler antye.

(APPLAUSE)

HON CONRAD GABRIEL

Mr Speaker, mon'n profite pou fer en vizit kot lekol segonder Pointe Larue. Bokou problemn pou *deal* avek. Mon swete Minis i a vin fer en visit tre byento pou rankontre sa bann *teachers* e sey *sort out* sa bann defi ki zot pe rankontre.

Bokou *issue* Minis, ki byensir nou'n deza komans en konversasyon lo la, e ou'n

promet mwan ki ou pou vin vizit sa lenstitisyon tre byento.

Lasante Mr Speaker, ou kapab fer pli gran lopital. Me eski nou annan sa mendev kalifye pou okip bann pozisyon kle pou vreman fer marse en lopital? Fodre note ki zis 2 *scheme* ki pe ganny travay lo la pou bann travayer lasante. Nou pa kont en lopital nef, me ziska ozordi nou pa ankor vwar en analiz e en konsep sa proze ki pou zistifye en tel opsyon.

Onorab Lemiel, yer in fer resorti sa litani problem ki egziste dan sa Minister. Personnelman mon'n obzerverten defayans ki ti napa lontan dan sa lopital. Mon profite pou remersye tou sa bann travayer lasante e osi byen tou travayer dan bann servis esansyel, e swet zot en bon kouraz.

Leta nou Nasyon pe ganny *run* malisyezman. Mr Speaker, mwan letan mon regard Leta nou Nasyon mon ankoler, mon mekontan avek lafason nou pei pe ganny dirize.

I paret ler nou vin o pouvwar, nou bliye sa parol transparans telman nou lespri i vize ver fer plis larises. Sa i fer ki nou dekonekte ek sa pep ki pe trimouse de zour an zour, pou fer 2 bout zwenn.

Se sa ki mon konsider vre Leta nou Nasyon ozordi. Kot

Prezidan in senpleman mank sa sans pou demontre ek lepep ki i vreman *care* pou zot, e annan en leker pou tou Seselwa.

Sa Leta nou Nasyon par kont- Sa se Leta nou Nasyon ankor enn fwa. En Prezidan ki pa oule vreman aksepte sityasyon ki nou ladan e osi pa dan en pozisyon pou enplimant bann Polisi ouswa mezir pou adres defi nou ki nou nasyon e nou pei pe pas atraver.

Mon konsey pou li Mr Speaker, atraver ou se aret pous tou bann Egzekitiv ler zot kontra in fini. E pou dir kontra pa'n ganny renouvle par *mutual agreement*.

Ozordi Mr Speaker, si nou pran kont konbyen bann profesyonnel eksperyanse in swa forse kite oubyen in ganny pouse dan Gouvernman. Nou pa pou vwar li drol akok bokou Minister e lazans pa pe kapab perform a la oter. Sesel nepli pou tou son zanan.

(APPLAUSE)

HON CONRAD GABRIEL

Mr Speaker, avan mon konklir, i enportan note ki mon annan proze ki pe ganny anvoye depi 2021.

So, lo sa pwen i enportan fer zabitan Pointe Larue okouran ki set en zwe politik

ki pe ganny zwe tou sa letan zis akoz en kandida *US* ki la.

(APPLAUSE)

HON CONRAD GABRIEL

Lo mon kote mon dir zot *bring it on. Let the show begin.*

(APPLAUSE)

HON CONRAD GABRIEL

Mr Speaker, mwan koman Manm Elekte dan distrik Pointe Larue, mon pou kontinyen travay pou zot, san get ou kouler ou afilyasyon politik or ki ou siporte. Mon a profite pou dir ki nou'n akonpli bokou pandan sa 4an pou sekwe sa Gouvernman. Koman en Lopozisyon responsab.

(APPLAUSE)

HON CONRAD GABRIEL

nou pou kontinyen nou lalit san lafreyer. Nou la pou reprezant sa pep. E fer sir ki sa *joie de vivre* i retournen parmi nou popilasyon.

Pou sa arive se pa lot ki sa nouvo Gouvernman *US* ki kalib, kosto e kapab ki pou fer sa. E pa tro lontan, letan pe vini mon a dir zot mersi. E *US!*

ALL US MEMBERS

Sesel!

(APPLAUSE)

MR SPEAKER

Mersi Onorab. Mon bezwen koriz en pwen, dan diskour Onorab Gabriel. E sa zis akoz i konsern mwan. Mon pa enterfer dan lezot pwen, e sa son pwen lo ki Gouvernman in refiz en *private inquiry* mannyer i dir dan lensidan *CCCL*.

Mon pa konn okenn demann ki'n al kot Gouvernman. Me mon a dir poudir dan Lasanble, dan Lasanble. Dan Lasanble, *Leader* Lopozisyon ti demann pou annan en *commission of inquiry* ki mwan mon ti dir mon pa pou met lo *Order Paper*.

E mon rezon se ki en lenvestigasyon ti'n ganny anonse lo sa lensidan. E mon ti santi poudir i neserer pou les sa lenvestigasyon fer son kour. Setou, e mon koriz sa. Mersi.

Nou a pran poz la, e nou a rebran repons 11er.

(BREAK)

MR SPEAKER

Nou re pran deba e laparol prezan i pou Onorab Clifford Andre.

HON CLIFFORD ANDRE

Mersi Mr Speaker. Bonzour Mr Speaker. Bonzour Manm Onorab. Bonzour tou dimoun

ki a lekout, espesyalman zabitan Anse aux Pins.

Mr Speaker ozordi ankor enn fwa, nou vwar nou a lokasyon louvertir Lasanble pour lannen 2024, kot nou pe pas an revi lo Leta nou Nasyon Sesel.

Sa diskour ti ganny delivre par Prezidan Larepiblik Zedi le 22 Fevriye 2024. Pwen for sa diskour lo Leta nou Nasyon, se ki Sesel i bezwen annan linite pou li kapab avans devan e fer progre kontinyel, pou ki pep Seselwa i benefisyé.

Mr Speaker, ler nou koz lo linite nasyonal. Sa i vedir ki i enkli tou Seselwa, pe enport ou apartenans politik, relizyez ou menm seksyel.

Sa i montre nou, vre lentansyon Prezidan Larepiblik se pou fer Sesel vin sa pei kot tou nou zabitan i santi li ganny enkli dan bann desizyon ki Gouvernman i pran. Sa i klerman ganny demontre dan lafason ki gouvernans Sesel pe ganny fer.

Ler nou get lo serten desizyon ki ganny pran, par Gouvernman. Menm apre ki in annan konsiltasyon. Nou vwar ki Gouvernman i menm retourn lo sa menm desizyon, pou akomod dimoun ki'n met zot pwendvi devan. Menm si apre konsiltasyon zeneral in ganny fer.

Sa Mr Speaker i montre nou ki sa zenn demokrasi Sesel i an bonn sante. Ler ou annan en dirizan parey Prezidan Ramkalawan, ki'n ganny elekte demokratikman. E ki parey in dir, in osi en viktim dan serten atosite ki'n arive dan lepase, dan nou pei. E i vin devan e prezant leskiz konman Sef Deta nou pei. Menm si pa li ki'n komet sa bann sityasyon.

Dan sa konteks Mr Speaker, sa i demontre en lasazes enportan ki Prezidan i annan. E sa i montre nou, ki an 2025 se li ki devret ankor enn fwa vin nou Prezidan Elekte.

(APPLAUSE)

HON CLIFFORD ANDRE

Sesel i bezwen tou son zanfan. E i osi bezwen tou son bann dirizan, ki pou fer paviyon Sesel monte lo pli o podyonm enternasyonalman.

Ozordi ler nou get nou pei, nou tou, pe enport nou krwayans, nou touzour fyer nou paviyon e nou pei. Leta nou Nasyon e lafason ki nou pe zer nou lekonomi, i komann respe enternasyonalman dan tou kwen lemonn.

Akoz bokou ki pli gran ki nou zot pe aprann avek nou e zot osi komann nou pour nou sikse ki nou'n fer lo lasenn enternasyonal.

Ozordi Sesel i annan li en dirizan ki pare pou ekoute, ki pare pou partaz nide. Menm si sa nide, i diferan avek pou li.

Mon dir sa Mr Speaker, akoz mwan personnelman mon'n annan lopinyon, kot mon'n difere avek lopinyon ki Prezidan in annan.

Me sa pa fer ki mon pa form par sa parti, oubyen sa Gouvernman ki o pouvwar. O kontrer sa i montre nou, ki lasante kot ou annan diverzans. Lenstans – *sorry*. Lenstans kot ou annan diverzans lopinyon i pli enportan, akoz sa diverzans lopinyon i fer ki nou ekout kanmarad e nou kapab *merge* sa de kalite lopinyon. E fer ki i vin enn ki pli bon pou benefis nou pei, benefis nou kontinan, e osi benefis nou pep.

Alors Mr Speaker, letan nou pe analiz tou sa sityasyon. Nou vwar ki Sesel ozordi i en pei ki dimoun i kapab partaz son lopinyon. E nou vwar sa isi dan sa Lasanble kot *Leader* Lopozisyon e lezot Manm nou met nou pwen devan. Me i osi enportan letan nou pe met nou pwen devan, nou met li avek serten nivo respe pou sa lofis e sa dimoun ki nou pe adrese.

Akoz mwan, si mon pou fer sorti en pwen. Mon pou dir sa Onorab ki'n fer sorti sa pwen. Sa lot Onorab ki'n fer

sorti sa lot pwen. Mon pa pou zanmen dir li par son non.

Me definitivman mon bezwen dir Onorab entel, me mon pa pou zanmen dir li par son non, tousel. Me mon pour adres li avek en nivo respe. Menm si mon pa dakor avek sa ki i pe dir, oubyen mwan mon lopinyon i diferan.

Sa Mr Speaker, i demontre ki Sesel ozordi nou annan en serten nivo tolerans e *openness*. Kot dimoun i kapab dir son lopinyon ouvertman. Nou pep i kapab dir son lopinyon, me si nou asize dan en kwen, nou toultan dir ki keksoz pe ganny mal fer.

Letan nou dir en Gouvernman pe mal fer, nou bezwen ofer en alternativ. Ki pou montre ki sa dimoun pe fer en kontribisyon konstruktiv anver devlopman son pei.

Mr Speaker, akoz sa alternativ ki pou montre poudir ou pa pe zis kritike me ou kritik i enn ki konstruktiv. Mwan mon'n toultan dir, ki si mon pou dir en keksoz ou fer en kritik ki mon krwar i mal. Dan sa konteks mon poudir, ki mannyer mwan mon krwar ki i kapab ganny fer pli byen.

Prezan serten lotorite pou vwar si zot anvi pran mon lopinyon. Oubyen zot anvi reste avek sa lopinyon ki li i anvi.

Me *tout an disan* sa Mr Speaker, demokrasi i en *two-way street*. I annan kote gos e i annan kote dwat. Ler i dir i al kote gos, nou, nou bezwen al kote gos. Si mwan mon santi mon bezwen al kote dwat, me mazorite i dir zot oule al kote gos. Mon pa kapab dir pou ki mon lopinyon pa'n ganny respekte. Mon'n met mon lopinyon devan, e mazorite si i santi ki sa lot lopinyon i annan plis merit. Alors les sa merit arive e mwan koman en dimoun ki dan en pei demokratik, mon bezwen osi al anver sa direksyon.

Me selman parey mon'n dir, sa pa pou anpes mwan manifeste mon lopinyon. Pa pou anpes mwan manifeste an ka i en vot, kot mon vot i kapab diferan avek lezot. Se sa vre demokrasi vivan, Mr Speaker.

Mr Speaker, nou'n vwar ki bokou in ganny fer dan sa pei ler nou get Sesel 3an de sela. Nou lekonomi in amelyore, nou bann lenfrastriktir pe ganny amelyore. Akoz nou bann lenfrastriktir ki swa i sportif, ki swa i lezot e zot ti'n tonm an rin. Zot ti'n tonm an rin akoz i pa ti pe ganny mentenir, parey i ti sipoze ganny mentenir.

Ou konnen si ou'n aste en loto ozordi Mr Speaker e ou pa fer *service* lo sa loto, parey

in dir ou fodre fer, *service*. Ou loto pou ganny difikilte e i pour kit ou ater. Akoz sa loto i pou annan bann problem ki vin avek. E sa i an rezilta ki ou pa'n fer sa *service*.

Sa i parey pou bann lenfrastriktir sportif ki nou annan, ki bokou i an rin ozordi. Eski ti neserer pou nou les li tonm an rin?

Akoz nou fer bann mentenans lo la apropriye, pou ki zot kapab ganny sa lenstans kot zot kapab fer sa bann aktivite ki ti sipoze ganny fer dan sa bann landrwa.

Alors Mr Speaker, avek sa Gouvernman e letan nou pe get Leta nou Nasyon, nou annan bokou pou dir lo bann letablisman sportif. E parey mon'n dir ki an rin. Me i an rin akoz? I an rin akoz 3an, 3an i annan zis 3an Mr Speaker sa Gouvernman i o pouvwar. E dan 3an i enposib pou ou fer bann groser batiman ki nou annan, tonm an rin.

Sa bann sityasyon, nou'n erite. E alors nou pou fer li nou devwar pou asire ki mentenans lo sa bann batiman, ou lenfrastriktir i ganny fer byen *comme il faut*.

O kontrer nou, nou'n vini pou nou montre ki mannyer nou kapab fer li pli byen. Kan si nou pe gete, keksoz ki nou ganny dan sa 3an, i bokou plis ki nou ti pe espekte.

En Lopital La Digue. Nou'n ganny detrwà bann blok apartman dan diferan distrik. Menm si Anse aux Pins, nou'n ganny zis 6. Me selman nou'n gannyen.

E dapre Bidze ki'n pase pou lannen 2024, *upper Caryole* nou pou ganny nou apepre 32-36-unit. E parey mon'n dir mon ti a swete ki lotorite letan i fer en blok devlopman dan en distrik. I fer sir i get sa distrik avan e i *solve* problem lakaz sa distrik.

Ozordi ki mannyer nou pe gete avek diskisyon ek devlopman dan Sekter Lakaz lozman. Nou vwar ki i annan diferan program ki'n ganny met an plas.

E sa bann program Mr Speaker, sitwayen a diferan nivo. Depandan lo zot kapasite e zot travay ki zot fer, pou zot kapab ganny sa bann lakaz.

Alors sa dimoun ki li i santi i tonm dan en kategori, i enportan ki i fer lenvestisman pou li kapab fer sir i ganny son lozman parey i sipoze. E ki i pe pas atraver.

Alors Mr Speaker. Se sa en Gouvernman responsab ki annan son pep aker. Kot i annan linite nasyonal, kot i gete ki mannyer i pou fer son pep benefisye pou ki a kapab vwar sa bann benefis e lenvestisman a lonterm. Pour ki zot a kapab fer sir ki zot annan serten proze ki ganny

met an plas pou zot benefisye ek zot fanmir, zot zanfan e zot menm a lonterm.

Mr Speaker, i annan bokou ki'n esper pour bokou letan. I annan ki'n esper pour plis ki 25an. E i annan ki'n esper. *Sorry* - i annan ki'n esper pour 25an me ozordi nou vwar avek sa akselerasyon ki annan bokou plis dimoun pe benefisye en lozman e a en pri afordab, menm si zot santi zot bezwen peye. Sa i en *long term investment*.

Sa i enportan aköz en lakaz i tre enportan, ki zot fer sir zot fer zot repeyman byen e atan. E lo en baz regilye. Aköz se zot ki'n rode, e si sa lenvestisman zot pa pe gard sa lenvestisman i pou tonbe. Alors i enportan ki zot fer sir ki zot gard sa e zot ki vwar sa benefis ki sa i anmennen pou zot.

Mr Speaker, lasante. Lasante i en domenn kot ozordi i annan bokou defi dan lemonn antye. Kolera, i annan malarya i annan bokou, bokou lepidemi oubyen lezot kalite sityasyon lasante ki pe monte dan lemonn.

I enportan ki okenn dokiman oubyen okenn lagreman, parey nou'n vwar. Ki nou Gouvernman i pou sinyen avek bann lorganizasyon enternasyonal.

Wi letan i vin kot nou Lasanble, nou, nou pour fer sir ki nou pas lo la e nou pou deside si nou pou ratifye ou non.

Me selman i enportan avan nou sinyen, si i kapab vin a la porte pep Seselwa, oubyen a la porte bann ki reprezant pep Seselwa. Pour ki nou ava kapab gete e nou kapab osi donn bann pwennvi avek Gouvernman, Minister Lasante, Minister Zafer Etranze – Minister Zafer Etranzer. Pour zot kapab anmenn sa, en pe pli devan e eksprim konsern pep Seselwa an zeneral lo sa bann Lagreman Lasante.

Alors Mr Speaker, mon dir sa lo sa prenmis ki nou kontinyelman annan konsiltasyon avek nou dimoun. Alors nou bezwen kontinyen fer sir ki okenn dokiman i ganny fer an bonn fwa e ki zot a kapab fer li marse.

Ankor en fwa Mr Speaker, nou annan bokou bann fasilite lasante ki zot dan bann kondisyon deplorab. Sa i pa aköz nou Gouvernman ki'n met zot dan sa bann kondisyon deplorab. Zot dan sa bann kondisyon deplorab pou bokou lannen. Mon kapab donn ou en legzanp tipik. E sa se Klinik Lasante Anse aux Pins. I demann en *complete renovation*.

Ti annan en letan ki nou bann zabitan Anse aux Pins ti ganny dir ki nou pour annan en lot lopital lo Ile Soleil.

Mr Speaker, sa osi ti a bon ki nou ganny met o kler. E ki zistans e ki devlopman, ki pozisyon nou lo la dan sa domenn? Aköz mwan mon pou demann avek Gouvernman ozordi, pou annou annan sa bann dyalog, ki ava tir dimoun dan bann lenstans kot zot annan dout. E kot okenn propagann ki'n ganny senmen par lezot parti politik i ganny pran koman laverite.

Alors si nou met lenformasyon deor e nou permet dimoun pou demann lenformasyon. Alors nou pou kapab ganny sa lenformasyon ki neser. Aköz Seselwa i lafen pou lenformasyon. E zot lafen pou lenformasyon aköz zot konnen ki avek lenformasyon zot kapab al bokou pli lwen. E osi fer zot kontribisyon dan sa bann sektor kot i neser.

Mr Speaker, mon ti a demande ki nou ganny en vizit kot Klinik Anse aux Pins, pou vwar en pti pe. Nou vwar sa letan Gouvernman ti'n fek ganny elekte, Minis Lasante ti vizit ansanm avek mwan. Mon santi nou bezwen ganny en *update* lo kote nou ete dan sa konteks. Pour nou kapab fer sir nou bann travayer lasante,

zot santi pour ki zot konsern pe ganny pran an konsiderasyon.

E ki nou, nou pe fer tou sa ki nou kapab pou nou fer sir ki zot kondisyon i ganny amelyore. E ki zot osi santi ki zot kapab delivre sa servis ki Minister Lasante pe demann zot pour delivre avek bann pasyan.

Mr Speaker, i annan en konsern ki vin a mon latansyon lo lafason serten Sanmdi, oubyen serten tim ki travay i donn latizann dyabet, dan Sanmdi.

Mon ti a demann Minister pou get enn pti pe lo ki modalite. Akoz i annan dimoun ki zot vwar zot pa kapab vin dan lasemenn, alors zot sel fason oubyen zour ki disponib pou sa kondisyon. Me zot travay e sel zour ki disponib pou zot se Sanmdi.

Alors sey gete ki kapab ganny fer pour adres sa problem. Mon pa krwar i bokou dimoun ki vin dan Sanmdi. Me selman detrwa ki'n al delivre sa servis avek zot. Pour zot fer sir zot osi zot ganny zot latizann e ki zot kapab okip zot lekor pou fer sir zot ganny sa remed ki nesesser.

Mr Speaker, Leta en Nasyon, i kapab ganny kalkile atraver lasante son pep. Ozordi letan nou pe get Sesel, mazorite nou pep i an bonn sante.

Wi nou annan defi. Parey dan lemond antye. Alors nou bezwen gete ki mannyer nou *tackle* sa bann defi. E i enportan ki nou reste azour avek bann latizann, azour avek bann tretman ki annan dan lemond.

E alors nou bezwen form par en lorganizasyon ki li i adres tou sa bann zafer e sa se *WHO*. Alors nou bezwen fer sir ki nou get zot bann Lagreman e ki nou get zot bann langazman ki zot met nou ladan, ki zot anvi nou zwenn zot ladan.

E nou fer sir ki zot osi zot de lot kote fer sir ki nou annan sa kapasite e sa lasistans ki sa lorganizasyon i kapab ofer pou bann pti pei Leta Zil, Mr Speaker.

Sa i anmenn mwan ankor en fwa pou nou bouz lo sa laspe sanzman klimatik. Semenn pase mon ti dan en *meeting* parey ou konnen, parey Lasanble i konnen, en *meeting* *OACPS-EU*, sa ti Angola.

Enn bann topik ki ti sorti for. for menm dan groupman rezyonal, se sanzman klimatik. Tou bann *regional groupings*, i pou bezwen met lo zot azanda oubyen lo zot bann *bureaus* *respective*, ki mannyer nou apel li. I pou fer li lo azanda *Joint Parliamentary Meetings* pou

annan topik sanzman klimatik.

Mwan personelman, mon'n soulev en groupman Pti Leta Zil dan OACPS. Mon'n demande ki nou kapab annan bann *side meetings*, ler nou fer bann *JPA (Joint Parliamentary Assembly)*. Ou bann *regional meetings* kot nou a kapab regroup bann Pti Leta Zil, ki zot konsern i komen. E komen dan le sans zot bann viktim sanzman klimatik. E sa bann fon ki pe ganny met an plas, pou fer rekiperasyon i ava permet sa bann Pti Leta Zil pou ganny akse avek.

En pwen ki mon'n fer resorti, se fer akse avek sa bann fon vin pli fasil. Kot sa bann kondisyon pou ganny larzan i ava enn ki baze lo sa bann sitasyon koze par sanzman klimatik. Me non-pa enn ki pou get devlopman ki sa pei pe fer. Sityasyon koman en viktim sanzman klimatik, pa merit pran kont lafason ki ou pe fer ekonomikman.

Akoz nou pti Sesel nou pe fer tre byen ekonomikman. Alors nou pa devret ganny pini pour sa, ler i vin lo akse pou reabilitasyon koman en viktim. Nou ti osi diskit lo bann topik lo *food security, sustainable development*. E osi lefe ki sanksyon i annan lo bann Pti Leta Zil, ki parfwa napa naryen pou fer avek sa bann sityasyon ki pe koz lager

dan lemonn ozordi. Nou'n koz lo devlopman kapasite pour sa bann Pti Leta Zil.

En bann defi ki nou'n diskite, se transfer teknolozi. Mr Speaker, nou'n vwar ki enternasyonalman teknolozi pou *deal* avek *renewable energy* i enn ki tre ser.

E ki son transfer sorti kot i ganny devlope, i fer li plito pa abordab ler i vin kot bann Pti Leta Zil. Akoz nou annan sa bann resours natirel. Me nou napa larzan pou fer sa bann resours ganny transfer an lenerzi.

Ler nou get lo *fossil fuel*, nou vwar ki enternasyonalman i annan en demann pou redwir depandans lo *fossil fuel*. Akoz i ganny konsidere koman enn bann kontribiter ki pe koz deplisyon *ozone*. E an rezilta koz sanzman klimatik, ki pe afekte Sesel an gran parti.

Mr Speaker, nou vwar ki resaman nou'n bezwen servi akse erport akote *runway*, pou trafik kapab sirkile an montan Pte Larue. Sa i demontre nou ki sa travay *third lane*, ki pou osi fer provizyon pou drenaz apropiye. Ki pou redwir nivo delo lo semen, i enn ki tre enportan.

Akoz avek sa devlopman semen, nou pou vwar ki nou pou kapab pli byen mannye sa bann kalite sityasyon dan lefitir.

Mr Speaker, la enn bann laspe ki mon krwar Sesel i bezwen met devan, pour - si i pou ganny akse ek sa bann fon reabilitasyon. Akoz sa bann sityasyon pa ti la avan e pe komans fer son laparasyon sa bann dernyen letan, an rezilta sanzman klimatik.

Koman en pei, nou bezwen kontinyelman abord sa bann size ler bann loportinite i prezant son lekor. Akoz se sa ki pou fer kominote enternasyonal apresye nou pozisyon. E pou vwar nou merit.

E finalman mon demande ki nou demann koman en pti pei i ganny akorde. Sa groupman lo nivo OACPS - EU kot Sesel, ava pran sa *lead e chairmanship*, pou asire ki lentere bann zil i ganny met devan. Nou pe ganny sipor nou frer *Maurice*, kot bann kalamite sanzman klimatik pe ariv pli souvan. *Madagascar* e nou frer *Samoa* i osi abor avek ensi ki bokou Leta Karaib e Pasifik i form par sa groupman.

I nesese ki nou rekonnet ki sa Gouvernman LDS, anba direksyon Prezidan Ramkalawan. I en Gouvernman ki rod solisyon e pou rod fason pour ki sa bann solisyon i ganny enplimante. Se sa rezon ki desizyon ti ganny pran an konsiltasyon pou fer trafik servi erport pou

al dan sid. Si nou pa ti en Gouvernman solisyon, nou ti pou kit dimoun espere ziska delo ti desan e sa ti pou kree fristrasyon.

Nou pou fer sir ki nou rezourd problem. Me non pa azout plis. LDS i reste en parti relevan e en parti ki pa perfe. Me i reste pozitiv e an 2025 nou pour montre zot progre ki nou'n fer. Akoz Prezidan Ramkalawan pou *score* plis ki an 2020. E LDS pou pran tou le 26 distrik dan sa Lasanble Nasyonal.

(APPLAUSE)

HON CLIFFORD ANDRE

Lanplwa. En lot pwen ki enportan fer resorti, se lanplwa. Ozordi nou pei i annan kantite travayer etranze. Menm dan bann sekter, kot i pa nesese *skill labor*.

Ler nou get dan domenn konstriksyon, sekirite, nou vwar bokou etranze. An menm tan nou vwar bokou nou zenn pa pe travay, ou zot pa anvi travay.

Traver etranze i tir bokou deviz dan nou pei, e sa ti kapab reste isi e fer nou lekonomi vin pli for. Si nou bann zenn ki annan lafors pour donner, zot ti donn nou en koudmen pou fer Sesel monte e reste anler lo nivo

travayer Seselwa dan sa bann sekter.

Nou vwar ozordi lo en baz tou le semenn, ki lavertisman travay i ganny fer. E nou koman bann *MNA*, nou ganny sa lenformasyon. E i ganny transmet dan diferan group e bann endividi ki pe rod travay.

Sa i demontre proaktivite nou Gouvernman, pou asire ki lenformasyon i ganny transmet e i ariv kot bann kliyan ki bezwen sa bann servis.

Minister Lanplwa i reste disponib pou asiste dimoun dan zot demars. Wi Mr Speaker, nou annan defi. E sa bann defi fodre ganny rezoud. Akoz dimoun i reste fristre ler zot ganny fer tourn an ron, san en solisyon, ou menm en repons negativ.

Nou bezwen responsabiliz nou pep Mr Speaker. En fason se fer travay disponib pou zot. Kot zot ava annan en langazman e ki zot ava osi pe ganny en reveni, enkli ki zot ava pe kontribye dan nou lekonomi e pli enportan sorti lo lasistans *welfare*.

Mon dir avek tou ki pe rod en travay pou pa vin tro selektif. Akoz tou travay i annan son valer e tou travay i kontribye dan lekonomi san eksepsyon.

Mr Speaker, sa i fer mwan prezan vin en pe lo mon

distrik Anse Aux Pins. Mon oule avan tou, remersye tou zabitan ki kontinyelman donn zot sipor pou nou fer sir ki menm avek serten defi nou distrik i kontinyen bouze.

I vre ki i parfwa pa bouz sitan vit parey nou anvi. Me nou tou, si nou donn en koudmen, nou pou al tre lwen. Nou pe rebran nou bann aktivite *mass sport* tre byento.

Mon pou demann ankor enn fwa avek Minister Lanvironnman ek Transpor pour get sa de semen Anse aux Pins. Enn kot nou dir semen Uranie. Sa bann zabitan pe demande depi byen lontan, ki sa kondisyon i ganny amelyore.

Mon'n personnelman vizit avek sa de lotorite, me naryen pa'n ganny fer. Sak fwa lapli i tonbe e delo i monte, konplent i mont lo *Facebook*. Mwan mon dir avek zabitan sa landrwa, 'sa semen pou ganny aranze'. I fer zis 3an ki Gouvernman Prezidan Ramkalawan i o pouvwar. E nou donn zot garanti ki sa pou ganny fer, ki zot osi zot ava parey kot bann Monthy, Pillay zis akote zot.

Dan sa konteks, mon pou lans en lapel ankor enn fwa avek Prezidan pou li vin avek Minis Transport ek Lanvironnman. Ler i posibil, pou get sityasyon sa bann dimoun e deblok sa blokaz si i

annan. Akoz sa bann zabitan i fristre e osi anver tou sa bann departman konsernen.

Sa sityasyon i osi ganny *echo* pou semen ki nou dir kot Asba, Nadessin an montan Bodanmyen, kot bann Payet Dan Kreson.

Mr Speaker, mon'n mont laba 2 ou 3 fwa e mon konpran parfetman zot soufrans. Sa bann semen Mr Speaker, mon demande sak fwa mon reponn Bidze ek Leta Lanasyon. Mon pe enplor ki sa bann sityasyon ava ganny rezourd tre byento, pour ki ler lapli i tonbe zabitan ki napa transpor ava ganny soulaze. E ki zot ava o mwen antre kot zot pa anbou me posibleman mouye.

Anse Faure, i reste en lot defi Mr Speaker. Drenaz bezwen ganny fer pli byen. Akoz delo i kontinyen devid kot dimoun e andomaz zot bann meb e propriyete personnel.

Bokou dimoun dan sa rezyon in fini donn *wayleave* pou agrandi sa semen. Me naryen pa ankor ganny fer. Mon enplor lotorite ki mon an kontak avek, *SLTA*. E zot in donn mwan garanti ki premye kar lannen 2024, zot pou rezourd sa bann problem. Alors mon oule dir avek zabitan Anse Faure, ki byento tou pou ganny rezourd e mon pou gard en koudey pros lo devlopman.

MR SPEAKER

30 minit Onorab. In pase. Konklir, silvouple.

HON CLIFFORD ANDRE

Mr Speaker, nou dir mersi ki serten semen in ganny *resurface*. Sa in ede, tre byen. Me i reste ankor pou fer.

An montan Caryole, parmi lezot, kondisyon nou semen i demann revwar. Mon pou sa semenn ou semenn prosen fer en vizit avek lotorite lo sa bann semen, avek bi fer zot ganny mete lo lalis priyorite.

Netwayaz bann kominote fodre fer pli efikaman, *desilting* i bezwen ganny kontinyelman fer.

An terminan Mr Speaker, mon oule dir ki bokou in ganny fer par *LDS* dan 3an. Wi, nou annan bokou pou fer. Me nou pe fer anmezir ki resours i permet.

Wi zot fristre, me zwenn ek nou pou fer ou rev vin en realite. Analiz nou performans konparab avek kot kondisyon ti ete 3an pase. E mon sir ou pou vwar progre ki'n ganny fer e ki pou kontinyen ganny fer.

Mersi e viv *LDS!* Viv Sesel! E mon dir ou 2025 *LDS* Sesel, Prezidan Ramkalawan *State House* e *LDS* dan Lasanble Nasyonal! Mersi.

(APPLAUSE)

MR SPEAKER

Mersi Onorab. Laparol i prezan pour Onorab Doyace Porice.

HON DOYACE PORICE

Mersi Mr Speaker. Mr Speaker, tou mon bann koleg MNAs, tou Lepep Seselwa espesyalman zabitan distrik Baie Saint Anne. Bonzour.

Mr Speaker, mon remersye nou Bondye Papa, ki toultan dan mon kote par donn mwan kouraz, lafors pou travay. E anmenn dan mwan, sa determinasyon pou kontinyen travay dir pou Sesel. Espesyalman mon distrik Baie Saint Anne Praslin, ki mon kontan bokou.

E mon osi remersi mon fanmir pou konpran mwan, mon labsans avek zot, letan mon pe travay lo zil.

Mr Speaker, Onorab Gill i bliye ki son prop Ladministrasyon, enkli son Prezidan *SPUP*, *SPPF*, Lepep e la *US*. Ki ti sabotaz zot prop pep Seselwa e pei Sesel ek nou pa ek nou.

(APPLAUSE)

HON DOYACE PORICE

Si zot pa ti fer sa Lasose Baie Saint Anne ti a fini konstri, byen lontan. Zot pa ti ava les pye sed ranpli, lo sa pti langar ki zot ti fer zis pou bous lizye

sa zabitan Baie Saint Anne e negliz sa distrik.

E ozordi Onorab Gill in kapab ganny kouraz pou maltret nou Prezidan. E dir ki i pe sabotaz son prop pep. I manz son bannann apre i anvoy lapo lo nou Prezidan.

(APPLAUSE)

HON DOYACE PORICE

Vre par ler nou pa konnen ki nou'n vin rabase, dan sa Lasanble. Zis fer dimoun riy nou.

Mr Speaker Diskour Leta Lanasyon fer par nou Prezidan Wavel John Charles Ramkalawan sa lannen 2024. I enn ki vremen enteresan, kot in anmenn plis lazwa dan nou pep.

Plis ki ler i ti pran pei an 2020. Kot ti annan bokou dezord ek lanmertim anver nou pep Seselwa. Leta Lanasyon 2024 in annan bokou ladiferans, bokou determinasyon pou kapab re-amelyor bokou defi ki ti'n perdi valer dan nou pep, dan nou pti pei Sesel.

Mr Speaker, Prezidan Wavel Ramkalawan avek son Ladministrasyon, in fer plizyer konsiltasyon avek plizyer lazans e lorganizasyon konsernen ki dan Sesel e osi aletranze. Menm si i annan pa'n vwar sa ditou. Pou kapab rod solisyon, pou fer sa

transformasyon anver fason fer nou travayer dan Sekter Piblik.

Zot in rod solisyon pou re-batir serten lenfrastruktir ki ti'n tonm an rin, zis parey fasilite sport. Lo nivo nasyonal e osi dan distrik. E plizyer ankor menm si pa ankor fini. Degree ti annan mon manman, pa ti kapab gete!

Bann batiman Ladministrasyon dan bokou distrik. Plizyer proze ki ti'n zis lo papye, ouswa ti'n komanse plis ki 10an pase. E pa'n fini par Ladministrasyon oparavan, bann iresponsab. E la ozordi, zot pe met tou lo Ladministrasyon LDS.

Ladministrasyon LDS, in re-anmenn sa *joie de vivre*, dan tou son laspe pozitivite. Seselwa in reganny son liberte lekspresyon, kot zot in perdi pou plis ki 40an.

I fer mwan mazin mon distrik Baie St Anne. Koman en zabitan sa zil, mon santi mwan tre ankouraze par sa ki'n ganny fer, sa ki pe kontinyen fer e sa ki pou ganny fer byento ziska 2030.

Mr Speaker, wi i annan bokou ankor pou fer. Me pandan sa 3an i pa'n fasil, pour sa Ladministrasyon LDS fer tou en sel kou. Apre tou, sa ki nou'n pas ladan zis parey, pandemik COVID-19, lager aletranze, movetan, dan serten distrik, ki'n koz

lerozyon. E la le 7 Desanm nou'n trouv ankor pour nou menm. E pa bliye sa *famous* leksplozyon CCCL, ki'n koz plis domaz pour sa Ladministrasyon ki o pouvwar. Me non pa bonm, Onorab Lemiel. I paret mwan bonm i grave dan lespri parti minoriter.

(APPLAUSE)

HON DOYACE PORICE

Dousman, dousman, pti pa, pti pa parey sanson dir, sa nouvo Ladministrasyon pou fer li. Menm si parti minoriter i pran tou keksoz negativ, konmsi zot ti pou fer pli byen.

Mr Speaker, US i bliye tou sa bann larzan ek sa bann later vole ki zot Ladministrasyon in vann. Zot ti kapab ede zot osi! Tousala zot pa dir Lepep Seselwa. Sa ki apel sabotaz son pep.

Apre zot a dir Gouvernman pran son responsabilite. San realize Mr Speaker, ki Gouvernman se nou menm ki pe viv dan sa pei Sesel. Nou form par sa Gouvernman, zot pe maltret zot prop lekor e sa pep.

Sa Lopozisyon minoriter i koz lavi ser. Wi Mr Speaker, lavi i ser. Menm lo mon zil i ser. Mon aksepte sa. Me kan ki Sesel in deza bonmarse? Kot tou keksoz nou enporte, ki i par bato ouswa par avyon.

I pa kout bonmarse, pou fer vini marsandiz. Sesel pa prodwir nanryen apard ki lagrikiltir. E Lopoziyon minoriter i konn sa tre byen Mr Speaker.

(APPLAUSE)

HON DOYACE PORICE

Akoz ozordi zot pe bat latet sa pep, e fer konmsi zot pa konn nanryen. An tou ka zis zot pti minoriter, ki pou krwar dan zot.

Ladan menm zot dir serten fanmir i lafen, pa konnen ki mannyer pou met en bout avek en lot. Be Onorab Gill ou pa konn ou son distrik. Ou pa konnen ki pe pase, fodre ou mars pli souvan, lizour e osi aswar. E i ava vwar vremen dimoun ki lafen. E osi ou a vwar lakantite letablisman touristik ki vremen aktiv e ranpli ek touris. Pe *enjoy* lo nou zil, apre nou dir napa touris.

Mr Speaker, ler ti annan larzan zot pa ti enterese pou met dan pos Seselwa. Zot ti mazin zis zot menm. Lanmod ansyen defen zot Prezidan Parti, fodre nou fer lepep e zot menm mazin tousala.

Gaspiyaz, an partazan antre zot. Ouver plizyer biznes, fer bann gro, gro sato. Aste gro, gro transport. E menm zot zanfan anba laz, ti resevwar tousala. Sa ki apel

labi lo *taxpayers money*, dan Leta nou Nasyon, dan ansyen Ladministrasyon ki ti o pouvwar, avan 2020. San realize Lepep Seselwa ti pe note e deside pou zet zot dan Lopoziyon ozordi.

Mr Speaker, i pa'n fasil ditou pour sa Ladministrasyon pandan sa 3an. Me avek zot krwayans solid e determinen pou defet tou sa ki dan zot semen e met satan akote, ouswa zet anba. Se sa fason ki zanfan Bondye i travay.

Alor mon sipliy ek Lepep Seselwa, pour annou fer parey. Met diferans ater, met Bondye premye, ekout son garson ek son bann disip ki akote li. Annou ini ansanm, pour ki nou pei Sesel i avanse.

Ede pou rod solisyon pou nenport kwa ki vin devan nou. Kontinyen met zot konfyans dan sa nouvo Ladministrasyon. Aret ekout bann mansonz, kalonmni ki bann fouter dezord i dir. Zis parey Lopoziyon minoriter e osi lezot nanryen fer dan sa pei Sesel.

Si Lopoziyon minoriter i fran avek zot lekor, vin devan sa pep. E vin dir vremen ki zot kapab fer. Sirtou bann ki annan sertifika Dokter, Ners, ansenyan, spor, mekanisyan, sorselri, kaptenn, e plizyer degree parey zot dir.

Vin devan sa pep, anmenn zot kontribisyon zot osi. Pa zis asiz deor e zis kritike, san fer nanryen. Ki mannyer Seselwa i kapab annan konfyans dan zot? Pa les sa bann sertifika ganny manze ek kankrela dan larmwar.

Si vreman zot krwar dan linite, parey zot non i apel *United* Sesel. Alor sivre zot non, e silvouple komans sa pa, e anmenn sa *united* anver sa nouvo Ladministrasyon ek son Lepep.

(APPLAUSE)

HON DOYACE PORICE

Mr Speaker. Zot bon zis maltret nou Prezidan, zis aköz zot pa kontan li. Ouswa zot voras pouvwar. Wi, zalouzri i prodwi laenn. Aköz zot pa ti espekte ki sa Mr Wavel Ramkalawan ti pou mont *State House* e vin Prezidan Sesel ozordi.

(APPLAUSE)

HON DOYACE PORICE

Mr Speaker. Mwan Doyace Porice koman en Manm Proporsyonnel. Mon pe *challenge*, mon Manm Elekte pou Baie Saint Anne Onorab Gill ek son lekip, pou vin devan e dir avek zabitan Baie Saint Anne Praslin e osi Lepep Seselwa sa ladiferans ki annan

anplis dan sa distrik, ki li in vwar. Ant avan 2020 e ozordi le 28 Fevriye 2024.

(APPLAUSE)

HON DOYACE PORICE

Vin fran. Pa per pour donn en *plus*. Mon dir ankor pour donn en *plus*, nou nouvo Ladministrasyon avek son Manm Proporsyonnel.

Pour mwan, i napa nanryen mal si vreman nou vwar kler pandan sa 3an. Menm si Onorab Gill pou dir ki zot Ladministrasyon ki ti komanse, ouswa ti dan plan.

Wi Mr Speaker ti la. Me zis lo papye e lekritir *black and white* pe dormi dan lapousyer. Zis parey en poul ki esey kouv lo son prop dizef, ki'n deza pouri, e krwar i pou eklo. Me non! I pa pou zanmen eklo, fodre i real ponn sa ki nef, la i a kapab eklo. Zis parey sa nouvo Ladministrasyon in fer, netway lapousyer, rod solisyon, pou met anmars travay. E nou dir zot. Mersi pour sa.

Sa Ladministrasyon in vwar ki sa distrik in ganny neglize bokou dan lepase. Ozordi distrik Baie Saint Anne in vreman sanze par sa nouvo, par bann nouvo proze. Tel ki *fitness trail*, en *court beach volleyball*, ki bokou zenn i apresye.

Ki mwan! Onorab Porice in donn tou son letan ladan, ek mon lekip volontarya, sipor materyo ek *sponsors*. E pou sa nou dir zot mersi.

Nouvo Lasose Ero, nouvo *roundabout* ek son zoli pye palm ladan. Nouvo bazar avek son 10 *gear shop*, pou bann peser, nouvo *ice plant*. *Rock armoring* Anse Marie-Louise, lenfrastruktir lo Ile Eve. Nouvo fason fer bann *bin shelter*, semen segonder.

Leklersi semen par koup bann pye dibwa danzere, nouvo *crash barrier*. Zoli sirfas semen Consolation, nouvo proze lalimyer lo semen. Tousala nou bezwen *remind* nou zabitan e Lepep Seselwa ki sa ladministrasyon i serye.

(APPLAUSE)

HON DOYACE PORICE

Bann proze ki pe kontinyen fer pou Baie Saint Anne Praslin. I renovasyon Ladministrasyon Distrik, nouvo Stasyon Teste Transport, *SPTC* Depo, kontinyasyon semen Pasquere. Nouvo sirfas semen Baie Saint Anne, apre ki *PUC* in fini pas tiyo.

Kontinyasyon semen Salazie. Lezot pti semen segonder, renovasyon Lopital Praslin ki baze Baie Saint Anne.

Bus shelters, lakaz, *land bank*, *condominium*. Dezyenm

faz distribisyon later Ile Eve. Tousala Mr Speaker pe arive lo mon zil, pou zis 3an. Zabitan i vreman kontan. E menm bann biznesmenn pe kontinyen anmenn zot kontribisyon anver sa nouvo Ladministrasyon.

Nou annan bann biznesmenn ki'n menm pare pou travay an partenarya ek Gouvernman pour annan plis devlopman e laklerte dan nou distrik. E pour sa, nou remersye zot bokou. Ki Bondye i kontinyen protez zot biznes.

Mon pe sipliy ek tou zabitan, Manm Elekte pou Baie Saint Anne, pou vin devan, anmenn zot sipor, sa linite anver sa Ladministrasyon. E pou nou kapab fer sa transformasyon pou nou distrik e nou zil. Non pa pou okenn parti politik, ou larelizyon, ou endividi. Oubyen pou nou menm personnel.

Dan lavi, dan nou pti Sesel nou bezwen kontinyen rod sa solisyon, fer transformasyon radikal, pou byennet nou pep.

Mr Speaker, zis parey nou vwar Prezidan ek son lekip kot pe vin dan distrik pou fer sir ki travay pe ganny fer. E fer sir ki nou *taxpayers money* pa ganny gaspiye.

Sa nouvo Ladministrasyon pa asiz dan zot biro, zot lofis e donn lord.

Me zot bouz partou, pour ki Seselwa i ganny en bon servis. Mwan osi koman en Manm Lasanble. Mon fer sir ki mon visit zabitan, mon ekout zot byen zantiman. Anmenn zot pwen, zot pwennvi devan, e osi travay pre avek bann lazans Gouvernman,

Ladministrasyon Distrik, bann lakonpanyen prive.

Mon pa asize esper zot vin kot mwan. E se sa fason ki mwan mon travay. Mon sirkile partou mwan ek mon *clerk* Ina Esparon. E osi serten mon bann fanm aktivis ki vreman determinen, zis parey Julianne ek Lina.

Lo kote plizyer logmantasyon dan *welfare*. Plis larzan pou bann etidyan ki al post segonder lo Mahe. Plis larzan, pour donn manman ki pe al ganny baba Mahe. Bann paran ki adopte zanfan. E la Mr Speaker, mon dir ek zabitan ki si zot dan problem, pou aziste en bout avek en lot bout, e zot *still* dan problem. Pa ezite pou koste zot zofisye *welfare* e anmenn zot dokiman nesese, pou zot kapab ganny en lasistans.

Me mon pou osi demann zot pou pa abize, apresye sa ki zot gannyen e osi konn dir mersi.

Mr Speaker, en lapel ki mon anvi pas avek zabitan Baie Saint Anne ki annan later prive. Pour silvouple vin

devan, pou ede avek elarzisman semen e fer osi bann nouvo pti semen segonder. Parey nou konnen ki sa nouvo Ladministrasyon i anvi ed nou. Pour nou ariv pli pre ek nou lakaz. Me nou problem se *wayleave*.

Bann ki annan later annou mazin nou pti zabitan la ater, ki fatigue mars en long zistans. E la mon mazin Man-Jeanne ek son fanmir e lezot ankor ki reste byen lwen ek *main road*. Zis parey semen Anse La Blague.

Sa bann propriyeter i bezwen mazine ki Gouvernman pe esey son mye pou donn zot osi meyer semen pou zot transpor.

Mr Speaker, mon pe sipliye aköz Baie Saint Anne Praslin i annan bokou sa problem. Me se sa ki mon pe lans lapel ek propriyeter prive, pou vin devan. Aköz zot osi zot pou benefisye.

Zis parey nou kontan en bon e zoli lili pou dormi lo la, i kout bokou Mr Speaker. E nou bezwen annan larzan pou aste, oubyen apros en sarpantye pou fer li. Nou'n gannyen, nou bezwen pran swen avek, kit li prop. Zis parey nou'n ganny nou zoli Por, ki pe akey bokou bato. Toultan i reste plen, nou bezwen gard li prop e reste zoli. E osi gard li an bonn per familyal. Zis parey nou

granmoun in toultan dir, lanmod, Mr Luc Grandcourt.

Alor nou bezwen larzan, pou ganny diferan materyo pou kit li an bon kondisyon. Sa kontribisyon i bezwen sorti kot nou, ki servi sa lasose. Annou pa mazin negativ ler nou Gouvernman i dir nou bezwen kontribye, pou amelyor nou lenfrastruktir.

Kot i konsern bann gro biznes ki annan plizyer biznes lo zil. Mon pou enplor avek zot, pou vin devan, pou ed nou bann lekip sportif e *sportsmen* lo Praslin. Kot nou tou nou konnen ki si ozordi sport oubyen lenfrastruktir sport, in gate oubyen napa sipor pour *sportsmen*. I gras a sa Ladministrasyon ki ti o pouvwar pou 43an.

Zot in neglig sa bann zenn, pran tou larzan met dan zot pos e bliye ki *sportsmen* i bezwen larzan. Ladministrasyon *sport* pa kapab fer tou. E nou lo zil, nou demann bokou, pou nou spor. Vi ki nou annan plizyer sport ki aktiv, bann klib i bezwen pran zot responsabilite pou rod sipor.

Pa les politisyen fer zot krwar ki Gouvernman i bezwen fer tou pou zot. Kan li sa politisyen i pa pe kontribye naryen. Mr Speaker parey zot konnen osi, ki nou *sportsmen* Pralinwaz e Pralinwa i fer

bokou pli byen ki lo Mahe. E nou anvi ki zot fer plis ankor.

E nou konnen osi ki spor i ede pour zenn sorti dan bann lenfliyans negativ la deor. Ler mon get *judoka*, karateka, *volleyball*, naze, spor lo delo. I vremen aktiv avek bokou zenn, sirtou zanfan lekol.

E nou annan bann fanm ek zonm solid. Ki vin devan, pou siport sa bann zenn. La mon mazin Miss Brigitte ek Calix Cesar, Germain Rose, Anto Suzette, Sir Sony Athanase ek son madanm, Sir James. E mwan, mon travay vremen pros avek zot. E mon pou demann ek lorganizasyon spor, e sa Ladministrasyon pou get a profon sa bann fanm ek zonm ki pe donn tou zot kouraz pou spor.

Akoz drog ek lalkol, sirtou drog ki nou'n nouvo Ladministrasyon ansanm avek Gouvernman, pe lager for lo la. E la mon pe siplyi avek bann trafiker, ouswa bann vander lo nou zil. Pou aret fer nou zenn soufer, ouswa perdi zot lavi tre zenn. E nou paran osi pe soufer.

Bokou zabitan in koz avek mwan lo la, Mr Speaker. Lavi pa fasil e annou pa fer li vin pli difisil, pou nou zanfan e osi paran. Nou konnen ki parfwa nou bezwen konn nou priyorite dan nou lavi, lo ki fason nou bezwen atak li.

Me mazin byen, pa viz ver nenport kwa ki nou trouve zis parey sa parti minoriter pe esey anbet nou.

Mr Speaker pa tou zenn ki parey. Mon konnen ki bokou zot pe fer zot mye, pou ariv kot zot ti a kontan arive. E la mon pou dir zot pou kontinyen sa bon zefor pou zot demen pare pou pran nou plas pou diriz sa pti pei Sesel.

Mwan mon en fanm ki'n toultan kontan travay avek zenn. Touzour pare pou siport zot, me parfwa i annan ki pa fasil pou travay avek. Me mwan mon montre zot ki mon la pou siport zot, me non pa pou detri zot.

Bann zenn mon distrik i konn sa byen. Sirtou bann ki dan spor, lekol, kot mon toultan la pou rod solisyon pou amelyor zot fasilite. E osi dan lezot lorganizasyon, ki anmenn zenn.

E la Mr Speaker mon pe koz lo lorganizasyon *Scout*. Ki fek fer zot selebrasyon lo Praslin, zot *Founders Day Ceremony*. En program 3 erdtan, *council* ek bann lezot *leaders* ti onor bann ki'n re-anmenn *scout* dan Sesel.

Ankor e osi bann nouvo zanfan lo Praslin ti ganny onore ek zot skarf ek *badge*. Kot mon ti vreman pas en bon letan, e sa osi mon pare pou donn sipor. Akoz i en

lorganizasyon ki anmenn nou zanfan e zenn dan en bon semen.

E la mon pou dir mersi Miss Maryline Marie, ki pe kordin sa aktivite tre byen. Mersi pou sa travay nob ki pe fer pou nou zenn ek zanfan, lo Praslin. E mon dir mersi osi pou sa bann paran ek bann *sponsors*.

Mr Speaker tou letan sa nouvo Ladministrasyon i balans Bidze pei. Me ki nou vwar apre nou kontinyen dwa. Zis parey sa enn ek Larisi, ki Ladministrasyon oparavan in andet sa pti pei Sesel.

Nou ti a kontan konnen. Konbyen ankor nou dwa? Bann det fer par sa, ansyen Ladministrasyon, kot zot ti pros pou vann Sesel. Si sa nouvo Ladministrasyon, pa ti ariv a tan.

(APPLAUSE)

HON DOYACE PORICE

Zis parey nou Prezidan dan son Diskour Leta Lanasyon ti dir avek nou, 'ler nou pe sey ferm en sapit, me nou vwar en lot i antre.' Tousala se Ladministrasyon, ki bezwen sibir sa kou.

Alor nou osi sa pep, nou bezwen ede vwar ki fason nou pey sa bann det. Parey *TRNUC*, ki li osi i en det, ki mwan mon krwar ki ansyen Ladministrasyon, ki'n fer zot

galimatya e ki zot devret pe peye. Se sa ki nou Leta Lanasyon ti ete. Me Ladministrasyon LDS pou fer zot mye. E zot pa pou zanmen les son pep e pei Sesel tonbe.

Mr Speaker apre perdi enn nou ser, zanmi, koleg, Ners Onorab Rosie Bistoquet, ki'n vreman tous nou tou dan nou lafanmir LDS.

Me Bondye in redonn nou sa kouraz pou kontinyen. Ozordi la fanmir LDS in akey sa zoli fiy sorti dan mon distrik Baie Saint Anne Praslin dan nou Lasanble.

E sa se pa lot ki Onorab Anne Bistoquet.

(APPLAUSE)

HON DOYACE PORICE

Yes. Yes, nou *welcome* ou lebra ouver. *Just too bad* sa ki pa kontan!

Pou terminen Mr Speaker, Leta Lanasyon pe vreman bouze. E pe anmenn sa bon fri pou nou pep manze.

E sa bon delo lafresisan ki nou tou nou koz lo la toulezour pou bwar, pou kit nou an bonn sante

Nou pa bliy osi nou bann Ners, Dokter, dantis, ek son bann lezot travayer, dan nou Lopital Praslin. Ki zot osi ede kit nou an bonn sante e nou dir zot mersi.

Pou nou annan lafors ek kouraz nou kontinyen - pour

nou kontinyen travay dir, pou fer sa pei Sesel avanse dan transparan, linite avek tou parti kolektiv.

Me mon pou demann serten travayer dan Lopital Praslin. Pou pa fer lavi zabitan difisil, rod solisyon dan plas dir napa e fer zabitan fristre.

Sesel i pour tou Seselwa, nenport ki kouler ki ou ete, nenport ki larelizyon ki ou ete. Alor annou atrap lanmen ansanm e nou a fer en diferans. Sirtou dan mon distrik Baie Saint Anne, ki annan bann zoli zabitan. E ki mon kontan zot bokou, e mon pou touzour dan zot kote.

Zabitan Baie Saint Anne in dir, 'LDS 2025'. *sorry* Onorab Gill. Ki Bondye i vers disan son garson lo Prezidan ek son nouvo Ladministrasyon pour tou zabitan lo nou zil Praslin. E Lepep Seselwa ki ou reste Sesel, ou aletranze nou pa pour zanmen les tonbe nou pei. *LDS 2025!*

(APPLAUSE)

HON DOYACE PORICE

Mersi Mr Speaker.

MR SPEAKER

Mersi Onorab. Bon prosen entervenans laparol i pour Onorab Rocky Uranie.

(APPLAUSE)

HON ROCKY URANIE

Mersi. Mersi bokou Mr Speaker. Bonzour tou koleg Onorab. Bonzour tou zabitan Zil Pros ki a lekout.

Mr Speaker, i enkrwayab ler mon tann, atraver ou, Onorab Doyace Porice koz koumsa. I ti enn ki ti ganny berse anba lezel *SPPF*. E in osi enn, in osi enn ki'n kontinyelman ganny larzan envalidite kantmenm i ti'n vin *MNA*.

Mon swete i pran legzanp sa mer poul e i ponn en dizef nef pou rann sa larzan.

(APPLAUSE)

HON ROCKY URANIE

Mr Speaker, i fer katriyenm diskour Leta Lanasyon Sesel ki ganny fer dan setyenm Lasanble. Kot ankor en fwa, napa gran keksoz ki nou pep Seselwa in kapab vreman dir zot santi zot soulaze e zot in ganny ekoute.

En *SONA* ki napa bokou sibstans. I enn ki siperfisyel e fann fannen en pe partou, partou. E pa senser.

Pou konmanse, Prezidan in dir fodre nou en pep ki annan linite, rekonsilyasyon antre nou. Ki en keksoz ki nou dan *United Seychelles*, nou totalman dakor. Akoz pep i bezwen ini pou kapab travay byen ansanm e fer pei bouz de lavan. An prenon kont, tou

bann sanzman dinamik ki en pei i fer fas avek.

In osi dir ki fodre napa diskriminasyon. Mars dan menm direksyon avek bann prensip inik.

Mon bann zanmi, son parol pa senser. Akoz se li menm e son lekip avan ti vin o pouvwar, ti deza pe senm diskord, diskriminasyon anver plizyer dimoun. Sirtou ler i tir fer son bann kanpanny politik. Maltret dimoun lo *Facebook* e dekrir zot tou sord fason.

Avek en kanpanny bat latet, i ti vin o pouvwar Oktob 2020. E premye keksoz i ti fer, sete diskriminasyon. Viktimizasyon e vanzans pour plizyer dimoun dan zot travay. Sirtou bann ki pa siport li.

I pa renouvle kontra plizyer nou bann siporter *United Seychelles*. Osi pous bann teknisyen profesyonnel ki kapab travay serye e drwat, senpleman akoz zot pa oule fer bann demagozi ki zot ganny dir fer.

Sa lespri vanzans in anzandre dan son leker e pe kontinyen rod tou fason pou sey frenm nou parti *United Seychelles*. Seselwa in dir zot in fer sanzman ki pli tar in vin transformasyon.

Me napa okenn bon lorganizasyon, ki keksoz in vin pli pir ki avan. E bokou pe dir plito *United Seychelles*. E

2025, napa lot opsyon, en sel opsyon se *United Seychelles*.

(APPLAUSE)

HON ROCKY URANIE

Pou ganny respe Mr Speaker, ou bezwen montre respe. Alors apre tou sa martir e difikilte ki ou fer en manman e son zanfan, sa papa, sa teknisyen profesyonnel. Ler ou'n vin o pouvwar, ou'n kree lanmertim. Apre ou espekte dimoun krwar ou senser, ler ou pe koz lo linite. E fodre napa diskriminasyon.

Zis get sa demaraz isi menm dan Lasanble ki manner nou'n konmanse. Menm en dimoun fou pa pou krwar dan ou.

Ler Ladministrasyon pa kapab delivre e ganny bokou difikilte, aköz tro bokou lenterferans. E bann Minister pe ganny *micromanage* par Prezidan li menm, zot blanm sa travayer *civil servant* e pe dir fer sabotaz, trenn lipye.

Kan *leadership* li menm anler, bokou problem. Mank *leadership skills*. Li i pa fer *training*. I plito ekout tapaz loto *Formula 1, Abu Dhabi*.

(laughter)

HON ROCKY URANIE

Si ou vwar en problem koup pye dibwa Beau Vallon, en Prezidan ki bezwen al gete li

menm. Problem lanmar, Prezidan al gete li menm. Problem semen, Prezidan al gete li menm. *Toilet Lopital Baie Ste Anne*, Prezidan i bezwen al gete li menm. Be ki dil?

Be sa les bann Minis dil avek. Zot annan en gro problem dezorganizasyon e mank konfyans antre zot, ler ou vwar keksoz pe deroul dan sa fason.

(APPLAUSE)

HON ROCKY URANIE

Sanmenm ou vwar Seselwa i dan gro problem ozordi. En bann kantite desizyon ki zot fer, pran a la lezer. Ler i *backfire*, zot fer demi tour e zot dir zot ekout Seselwa.

Be ler Seselwa pe kriye la deor e pe dir Sesel nou en pei nonnalinyen, nou zanmi ek tou e lennmi personn. Aköz ou pa ekoute e tir nou Sesel dan sa atosite ki pe deroule laba dan *Red Sea*.

La ou zwe sourd aköz tapaz *Formula 1* i ankor dan ou zorey.

(APPLAUSE)

HON ROCKY URANIE

Nou zis swete ki nou pa vwar nou dan en pli gro problem aköz sa bann kalite desizyon iresponsab.

Bann sinyatir ki ou pe met lo sa bann dokiman enternasyonal, parey sa enn *WHO*, nou pep pa kontan. Eski ou pe ekoute ? Larepons i non.

Aprè ou a vin la devan medya, ou ava dir ou en Gouvernman ki ekoute. Devan sa menm medya ki ou fek pe dir ek dimoun pa tro krwar ladan. Pa tro krwar dan *SBC*. Pa tro krwar dan *Facebook*. Pa krwar dan bann lezot form medya. Konmsi krwar zis dan ou.

Si ou ti *Pinocchio*, ou nennen ti pou'n bokou pli long.

(APPLAUSE)

HON ROCKY URANIE

Akoz ou fer nou krwar ki zis ou ki kapab koz laverite? Selman tou sa mansonz ki ou'n koze, ler ou'n ganny debiste, ou a dir zanmen ou'n dir sa bann keksoz, kantmenm...

MR SPEAKER

Mon'n deza fer en remark. Veye ki mannyer zot servi bann mo mansonz, lalang. Akoz. Akoz mon pa oule okenn Dirizan, ni Manm Lasanble, ganny ensilte personnelman ki zot lalang oubyen ki zot koz mansonz.

Si ou krwar. Onorab Pillay, mon pe koze! Si ou krwar i annan keksoz ki ou pa

dakor avek, ou donn ou pwennvi. Ou dir ki mannyer ou vwar e ou les li koumsa. Mersi.

HON ROCKY URANIE

Mersi. Bon. Kantmenm i annan *video* lo rikord ki montre ki i pe dir sa bann keksoz. Parey ler i ti dir i pou ferm *ACCS*. Aprè i dir zanmen in dir sa, kantmenm i annan li lo rikord.

I ti dir i pou ferm Program *Methadone*. Met sa ban boug lo en zil. Les zot malad. Nou ava donn zot latizann. Aprè i dir zanmen in dir sa. Tousala i lo rikord. Me zot, ki mannyer nou apele sa, lekonomi laverite? Akoz si mon dir lalang, mon pou dan problem.

(APPLAUSE)

HON ROCKY URANIE

Pye dibwa ti'n fini konmans ganny koupe Beau Vallon, e ou dir napa en pye dibwa ki'n ganny koupe. Si mon kontinyen avek tou sa mansonz ki ou'n dir, enn aprè lot...

MR SPEAKER

Onorab, ou pa'n tann mwan?

(Interruption)

MR SPEAKER

Ou pa'n tann mwan? Mon pe dir ou silvouple, reviz ou parol, si ou le kontinyen fer ou diskour. Mersi.

HON ROCKY URANIE

Bon, mon a rebran. Pye dibwa ti'n fini ganny koupe Beau Vallon, e ou ti dir napa en pye dibwa ki'n ganny koupe. Si mon kontinyen sa lekonomi laverite ki ou'n fer, ou pou kas rikord dan *Guinness Book*.

(APPLAUSE)

HON ROCKY URANIE

Fransman sa lannen ki la, mon ti krwar i pou sa *SONA* ki mon ti pou dir wi, Prezidan in delivre sibstans, keksoz pour Seselwa.

Me plito ou'n zwe en zwe lespri, ki ou pe sey servi serten zoli parol pou reganny en pe konpasyon sa Seselwa la deor, ki vremen fristre e anmer avek ou e ou Ladministrasyon.

Be sa bann dimoun ordiner in zis fatigue avek sa kalite lavi fermal ki zot pe viv.

Ekout zot e tir zot fristrasyon, akoz ou osi ou annan fristrasyon. Ler ou vin fer krwar tou keksoz i *ok*, ou bann prop Manm Parlman, atraver ou Mr Speaker. Onorab Labonte, Onorab Desheila, Onorab Andre e lezot, i vin nonm enn lalis problem, ki kre fristrasyon.

(APPLAUSE)

HON ROCKY URANIE

Be zot pa fer *meeting*? Zot pa fer *meeting* ek zot *MNA* pou konn en pe ki problem ki annan la deor. Gro problem dan kan. I mank konsiltasyon antre zot menm.

Seselwa i ankor pe esper ou, pou fer sa kou lavi desann parey ou ti promet. Me la ou'n sanz zistwar. E ou Minis Hassan ti dir ki pri lavi pa zanmen desann. Sa i lenvansyon par politisyen.

Be lekel sa politisyen? Se pa lot ki li menm Prezidan Wavel Ramkalawan, ki ti pe fer kanpanya pri lavi pou desann, ler i vin o pouvwar.

Atraver ou Mr Speaker, *LDS* ti menm anmenn en Mosyon sa letan atraver Onorab Gervais Henri, Deputy Speaker, pou fer pri lavi desann. Be ki kalite dekoneksyon i annan dan kan, si Minis i dir pa desann e ou, ou dir pri lavi i desann?

La ler in ler pou *walk the talk*, Prezidan i sanz *tune* e met blanm lo sityasyon enternasyonal pour pri lavi. Ki dan lepase i pa ti oule okenn Gouvernman i dir sa kalite parol. I ti dir ki i responsabilite Gouvernman pou fer pri lavi desann e vin stab.

Dan plas zis fer letour La Digue dan *club car* ek en pti group ki ganny tou privez, ki

pe rod zis zot gannyen. Ekout *MNA* Elekte ki met *sore* e soufrans Digwa devan dan Lasanble. E fer en keksoz pou fer desann kou lavi lo Zil Pros e Sesel an zeneral.

STC ki sipoze pe anpar Seselwa avek bann pri afordab, in vin byen ser. Akoz li osi in vin dan biznes fer gro profi, 66milyon lo latet nou bann malere.

Sa i montre ki i pa'n vremen anpar Seselwa. Akoz in bezwen fer sa ta profi, sa ta milyon, e sant laglwar ler deor dimoun pe kriy lasasen akoz keksoz i ser? I ti'n kapab anpar nou malere e fer en profi bokou pli ba ki sa.

En madanm i sorti laboutik ek en pti sak, i pe get son resi e konpar avek konmisyon ki dan son sak. Pe rode oli R1000 konmisyon? I koz tousel sitan for, san realize lezot dimoun pe tann li. Degre i annan presyon ek fristrasyon kou komodite. Ki i en keksoz ki fermal lo li.

Pour sa fristrasyon, se *STC* atraver zot bann move desizyon e fason administre ki'n fer kou lavi mont bokou pli o. Kestyon ki bokou pe poze se ki vre rol e manda *STC*? Ki kalite *middleman* ou a dir mwan i annan parmi *middleman*?

Sa zafer kou-d-lavi lo mon zil, sa i ras ker Mr Speaker. E sa ki mon pe dir,

Digwa i partaz menm santiman. Kot lavi lo mon pti zil La Digue i tro o. E la pe vin pli ser ek sa bann *port fees* ki'n ganny enplimante.

Bann bato *cargo* pou napa swa me pou fer monte zot pri *cargo*, e sa i anmenn en lefe *domino*, kot enn i afekte lot. Ki vedir bann boutikye pou bezwen pey *cargo* pli ser. E alors pou kapab ede retir zot larzan, zot pri komodite pou bezwen monte. E a lafen dizour, se nou konsonmater Digwa ki ganny vremen afekte.

Mwan mon krwar, anvi ki i annan sa 2 bato *cargo*. *Ahroha* ek *Seraphina* ki vremen anmenn manze lo zil La Digue, sa Gouvernman i devret donn zot plis ki 50poursan konsesyon lo *fuel*. An fezan sa, fer en letid *at least* 6 mwan. Gete ki kantite pri komodite i desann.

Oubyen, pa fer zot pey ditou *fuel* pour en serten letan, ki zot operater a determinen ansanm ek lotorite dan diskisyon. E gete ki mannyer sa i fer en lenpak lo pri komodite. Anvi ki zot in dir Gouvernman in fer sirplis pour lannen 2023.

En letid i enportan, ki *at least* demen, Gouvernman i ava annan fe pou vwar si zis boutikye ki fer monte pri akoz zot anvi. Oubyen i akoz kou transportasyon? Ouswa akoz lezot faktor ki pe fer sa lenpak?

Sa i pa apel politik popilis, ni politik bon marse. Akoz apartir sa bann letid, pli bon konsiltasyon e negosyasyon i a ganny fer pou stabiliz en pri rezonnab bann komodite lo La Digue.

Gouvernman i bezwen annan en plan konkret dan limedya e lobligasyon pou fer pri komodite desann. Sa i ava tir presyon finansyel ki komodite e lezot servis i pran lo nou dimoun. Si zot pa kapab fer li, 2025 *United Seychelles* pou fer li.

(APPLAUSE)

HON ROCKY URANIE

Pa bezwen per pou pran nou lide, akoz i pou anmenn benefis pour nou tou.

Lasante. Wi nou'n ganny en lopital nef, e nou bezwen servi. Mon ti'n deza dir avan ki lopital pa vedir zis gro batiman nef. Me konpri plizyer lezot eleman e servis pou li fonksyonn byen. E donn kliyan, pasyan sa swen e servis ki neser.

Travayer lasante, dokter, ners, asistan, spesyalis. Bann *support staff* parey *cleaners*, tou leres i bezwen santi zot fyer e konfortab pou travay dan en lanvironnman ki *safe*. E en lanvironnman ki motiv zot pou zot ganny sa kouraz, pou zot kapab travay byen. E

fer sistenm lasante vin lo en nivo tre profesyonnel.

Me ki nou vwar? Problenm i ankor la. Lopital pa *state of the art* parey nou'n ganny fer krwar. Me i sel lopital Gouvernman ki nou bezwen servi.

Mankman latizann. Spesyalis ki ankor vizit rar. Dokter ki maltret pasyan. Ni menm dokter ki pa oule tous pasyan. Dokter ki menm ensilte pasyan verbalman. Pa mwan ki pe envante. Se sa ki pas atraver sa bann kalite keksoz, ki vin met zot konplent e plenny zot sor avek mwan.

X-ray ki pa ankor kapab marse ziska prezan. Bann *Ward* ki ki napa en lafnet pou ler sirkile. E menm pou lader soley antre. Konsep en lopital ki pa reflekte ditou sa ki kiltir ki nou annan.

Ward, en sel laport antre e sorti. E si kouran i koupe, konpletman fernwanr. E tou pasyan i bezwen ganny trennen anba lavarang pou tay lasaler, akoz napa sirkilasyon ler ki antre. En sistenm ki vreman kapab fer nenport pasyan anmas lenfeksyon.

I vre nou bezwen modernize. Nou senserman krwar ki bokou keksoz pa'n ganny pran an konsiderasyon. Pli kliyan i al rod servis medikal kot Lopital Saint Mary, pli zot dezapwente.

Pa tou keksoz ki nou bezwen tay avek. Nou bezwen aprann ekoute e reflesir. I vremen enportan avan ler nou fer serten devlopman. Tou distrik i annan zot *logo* e *motto*. E pour La Digue, nou *motto* i '*avançons lentement, mais surement*'. Pa vitman ek problemn.

(APPLAUSE)

HON ROCKY URANIE

Ti annan en rezon pour sa *motto*, akoz nou pa kapab fer tro bokou devlopman en sel kou. E osi fer sa bann devlopman tro vit, akoz nou zil i annan serten *charme* ki nou bezwen garde.

Sityasyon kot Lopital Sesel i pli pir ankor. Parfwa mon demann mon lekòr si sa boug i al vizit lopital, e konn vre sityasyon? Tro bokou problemn pou dir.

Zis parey ler ou fer en zabitan La Digue vin Mahe, depans i ganny fer. Ler i pe asize lo ban, lanmenm ler ki ou dir li *MRI* pa bon, pran bato tourn La Digue.

Prezidan pa'n vremen dir gran keksoz lo sityasyon sistenm lasante Sesel. E ki bann desizyon ki son Ladministrasyon pe pran pou rezourd problemn kot Lopital Sesel?

I bezwen reget bann klinik ki pasyan, kliyan, i

kapab ganny sa bon servis e swen neserer, kot lasante i konsernen. Larzan i devret ganny met plis kote i annan problemn, pou kapab ede rezourd bann konsern ki annan.

Me zot plito pran e fer bann ekstravagans parey monte desann aletranze dan *First Class*. Saroy bann gro delegasyon pou fer *course leadership* dan laklas, *UAE*.

Epi demann *MNA* pou fer *fundraising* dan distrik kot nou bann sitwayen ordiner pe ganny difikilte pou fer de bout zwenn, pou tir sa pti mwensa avek zot.

Mr Speaker, Anse Source D'Argent avek Anse Severe ti ganny nonmen. Wi, Mr Speaker, i vre ki sanzman klima i fer serten destriksyon dan serten landrwa plis ki en lot.

Mr Speaker, Anse Severe sityasyon i drastikman sanze. Lerozyon lakot in agrave en sel kou an gran. Lans in preski fini ale, e lanmer i mont lo semen. Bann pti antreprenner pou perdi zot pti *kiosk*, ki donn zot e zot fanmir zot ganny pen toulezour.

Touris lipye i pri dan rasin akoz i pa konnen ki par anba sa pti bout lans kot i pe debout, anba la in fini degrade. E la, zot lipye i anfans dan trou akoz par anba i vid. Sa pa bezwen personn dir

mwan, akoz mon'n al vwar pour mwan menm.

Si nanryen pa ganny fer o pli vit posibil, bann transpor, touris, Digwa ki reste apre Anse Severe pou ganny difikilte ariv se zot ler lanmer i plen. Sa problemn i bezwen ganny adrese o pli vit posibil.

Nou lanvironnman i reste nou responsabilite pou protez li e fer sir ki nou anbelir li, gard li prop pou atir viziter e garanti en lanvironnman soutenab pou benefis nou zanfand e nou pei.

An dizan sa, i enportan alors pou Gouvernman kontinyen donn kontra bann pti kontrakter netwayaz, pou zot kontinyen angaz zot dan sa bann netwayaz, parey; lans, lanmar, drenaz e semen.

Anvi ki nouvo *tender* pou reouver an Mars, mon ti ava enplor avek Gouvernman pou asire ki bann lanmar e drenaz ki pa ti lo lalis *tender*, i ganny mete lo la, pou asire ki nou lanmar e drenaz, apard lezot landrwa, i ganny netwaye e reste prop.

Ki fer mon dir sa? Akoz i annan sa zafer *one off* ki pe ganny fer kot i konsern bann drenaz. E sa i donn letan salte e delo sal kontaminen, pou anvoy loder. Epi vilenn dan lizye Digwa e viziter.

Alors en kontra netwayaz i ava garanti ki sa bann drenaz i reste prop e zot pa bloke, ki

apre zis *excavator* ki pou bezwen mele pou tir debri salte, later, disab ki'n akimile ladan.

Plizyer bann Digwa, sirtou zenn, i kapab partisip dan bann prosedir *tender*. E si zot gannyen zot ava pe kontribye zot par dan lepanouisman nou pti zil La Digue e nou pei Sesel. Sesel nou'n toultan en sanpyon dan proteksyon lanvironnman anba Gouvernman *SPPF*, Parti Lepep e *United Seychelles*.

(APPLAUSE)

HON ROCKY URANIE

E alors, i enportan ki *LDS* i donn sa garanti ki zot pou kontinyen travay pou protez nou lanvironnman e gard li sa nivo ki fer nou premye lo lasenn enternasyonal. Parey ti leka anba Gouvernman *SPPF*, Parti Lepep e *United Seychelles*.

Sa Sesel, nou Sesel ki nou'n kree pandan 43an, in toultan ganny rekonnnet konman en model lo nivo mondyal. Kantmenm ozordi zot pe sant laglwar, apre ki zot in fer krwar ki nou ti en kalis kase. Selman zot pe travay lo nou model.

I vre ki isi lo kote nou latab *United Seychelles*, nou koze. Nou koz en kantite. Nou koz sa ki vre, sa ki laverite e sa ki fer sans.

(APPLAUSE)

HON ROCKY URANIE

Annou get sport dan Sesel. Sport i konmans o nivo distrik, ki apre nou kapab ganny bann bon *sportsmen* ek *sport lady* pou partisip dan nasyonal tim e reprezant nou pei Sesel.

Pour sa kapab arive, nou bezwen annan bann ankadrer e osi bann fasilite sportif a dispozisyon nou bann atlet. Apre plizyer vizit par diferan komite. Komite lo komite La Digue, e bann rekomandasyon ki'n ganny fer, nou'n vwar ziska prezan napa bokou ki'n ganny fer.

Sirtou, ler Minis pour Sport ek son delegasyon isi menm dan sa Lasanble, ti donn nou lasirans ki bann aktivite sportif, *match* futbol lokal, bann *match league* pou rekonmans ganny zve apartir Septanm lannen pase 2023 lo *Sport Complex*, La Digue.

A plizyer repriz mon'n abord sa size. Me sa Minis lo koze, 100 lo 100. Aksyon, zero.

(APPLAUSE)

HON ROCKY URANIE

Kan eski zot pou fer sa ki zot ti dir zot pou fer avek laplenn futbol La Digue? Kan eski nou bann paran La Digue pou kapab vwar zot bann zanfan pe taye dan *Inter Islands*

School Athletics, ki ti anmenn lazwa, sourir lo figur nou zabitan. Akoz sa, ti ganny konte konman en gran levennman nou zil. Anvi ki tou bann gran aktivite sportif i pas Mahe.

Pa bliye ki nou'n prodwi atlet dan *volleyball*, petank, naze. Parey atlet tre renonmen Ivan Moise ki ti anmenn 2 Meday Lor dan dernyen Zwe De Zil. Vanita Rose, Nayeli Etienne. Meday Bronz dan petank, Armstrong Jean. Sa zis pou nonm enn de.

An se moman nou annan zenn, Tiphano Uranie pe partisip dan atletik aletranze, e pe fer tre byen. Alors aret dezapwent Digwa. Si zot santi zot pa kapab delivre, sorti, demisyonnen. E si zot napa kouraz pou fer li, 2025 pa lwen. Nou pou met zot deor.

(APPLAUSE)

HON ROCKY URANIE

United Seychelles ti'n fini garanti larzan pour proze *sewage*. E la LDS in vin o pouvwar, zot in pran sa proze, zot pe fer. Nou bezwen en *proper* sistenm *sewage* pou anpese ki nou *water table*, nou later pa sitan ganny kontaminen.

Mon problemm i fer sir ki sa sistenm i ganny *maintain* lo en nivo tre o, pou asire ki loder

pa *disturb* nou pti zil. E nou pa vwar refoulman desarz partou.

Pou fer *sewage*, zot in bezwen kas nou bann semen. E sa in kree e pe kree gran lenkonvenyans pour nou zabitan.

Larzan i annan pou al touy sat ek lera Aldabra. En ta larzan, en ta milyon. £25milyon, pou touy sat ek lera Aldabra. Silvouple Gouvernman, pou fer semen La Digue, i kout anviron R35 a R37milyon. Serye zot.

Pran *at least* £2.5milyon dan sa ta larzan ki zot pe al touy sat ek lera. E sa i a tonm zis bon pou rekonstri en meyer semen pour nou. La ki zot pe larg *club car*, alors bann *club car* i a kapab pas lo bann bon semen ki pa'n andomaze.

Sityasyon drog in vin pli pir. Mon pa konnen ki kantite *warning* ki *drug dealer* i bezwen ganny *warning*, avan zot ganny dil avek. Prezidan nek i donn *warning* lo *warning*. *Warning* parti *warning*.

Pas zot letan tay deryer sa de pti viktim sibstans. Kas zot lakaz, kraz zot *TV*, savir kastrol manze, grenn tou louvers, met fizi dan kwen latet. Kit en lavalas dezord dan lakaz. Fer dominer. Selman kot bann gro *drug dealer*, zot pa ale.

Wi Mr Prezidan, ou ti dir nou ou'n fer konversasyon

avek bann *drug dealer*, ki vedir ou konn zot. Eski ou konversasyon avan eleksyon, pou ou ganny finansman kanpany? Akoz ki ou'n tir portre avek serten?

Ou bezwen annan en lalis. Al rod zot e dil ek zot, si vre ou anvi dil avek *drug dealers*.

(APPLAUSE)

HON ROCKY URANIE

Oubyen sa ti zis zoli parol e kontinyen fer sa tim tay avek sa bann viktim sibstans, teroriz zot fanmir, zot lakour, zot paran e kominote, pou kre lafreyer.

La rapor *TRNUC* ti'n fer kler ki Leta i bezwen demann pardon. Wi, ou'n napa swa Mr Prezidan. Ou'n bezwen fer li akoz ou ki lo latet Leta. E nenport ki, ki ti la ti pou bezwen fer sa, si rapor ti'n dir li fer.

Dan rapor ti osi annan lalis *perpetrators*. Sa enn ou kasyet, akoz ou'n vwar ki lo la pe enplik bann dimoun ki siport ou. Fer nou Lasanble ganny sa lalis ki form par sa rapor konplet *TRNUC*, nou ava vwar latransparans e laverite ki ou'n koz lo la. Ki ou pe kasyet?

(APPLAUSE)

HON ROCKY URANIE

Ledikasyon. Mon'n vizit lekòl. Mon'n ganny sans koz ek plizyer ansennyan. Mon'n koz ek paran. E pa bliye mon ti osi en ansennyan pour 23an.

Problemanm dan sistenm ledikasyon ti deza annan. Me la in tro bokou. Zis koz lo plan parti plan, me lenplimantasyon zero. E ni menm plan ki zot pe koz lo la, *teachers* pa konnen e pa vwar.

Minis lo konmansman sa term, ti La Digue. Fer zoli *speech* lo *bullying* pa en *skills*. Apre, ni vizit *teachers* dan *staff room*. Pa vwar li. Disparet.

Keksoz i *business as usual* e pe kontinyen deteryore. Bann ansennyan pe *struggle* bokou plis ki avan avek mankman ansennyan, mank sipor. Mank resours parey sez, kaye, latab, liv.

Konmsi, nou demann nou lekòl, sa kantite larzan ki nou vote tou le lannen pou Minister fer *recruitment* ansennyan, e aste materyo, be ki zot fer avek?

Dezorganizasyon ek mank planifikasyon i fer ki larzan i retourn dan kof Gouvernman, san ki sa bann *recruitment* i ganny fer. Sa i met bokou presyon lo bann ansennyan. Sa zafer *recruitment* pa zis dan Minister Ledikasyon. I preski partou, oubyen dan tou Minister.

Disiplin in sot *limit* e napa gran keksoz ki pe ganny

fer pou anmenn sipor pour ansennyan. E Prezidan li menm in santi, in vwar sa. I dir napa bokou dimoun, bokou ki le pran karyer dan lansennyman.

Be vre, si ler sa zenn ki la i pe gete ki mannyer *teachers* pe ganny trete, alor pour li i pa vwar akoz i bezwen vin en ansennyan. Mon'n sey koz avek plizyer, vin en ansennyan. I dir mwan; "en, en Sir, ki mannyer mon vwar sa bann *teachers* pe pase la. Mwan non. Pa fasil".

Ou vwar? Alors, silvouple, annou vremen donn valer nou bann *teachers*. Pa esper zis ler *Teachers Week* pou fer serten *limelight* lo zot. Apard sa, bliye si zot egziste.

Konparasyon saler ek lezot benefis nou bann ansennyan lokal vizavi bann *expatriate*, i reste en gro lenzistis. E finalman, zot in pran sa *long service allowance* ek serten *teachers* ki pa'n zanmen ganny naryen.

Atraver ou Mr Speaker, i vre ki bokou nou bann ansennyan i fristre. Zot pe dir ki Gouvernman pa ekout zot. Gouvernman i mazin zis zot pos.

Ler mon pran Gouvernman Lokal, wi, mon dakor antyerman avek Onorab Labonte. Gouvernman Lokal i bezwen fer kler anba ki kriter ki bann dimoun ki bezwen

serten led, parey koup pye dibwa, ki en menas pour zot propriyete.

E menm bann ki lakaz in ganny andomaze, ki zot bezwen fer pou ganny lasistans? E ki dele letan ki zot pran pou ede oubyen pa ede? Akoz tro bokou dimoun pe pas atraver sa bann sityasyon.

Nou koz lalimyer lo semen. I vre nou napa koltar. I annan bokou pye dibwa. Ler nou'n demann 36 lalimyer, nou ganny zis 9 oubyen 4. E sa ki nou bezwen fer avek, zis ranplas sa bann ki'n andomaze. Selman nou vini, nou fer en ta tapaz lo lalimyer. Problem i bokou.

En manman ki'n konmans travay le 8, i annan son 3 zanfan. E i pe dir i pa pou ganny saler aköz *account pay roll* in fini frenmen. Lo ki sa fanmir pou viv? Eski i pou bezwen esper ankor en lot mwan antye pou li ganny en saler? Me an atandan, lo ki i sonny son zanfan? Sa i Leta nou Nasyon ki nou bezwen get ladan.

Mr Prezidan, balanse. Konnekte ek ou pep. Aret fer krwar tou keksoz i an roz. Ou'n *fail* sa pep *big time*. Si apre 4an ki ou deside fer lannen aksyon. Be sa 3an, ki zot ti pe fer?

(APPLAUSE)

HON ROCKY URANIE

Be la in tar Seselwa.

MR SPEAKER

30 minit Onorab.

HON ROCKY URANIE

Seselwa i nepli dormi boner. Zot pe esper sa dimyel ki ou pou vin avek avan eleksyon. Tou fason, koze deor, napa lot ki *United Seychelles*. *United Seychelles* i sa sel opsyon pour Sesel.

(APPLAUSE)

MR SPEAKER

Mersi Onorab. Bon, nou'n ariv ler pou pran poz. E nou a rebran repons 2er. Mersi.

(BREAK)

(Mr Deputy Speaker in the Chair)

MR DEPUTY SPEAKER

Bonn apre midi tou Manm Onorab. *Welcome back* pour nou sesyon travay pour apre midi. Kot nou pe kontinyen avek nou repons lo diskour Leta Lanasyon ki ti prezante par Prezidan, *Jeudi* le 22. E prosen entervenans ki lo lalis i Onorab Phillip Arissol lo kote *LDS*.

HON PHILIP ARISSOL

Mersi Mr Speaker. Bonn apre midi Mr Speaker, tou dimoun

ki pe swiv nou, spesyalman tou zabitan Anse Boileau.

Mr Speaker, ankor enn fwa sa moman in arive kot nou bezwen adres repons lo Leta nou Nasyon, prezante par Prezidan Ramkalawan. Kot nou fer en tour lorizon pou adres leta nou pei e son pep. Sirtou an konsiderasyon bann defi resaman ki'n arive Sesel.

Byen boner an Desanm 2023, nou nasyon ti pas atraver en seri levennman trazik ki'n kit en gro lenpak lo nou kominote.

Le 7 Desanm, en leksplozyon. Mr Speaker, nou'n aprann yer par Onorab Lemiel ki sa ti en bonm ki ti kit Cascade e Providence dan en sityasyon devastasyon e bouwersman.

An plis ki sa, dan rezyon nor, zot ti ganny frape par en move tan. E sa ti koz inondasyon e glisman teren, kot trazikman nou ti perdi 3 sitwayen.

Mr Speaker, Anse Boileau nou osi nou ti fer fas avek sa move tan, kot linondasyon ti afekte nou. Me planifikasyon e aksyon apropiye par Gouvernman, pou konstri e amelyor en sistenm drenaz ki tro lontan pa'n ti'n ganny gete. Sa in ed nou bokou, kot nou pa'n sibir sa kantite dega.

Mon anvi profite pou eksprim mon profon

rekonesans e rezilyans, e preparasyon nou kominote Anse Boileau. Pandan ki nou ti fer fas avek leksperyans linondasyon.

Son lenpak pa'n tap nou tro for aköz sistenm drenaz efikas ki ti ganny met an plas boner 2022. Sa lenfrastruktir in zwe en rol enportan pou protez nou kominote kont lefe sa bann movetan.

Alors, mon ti a kontan remersye Gouvernman, dirize par Prezidan Wavel Ramkalawan, e tou dimoun ki'n enplike dan planifikasyon, aplikasyon e antretenir sa sistenm esansyel.

Mr Speaker, apre sa bann levennman, i enportan pou nou reini ansanm, an tan ki kominote, an tan ki Seselwa. Pou nou siport enn a lot. Pour nou adres defi ki devan nou. Nou panse e nou lapriyer i al pou bann fanmir e dimoun ki'n ganny afekte direktteman ou endirektteman par lenpak sa bann trazedi.

Lo mon non, lo non zabitan Anse Boileau e lo mon non, nou le eksprim nou profon kondoleans pour bann ki'n perdi zot pros.

Mr Speaker, dan kad sa bann defi ki pei in sibir le 7 Desanm 2023, nou Gouvernman ti reazir rapidman e mobilize pou ede e donn lasistans bann dimoun ki'n ganny afekte.

E nou kominote rezilyan ti zwenn ansanm pou aport zot sipor bann fanmir afekte pandan sa moman difisil. Sa ti demontre legzanp lafors e linite, e lespri solidarite nou pep devan adversite.

Pandan ki nou pe regard ver lavnir, i enperatif pour nou angaz nou totalman dan rekiperasyon e reabilitasyon bann dimoun ki'n ganny afekte. Nou zefor kolektif koman en nasyon i vreman enportan pou aport sipor e resours neseseur pour bann dimoun ki dan bezwen.

Ladministrasyon *LDS* dirize par Prezidan Wavel Ramkalawan, pe kontinyen fer tou pou asire ki viktim sa 2 lensidan, i resevwar swen e lasistans ki zot merite. Pandan sa, travay pou kontinyen pour zot reabilitasyon e zot reentegrasyon dan kominote.

Letan nou pe konsider sa bann levennman resan, i enportan pour nou rekonnet ki serten proze ki ti'n ganny bidzete pour 2024, i kapab. Mon dir, i kapab fer fas avek retar. Akoz re distribisyon resours e latansyon imedyat ki rezyon afekte ti bezwen.

Mr Speaker, sa i en letap ki ti neseseur pour priyoritiz byennet e rekiperasyon nou sitwayen.

Mon demann avek tou sekter dan nou sosyete. Gouvernman, lendistri prive,

sosyete sivil, bann sitwayen endividuel pou zwenn ansanm e kontinyen kontribye dan zefor kolektif pour Sesel.

Letan nou debout an solidarite avek dimoun ki'n ganny afekte par nenport ki kalamite, ki nou kapab demontre nou lafors e nou konpasyon.

Anmezir ki nou pe avanse, annou rapel ki se par travay ansanm e siport kanmarad, ki nou pou kapab konstrir en lavenir ki pli briyan pour Sesel. Lafors nou nasyon i dan nou linite. E se atraver sa linite, ki nou pou kapab navig dan bann moman pli difisil e sorti pli for konman en nasyon.

Mr Speaker, letan nou pe komans 2024, mon fyer pou anons komansman....

Mon re pran Mr Speaker. Letan nou pe komans 2024, mon fyer pou anons komansman plizyer proze enportan Anse Boileau, ki pou san dout amelyor lavi tou nou sitwayen.

Lansman proze semen Lakot Was "*West Coast Road Project*", i demark en moman enportan dan devlopman nou kominote. Parske i promet pou anmenn amelyorasyon dan lenfrastruktir esansyel.

Notaman, trotwar, ki pou anmenn sekirite pour nou zanfan letan zot pe al lekol. Ale e sorti lekol. Tou zabitan e

viziter ki pe servi nou semen. Sistenm drenaz modern. Lalimyèr. *Bus shelter*.

Sa bann amelyorasyon pa pou non selman amelyor sekirite e akse lo nou semen. Me i pou osi kontribye dan labote zeneral nou distrik. E mon ti a kontan lo sa *note*, remersye tou zabitan ki'n donn *wayleave* pour sa proze.

Deplis, mon ti a kontan partaze ki nou pou finalman akeyir sa bazar fri ek legim, ki pou tre lontan zabitan Anse Boileau pe espere.

Sa bazar pa pou non selman ofer nou rezidan akse avek fri ek legim fre, ki ganny kiltive lokalman. I pou osi kree loportinite ekonomik pour nou ferme e bann vander dan distrik.

An menm tan, avek sa enplimantasyon sistenm irigasyon pou bann ferme, pou ede ranforsi prodiktivite agrikol. Pou asir krwasans dirab e sekirite alimanter pour nou kominote e pour nou pei.

Lannen 2024, pou osi vwar travay nesese ganny fer pour konstriksyon en bazar pour peser ansanm avek en fasilite pou met valer azoute avek pwason, Anse a La Mouche.

Sa i mark en devlopman enportan ki pou benefisyè nou bann rezidan e bann viziter osi. Sa linisyativ a siport Lendistri Lapes Lokal, e

kontribye dan krwasans ekonomik zeneral, e dirab nou kominote.

Letablisman sa bazar pwason modern e osi byen ki sa *fish processing facility*, a ofer en landrwa santralize e efikas pou vann e distribye fridmer fre. Sa a amelyor aksesibilite prodwi pwason e kalite siperyer, pour nou rezidan.

I pou osi egalman kree en destinasyon atiran pour viziter, ki pe rod gou otantik lakwizin Seselwa.

Mr Speaker, sa pou osi aport sipor pou bann peser lokal. Kot zot a kapab vann sa ki zot in atrape e ranforsi mwayen viv dimoun ki angaze dan Lendistri Lapes.

Deplis, konstriksyon en *gear store* pour bann peser Anse a La Mouche, pou adres bezwen pratik kominote lapes, par donn en lespas dedye pou *store* e antretyen bann lekipman lapes esansyel.

Sa a kontribye dan efikasite e soutenabilite pratik lapes lokal. Asire ki peser i annan akse ek zouti e resours ki zot bezwen, pou zot fer zot aktivite dan en fason sekirize e efikas.

Dan kad proze distrik pour Anse Boileau, i annan kozri lo en proze *public private partnership* ki pe pran plas avek en zabitan Anse Boileau, pou konstriksyon en bazar

pwason, en *fish shop* dan Anse Boileau santral.

Sa nouvo proze *PPP* pou konstrir en bazar pwason Anse Boileau, i reprezant en letap enportan pour devlopman ekonomik e sosyal dan nou distrik.

Atraver sa kolaborasyon, nou pe met an plas en plan ki pou permet bann zabitan Anse Boileau benefisyé bokou posibilite. Kot zot a kapab aste e vann pwason. E osi kapab devlop zot biznes e kontribye dan devlopman kominote lokal.

Sa proze ki pou pran plas, i demontre en bon legzanp ki fason Gouvernman e Sekter Prive i kapab travay ansanm pour konstriksyon lekonomi lokal. E pou amelyor lavi bann zabitan.

Nou ekspekte ki sa bazar pwason pou ofer plizyer lavantaz. Enkli kreasyon lanplwa, piblisite pour pwason lokal, e en meyer akse pour konsonmater avek varyete pwason fre.

Mr Speaker, mon konvenki ki sa konstriksyon bazar pwason, *fish processing facility*, *gear stores* Anse a la Mouche e sa proze *PPP* dan Anse Boileau santral.

Sa pou anmenn bokou benefis pour nou kominote. Kontribye dan prosperite e byennet nou rezidan. E etabli Anse Boileau koman enn sa

landrwa pli popiler pou aste fridmer fre.

Mr Speaker, an adisyon avek sa bann devlopman enportan, i osi annan konstriksyon 24 nouvo lakaz Anse Louis, *Ex-Zelia* ki pou konmanse. Sa i mark en progre enportan dan direksyon pou abord nou bezwen lozman.

Sa bann lakaz a ganny servi koman en lalimyer lespwar pour 24 fanmir ki merite. Ki pou ofer zot sekirite, konfor e en landrwa kot zot a kapab apel dan lakour.

Mr Speaker, sa linisyativ i ankor en temwannayaz langazman Gouvernman *LDS*, pou asire ki sak fanmir dan nou kominote i annan akse avek en lozman ki bon. E ki aport li e son fanmir sekirite.

Ler nou pe antre dan sa bann demars, mon krwar fermeman ki sa bann proze pa pou zis amelyor lenfrastruktir fizik Anse Boileau. Me pou osi anmenn en sans kominote e prosperite pour tou dimoun.

Mon pe espere pour mwan temwannay lenpak pozitiv ki sa linisyativ pou anmennen pour zabitan dan nou distrik. E pou mwan kontinyen travay ansanm dan direksyon pour en lavenir pli briyan pour nou zoli distrik.

Mr Speaker, an fas plizyer defi, Minister Lasante pe rankontre aktyelman.

Devouman ek langazman ki nou bann dokter, ners, e tou zabitan e tou bann *staff* dan Sant Lasante Anse Boileau, i vremen admirab.

Malgre adversite e limit, sa bann profesyonnel swen lasante i kontinyen sirpase pou delivre swen esansyel e sipor pour tou pasyan. Demontre rezistans e devosyon dan sa profesyon nob. Zot zefor enfatigab e sakrifis, pa pas inapersi.

Mon oule eksprim mon apresyasyon profon e mon rekonesans senser pour sak dimoun ki pe travay dir, nwit e zour, pou protez lasante ek byennet nou kominote.

Mr Speaker, pou temwanny langazman pou amelyor servis swen lasante Anse Boileau, mon kontan pou anonse ki renovasyon nou Sant Lasante pe al konmanse dan sa prosen 2 a 3 mwan.

Sa renovasyon, mon espekte a transform nou Sant Lasante dan en letablisman modern, pli ekipe. Ki kree en lanvironnman ki pli favorab e akeyan pour pasyan e bann ki pe furni sa swen lasante.

An plis ki sa, mon kontan pou fer konnen, progre lo sa *standby generator* pour nou Sant Lasante. Byen ki in annan retar dan proses akizisyon, mon kontan pou enformen ki demann i la prezan dan staz *tender*. E mon

pe antisipe ki enstalasyon i merit konplete avan milye lannen.

Enstalasyon sa zenerater i enportan pou asire ki napa lenteripsyon kouran pandan irzans e sityasyon kritik. Sa a definitivman ranforsi kapasite pour nou bann *staff* kapab furni swen lasante a nou kominote.

Mr Speaker, linisyativ pou devlop en *Mini Sports Complex* Anse Louis e enstal en *outdoor Gym* Anse Boileau, i en letap ki pou promouvwar en lavi an bonn sante e aktif dan nou kominote.

Sa de proze pa pou non selman aport loportinite lwazir pour nou zenn. Me pou osi kontribye dan byennet zeneral nou rezidan, atraver diferan group laz.

Konstriksiyon en *Mini Sports Complex* Anse Louis, a kree en lespas dedye pour nou zenn garson, e nou bann zenn fiy, partisip dan varyete aktivite sportif.

Ler nou ofer akse avek lenstalasyon *futbol*, *basketball* e *volleyball* e lezot aktivite sportif, nou vize ankouraz aktivite fizik, travay an lekip, e devlopman konpetans sportif parmi nou zenn.

An plis ki sa, sa linisyativ a ankouraz en sans kominote e kanmaradri. E osi ofer en

l'ouverture positive pour la zote énergétique et la zote énergétique.

Mr Speaker, pareyman, enstalasyon en *outdoor Gym* Anse Boileau, pros avek Ladministrasyon Distrik, a prezant en loportinite ekselan pour tou le de, zanfane adult. Pou donn priyorite zote byennet fizik.

Konstriksyon en *outdoor Gym* a kree en lespas pratik, e kot ou pa pou bezwen peye pou rezidan angaz dan legzersis. Ler nou ankouraz aktivite fizik regilye, nou oule amelyor lasante e vitalite manm nou kominote. Ankouraz en kiltir byennet e rezistan.

Sa linisyativ a souliny en langazman pou kree en lanvironnman ki siport devlopman konplet nou sitwayen. Ki osi en fondasyon pour en kominote ki pli aktiv e an bonn sante.

Mr Speaker, mon konfidan ki sa de proze, san dout, pou annan en lenpak positif lo lavi nou rezidan. Ankouraz en sans apartenans. Promot en lavi an bonn sante e byennet. E ranforsi fabrik sosyal dan nou kominote.

Annou kontinyen investir dan bann demars ki pou permet nou bann sitwayen pou anmenn en lavi satisfezan e an bonn sante. Asire ki Sesel i reste en

landrwa kot tou endividi i kapab bouze e prospere.

Mr Speaker, ler bokou etranze ki pe travay Sesel pe met laliny pou anvoy *forex* dan zote pei, sa larzan ki zote in gannyen pou travay dir ki zote in fer dan nou pei. Isi nou vwar bokou nou bann zenn, ki ti devret pe fer sa bann travay, pe met laliny pou pran *methadone*.

Mr Speaker, kekyon labi sibstans dan nou pei parmi nou bann zenn, i san dout reste enn nou pli gro konsern. Malgre bokou devlopman positif Sesel, i kler ki nou devret adres sa defi avek lizans e determinasyon.

Labi sibstans pa zis selman poz menas pour lasante e byennet nou zenn. Me i osi annan reperkasyon konsiderab pour nou sosyete an antye.

Pandan ki nou pe konfront sa problem, i esansyel pour nou adopte en lapros ki anglob plizyer laspe. Ki enkli prevansyon, ledikasyon, tretman e sipor. Nou merit fer zefor pou aprann e konpran bann faktor ki kontribye dan labi sibstans. E travay pou nou donn nou zenn tou resours e tou loportinite ki zote bezwen, pou zote fer swa positif pour zote lavenir.

Zefor prevansyon i dwatet konsantre lo ogmantasyon

konsyantizasyon. Lo risk ki asosye avek labi sibstans. Fer promosyon lo en stil lavi an bonn sante e ankouraz en lanvironnman ki permet nou zenn reziste presyon dan itilizasyon drog.

Ledikasyon i zwe en rol enportan dan ekip nou bann zenn avek konesans *skills* ki zot bezwen pou pran desizyon enformen e reziste tantasyon pou servi okenn sibstans danzere.

Mon vreman ankouraze par lanons ki Prezidan ti fer pandan son diskour Leta Lanasyon konsernan etabli en fasilite reabilitasyon ki dedye pou ed bann viktim labi sibstans. Sa i demontre langazman e aksyon ki Gouvernman pe pran pou rezourd problem kritik adiksyon. An menm tan, abord sipor neser pour dimoun ki pe lite kont labi sibstans.

I en lendikasyon kler ki Gouvernman i rekonnent lenportans reabilitasyon dan proses rekiperasyon. E sa rol ki i zwe pou permet en endividi reentegre dan sosyete, konman en manm pozitiv e prodiktiv.

Mr Speaker, mon sipor tou zefor Gouvernman pou konbat labi sibstans e ankouraz reabilitasyon. Mon ankouraz nou zenn pou angaz dan sa linisyativ pou rod led ki neser. E pou zwe en rol aktif

dan sipor dimoun ki lo semen rekiperasyon.

Ansanm, nou kapab batir en lavenir ki pli briyan pour nou nasyon. Kot sak dimoun i ganny loportinite pou geri, grandi, e kontribye pozitivman dan devlopman.

Mon pe demann tou nou kominote pou vin ansanm, pou abord problem labi sibstans parmi nou bann zenn. Letan nou travay an kolaborasyon, nou kapab kree en lanvironnman favorab e stimilan, ki permet nou zenn pou fer bann swa ki sen. E pourswiv zot rev avek konfyans e optimizm.

Annou re afirm nou langazman anver byennet nou zenn, par donn zot gidans e sipor ki zot bezwen pou anmenn en lavi prodiktif avek sikse.

Mr Speaker, dan en moman profondeman e mouvan pandan diskour Prezidan, nou ti temwanyen en aksyon limilite e konpasyon, ler i ti prezant en lekskiz senser bann viktim e fanmir ki ti ganny afekte par levennman trazik Koudeta 1977.

I enportan pou note ki Prezidan li menm, ti osi en viktim dan sa bann levennman terib. Sa i azout en kous senser profon dan son parol. Sa zes tousan, i met laksan lo lenportans pou rekonnent lenzistis istorik, e

anbras semen rekonsilyasyon.

Sa zes i rapel nou, nou listwar tris ki nou partaze. E sinifikasyon dan reini ansanm pou geri sa bann vye blesir, e batir en lavnir pli briyan pour nou nasyon.

Leskiz Prezidan i demontre nou volonte kolektiv koman en pep pou ini. Met diferans dekote e travay ansanm pou amelyor Sesel. E pou prosperite nou bann zenerasyon fitir. Se atraver bann aksyon senpati e konpreansyon ki nou pou kapab forz en Sesel pli for, pli ini pour tou.

Annou sezi sa moman pou re afirm nou langazman anver linite, anver solidarite, anver vizyon en Sesel ki enkorpor bann valer konpasyon, enklisivite e progre.

Mr Speaker, an travayan avek zanfan Sesel, Anse Boileau i sanmenm sa distrik ki annan mwens problem sosyal. Mwens lager parmi nou bann zanfan lekol. Anse Boileau i sa distrik trankil, kot napa bokou tansyon politik. E sa i aköz nou travay ansanm dan lentere pour tou dimoun.

Pandan tro bokou letan, in annan divizyon e tansyon politik dan nou distrik. Sakenn ti pe ris son kote. Serten ti pe rod zis son gannyen. Mwan mon travay pour en Anse Boileau, ki pa ni

ver, ki pa ni ble, ki pa ni rouz.

Mon travay pour tou dimoun Anse Boileau, kot sak zabitan i annan son plas. Rezilta se ki Anse Boileau i sa distrik ki pli gou viv dan Sesel.

Mon lapel pour tou zabitan se ki nou kontinyen, annou kontinyen lo sa semen lape, progre e linite.

Mr Speaker, i annan dimoun ki kontan dir mwan 'nou pa tann ou Philip, ou tro trankil'. Vre, mon trankil. Me pa bliye, delo trankil i profon.

(APPLAUSE)

HON PHILIP ARISSOL

E ler zot pa tann mwan, se aköz mon pe travay. I annan bann ki fer tapaz e ki kontan piblisite ler zot pe ed en dimoun ki dan difikilte. Mwan mon fer mon travay trankil, san okenn tanbour, ni okenn tronpet. Se mon bann zabitan ki konnen ki mon pe fer.

Pa bliye Mr Speaker, mon spesyalite dan distrik se ki mon en lantrener. E en lantrener *Basketball*. En lantrener rarman i ganny laglwar e felisitasyon. Se tim ki ganny rekonnèt. E mon tim se tim Anse Boileau. Tou mon travay, tou mon zefor, se pour tim Anse Boileau.

Mon pou fer tou mon mye pour ki distrik Anse Boileau i reste sa landrwa ki pli gou viv Sesel. Zabitan Anse Boileau e

Lepep Seselwa i kapab kont lo mwan, akoz Phillip, li osi i dan sa tim ki pa pou zanmen les tonbe. Mersi Mr Speaker.

(APPLAUSE)

MR DEPUTY SPEAKER

Mersi Onorab Arissol. Prosen entervenan lo lalis se Onorab Richard Labrosse.

HON RICHARD LABROSSE

Mersi Mr Speaker. Tou bann dimoun ki a lekout. Tou bann travayer isi kot Lasanble. Tou mon bann koleg Manm. Espesyalman zabitan Plaisance, bonn apre midi.

Mr Speaker, sa lannen i pou fer egzaktaman 40an depi ki mon zenerasyon ki mon'n ne ladan, nou pou selebre. Wi, Mr Speaker, 40an leksperyans ki nou'n grandi e ne dan en zoli pti pei ki apel Sesel. Enn bann pli zoli pei o monn.

Sakenn de nou ki port sa nasyonalite Seselwa, nou santi nou beni ki Bondye in donn nou enn bann loportinite ki bokou dimoun dan bann lezot parti lemonn, ti swete zot ti a pe viv. E bokou ti ava kontan pou port sa lidantite ki nou annan.

Nou'n vwar sa nou menm – nou'n vwar sa dan plizyer fason dan lepase. Kot i annan menm, ki menm aste nou lidantite. Swa par atraver en paspor. Swa par fer li atraver

en kart idantite. E byensir, nou konnen nou paspor i enn ki tre for dan Lafrik. Ouswa menm, nou kart idantite.

Wi Mr Speaker, mon fyer pour mon zoli pei ek son bann zabitan vreman akeyan. E touzour annan en leker imen. Se dan en tel fason ki mon ti a kontan demar mon repons lo diskour Leta Lanasyon, fer par Prezidan Larepublik, Son Ekselans Wavel Ramkalawan, isi dan sa Lasanble Zedi pase.

Mr Speaker, nou bezwen admet ki pandan sa 3an ki'n pase, en kantite keksoz pozitiv in arive isi dan nou pei. E nou ankor annan bi pou trouv tou sa ki le meyer pour tou Seselwa.

Me sa 3an, nou osi nou'n kapab osi dekouper en kantite defi, ki byensir mon konnen pe ganny amelyore. Sa avek bann nouvo fason travay, bann nouvo fason fer.

Kot servis piblik ozordi pe ganny demande e kontinyen ganny demande pou vin pli efikas. E byensir avek sel bi, se pou fer lavi bann zabitan vin pli favorab. En pe pli fasil, parey nou dir.

Leta lespri Seselwa ozordi, sirtou bann ki pli zenn parey mon zenerasyon an montan, in sanze. Zot pe get ver en lot kalite lavi, ver lavenir ki pli briyan, pli reisi.

Zenn ozordi i pli anvi bouze. Anvole, parey nou dir.

Zenn in pli pare pou li menm retourn lo ban lekòl si fodre, pou li kapab ganny plis kalifikasyon. Plis ledikasyon pour li kapab bouz pli devan.

Ozordi nou pe koz abilite ek merit, me san okenn faver politik, ouswa zanmi ou fanmir e se sa ki nou anvi kontinyen fer pour nou bann zenn.

Byensir, bann zenn i annan bokou lekspektasyon apre ki zot in fer tou sa sakrifis. E zot ti a kontan ganny en bon *package*. En bon dil parey nou dir. En saler ki ankourazan, ki kapab soutenir zot ek zot fanmir. Ki kapab fer zot vin pli otosifizan.

Sa zenn i osi pe sers bann lezot benefis tel parey lozman, ki en konversasyon ki mon santi i merit al en pe pli profon ankor. Mon santi ki nou kapab fer pli ankor pli byen dan sa domenn, si sakenn i pran son responsabilite parey i devret.

Mr Speaker, mon dyalog avek bann zenn dan mon distrik, se ki mon santi apre sak konversasyon se ki nou bann zenn ozordi, i pli anbisye pou fer keksoz pozitiv. Ki swa dan la kominote. Ki swa dan zot landrwa travay.

Bann zenn i anvi bouze. Zot anvi fasilite pou vin pli inovativ. Zot oule annan plis fasilite pou ouver en pti biznes. Zisteman dan sa

domenn, mon krwar nou pou bezwen osi revwar en pe bann proze konblaz ki Sesel pe koz lo la ozordi.

Par egzanp, ek sa demann ki nou annan ozordi, mon konnen ki Providence deza i osi in fini en pti pe pli inonde avek bann biznes ki'n deza etabli zot laba.

E la mon ti a kontan osi, si Minis oubyen sa departman konsernen osi, ti pou fer nou konnen ki bann rezilta bann levanter ki ti sipoze annan lo sa bann later ki ti'n gannyen dan lepase?

Kot la nou ti ava vwar plis egalite ek loportinite. Ki ti ava osi ouver pour bokou plis zenn. Plis dimoun ki vremen anvi konmans en biznes, ouswa agrandi son biznes pour benefis la popilasyon.

Si nou reste lo sa kote, donn sipor bann biznes. Mon ti a kontan adres bann labank ki pe ekout nou ozordi. Mon santi ki i annan ankor bokou ki zot kapab fer pour nou popilasyon.

I tre byen ki zot annan bann fasilite *loan*. Sa in ed bokou dimoun. Sa osi in ed bokou bann antreprenner potansyel e endividi, bokou. Me lo kote lentere, mon krwar zot ti kapab fer pli byen.

En legzanp Mr Speaker ki mon kapab donner. Zot ti kapab osi konsidere, en lentere pli ba pour bann *first*

time home buyers, parey nou dir.

Bann dimoun ki pe aste en lozman pour premye fwa, bann program parey i egziste partou dan lemonn. Pou ed bann zenn sirtou, aköz pri later ek lakaz i kontinyen ogmante. Me isi, sa i en pti pe rar ler nou regard bann tel prodwi parey.

I en lenfirmite pour en zenn nobou ganny en twa lo son latet, si ou le pas par labank. Me i annan i dir nou ki i en matir pou sibir sa bann birokrasi, zis pou nobou konstrir en pti bout lo later son paran. Ou menm pou agrandi lakaz pou zot ganny en pti pe plis konfor.

Serten labank a konmans dir ou fodre zot *subdivide* aköz fodre sa later i lo ou non. Malgre ki sa zenn in ganny *permission to build* avek son met.

Mr Speaker, nou oule ki nou zenn i kapab annan li en lavi ki pli favorab pour li kapab delivre pli byen pour son pei. E sa i en legzanp ki mon'n donner. I enn ki pa pou pran bokou.

Me parey mon'n dir, bann *scheme* parey i egziste en pe partou dan lemonn. La mon kapab sit de landrwa kot mon'n fer resers. Mon konnen Langleter, Lanmerik i annan sa. I a demann en pti pe plis resers lo kote labank, pou zis

rode ki mannyer i kapab fer sa. E zot ava adapte li pour nou klima Sesel.

Bann ki pe fer *sport*, mon asire in santi zot en pti pe pli soulaze ler zot vwar bann progre ki pe ganny arive lo nou bann fasilite sportif dan nou bann distrik ozordi. Espesyalman dan nou distrik vwazen, Roche Caiman.

Apré ki tousala ti'n tonm an rin, la nou ti a kontan swet kouraz NSC pour sa travay difisil ki i pe sey fer, e pour bann zefor ki i pe kontinyelman mete.

Mon ti a kontan osi profite pou dir, ki fodre nou pa les nou fasilite sportif ariv ankor dan en tel leta parey, Mr Speaker. Ler nou pouse pou nou fer bann atlet fer pli byen, annou pa bliye ki en lespri an bonn sante i ankouraz en lekor an bonn sante. E sa i ankouraz bon performans.

En *d'autres mots*, si nou oule nou bann sportif i perform pli byen enternasyonalman, fodre nou donn zot en bon lanvironnman pour zot fer zot lantrennman, kot zot santi zot an sekirite e zot ganny valorize.

Mr Speaker, ler mon osi dan sa laliny fasilite sportif. Ler mon pe enplor avek NSC apré sa gran travay ki zot in fer, depi 2020 ziska ozordi ki nou pe koze. Mon ti a kontan osi zot met en pe plis lanfaz ler

nou pe dir ki sa bann fasilite parey tourn an rin ankor.

Kot dan menm moman, sa larzan ki nou pe depanse pou nou retourn *back*. Pou nou re aranz ankor. Pou nou fer sir ki keksoz pa retourn an rin apre tou sa bann lannen ki naryen pa'n ganny fer lo zot.

Sa menm larzan nou ti kapab ganny servi osi pou nou osi finans bann atlet ki annan zot bann lezot *training* aletranze. Ouswa menm zot bann konpetisyon ki zot bezwen ale.

Mr Speaker, konsernan lozman dan mon distrik, mon santi mon rekonforte ler mon tann Prezidan dir ki zot ankor pe rod plis resours pour fer lakaz.

Byensir ek lagras Bondye papa o, sa i ava arive e mon ava kapab asire ki Proze Kan Gard i konplete sa lannen. E sa landrwa i a vin pli zoli ankor. Antoure avek bann nouvo batiman ek zot bann zoli dimoun.

Lotorite Distrik Plaisance pou byento rankontre avek Departman Later ek Lakaz. Minis ek son lekip. Kot nou pe vin fer en konversasyon. Sa konversasyon avek bi pou konpran zot plan travay pour sa lannen ki zot annan pour distrik. Ek bann lannen ki a pe vini.

Zis parey mon'n vwar dan Bidze pour en lokasyon

pour 2025, en larzan pour *Société De Logement*. Me mon krwar ki nou a kapab ganny plis lenformasyon lo sa. E osi parey bann zabitan ankor pe demann plis lenformasyon lo *Ex Murray*, en bout later ki Gouvernman ti aste avek bi pou fer lakaz. Kot la mon santi kefwala loportinite i pou la kot nou ava kapab met tou keksoz lo latatab.

Akoz mon krwar osi ler nou pe koz lo sa bout later ki ankor anpandan dan nou distrik, mon krwar i annan en lot loportinite pou ed bann zenn. Ouswa bann aplikan later dan mon distrik. Tousala mon'n dir zot, i ava vin dan sa konversasyon ler nou zwenn avek Minis ek son lekip dan bann zour ki pe vini.

Ler mon pe koz lo Minister Later e Lakaz Mr Speaker, mon ti a kontan osi remersye Minis Rangasamy ek son 2 PS, ek son bann zofisye sa Minister. E en remersiman spesyal pour Ms Vanessa Antat ki zofisye later pour distrik Plaisance. Nou'n travay tre pros pandan lannen 2023, kot nou'n ede anmenn en pe laklerte kot bann aplikan, kot ti napa.

Mr Speaker, mon pa pou osi bliy mon *housing officer* pour distrik Plaisance, Ms Lizianne Charles. Ki nou osi nou'n fer en gro travay 2023. Kot ansanm nou'n fer sir ki

bann dimoun ki ti lo lalis lakaz pour plizyer letan. Ouswa menm bann ki'n ganny viktimize politikman. Ouswa akoz zot pa ti ganny kontan.

Nou nou'n met tousala dekote Mr Speaker, ler nou'n fer nou 2 *batch* alokasyon lakaz dan distrik. Nou'n met politik tre lwen avek. Nou'n fer sir ki sa ki pe pey son *scheme* normal e sa ki dan merit. E laz ki zot in fer aplikan, ti kriter prensipal pour sa alokasyon Mr Speaker.

Alors parey mon'n dir zot, avek lagras Bondye, nou priye ki ankor enn fwa, si Prezidan pe ekout nou la. Ler pou rod sa pti *fund*. Ler ou ganny sa pti larzan, pa bliye se, premye landrwa ki mon krwar ou merit gete se dan *Ex Kan Gard housing estate*, Mont Fleuri.

Kot la nou ava fini demoli sa bann dernyen vye batiman ki reste. Ki ankor pe apartyen bann dimoun ladan ki pe donn zot pa mal problem. E nou ava vwar bann nouvo *unit* ki ava konstrir tre byento, Mr Speaker.

Mwan ler mon pe evalye bann servis ki mon'n gannyen 2023, mon kapab dir ki mon vwar en zefor ki bann zofisye servis piblik pe fer. Mon ti a vreman kontan ki bann ki pe fer li avek zot leker, ki osi zot zefor i ganny rekonnnet Mr Speaker. Pa zis ek larzan, me

osi ek bann lezot loportinite ki pou ede anmenn en meyer lavi pour zot.

Par egzanp en *training* ki pou lev zot nivo ankor plis. Swa en *training* lokal, ouswa enn ki enternasyonal. Ki pa zis bann gro sef dan sa bann Minister, oubyen sa bann departman ki ale. Ouswa parey nou dir, bann ki pli pros ek sef.

Non Mr Speaker, nou bezwen re get ankor tou bann dimoun. Fer sir zot lo menm paz zot tou. Ler nou pe koz devlopman resours imen, ki ansanm tou dimoun i *aligned*. E zot konnen kwa ki zot pe fer, e kwa ki zot pa pe fer.

Parske nou bezwen osi realize, ki parfwa i annan bann dimoun dan servis piblik, kekfwazot pa pe vreman fer keksoz mal zot. Si zot pa'n ganny *training*. Zot in ganny mete la. Swa par en faver politik. Swa mon pa konnen, dan lepase. Me, mon krwar la lemoman in arive pou regard en pe devlopman resours imen dan nou servis piblik.

Me osi, nou bezwen osi kapab devlop bann standar osi, bann Polisi, ki ler en dimoun osi i antre travay dan servis piblik, i konnen kwa ki i annan, kwa ki i sipoze gannyen.

E sa mon asire Mr Speaker, i pou ede pou lev

standar travay. E ki pare pou rann servis alaoter. E lekel ki pou benefisye ler tousala i arive? Se byensir Mr Speaker, sa Seselwa.

I touzour en moman refleksyon ler nou pe ekout en revi lo leta lekonomi pei. I en moman ki fer zabitan get keksoz dan en lot fason. Parey tou pei o monn, i annan bann defi ki nou napa kapab kontrole. I annan ki nou pa kapab kontrole.

La zis get sa lager *Ukraine*. Sa bann bato ki pe ganny met otaz dan Lanmer Rouz. Par ler nou dir Sesel tro pti. Annou reste trankil. Me non, tousala i annan en lenpak lo lavi sakenn de nou.

Byensir sa ki pli vilnerab deor pou kriy plis. Me lefe i reste, ki nou tou nou al dan menm laboutik. E malgre ki pa tou dimoun ki kriy avek menm lafors, nou tou nou santi lefe tousala.

Mon ti a kontan fer en pti parantaz la e lev en konsern lo kote resours imen, finansyel ek lezot konsernan domenn lagrikiltir Sesel.

Mon koz lo sa aköz koman en pti pei zil, izole dan milye en manman losean, nou bezwen kapab prodwir plis manze pou soutenir nou pep.

Sirtou avek bann *external threats* ki nou koz lo la souvan. Tel parey bann lager de tanzantan e sa

problenm pirat dan nou losean.

Petet, enn bann keksoz ki nou devret pe regarde isi, se eski Lekol Lagrikiltir pe ganny ase resours pou li kapab atir ase dimoun pou antre dan sa domenn?

Oubyen, eski Minister Lagrikiltir i kapab ganny plis resours pour li kapab kit bann Sant Resers, par egzanp Anse Boileau? Ouver ziska tar dan *weekend*, pour ki dimoun ki enterese i ava kapab al aste zot legren, plant, pour zot prodwir en pe fri ek legim kot zot menm.

Zot osi kapab fer plis ledikasyon lagrikiltir dan medya, parey ti annan dan bann programm lontan lo *SBC*. Mr Speaker, mon krwar ou a kapab – ou rapel sa byen. Ki ti montre ki mannyer pou fer bann keksoz lagrikiltir, parey proven. Ki mannyer pou fer *compost*, eksetera.

Ti pou osi enteresan konnen konbyen *graduate* dan domenn lagrikiltir nou annan dan sa dernyen 5an a 10an e kote zot pe travay konmela? Si zot ankor dan zot domenn, oubyen si zot in sorti?

E pli enportan, se aköz ki zot in bezwen sorti dan sa domenn? Nou bezwen komans demande. Aköz sak fwa ki nou vwar en konsern, pour nou komans vwar kwa ki

nou pou adrese avan. Alors, mon ferm sa pti parantaz la.

Sa lanons ki Linyon Eropeen in tir Sesel lo lalis nwar, i en legzanp ki montre ki Sesel, nou vremen bezwen kriye par ler, parey mon'n dir, kantmenm nou tro pti.

Mr Speaker, si ou permet mwan donn mon pti pwennvi personnel. Sa zafer met nou lo lalis nwanr, mon krwar sa ti zis en mannev pou bar Sesel, akoz sa bann letan nou konnen poudir Sesel ti pe fer tre byen dan biznes *offshore*, parey nou dir. *IBC* ti pe ganny anrezistre bokou sa bann letan.

E alors, mon krwar osi ki sa i parey mon'n dir, mwan dan mon lopinyon personnel, mwan mon krwar in ariv koumsa.

Logmantasyon viziter, ki osi i nou sours prensipal, i touzour en lot keksoz pozitiv ki Sesel i merit remarke. Me selman, nou pou osi bezwen rod fason pli inovativ pou nou atir nou viziter pou depans plis.

An menm tan, dan tousala, nou bezwen osi fer sir ki nou pri i ale avek sa servis ki sa viziter pe gannyen. Serten, nou pa kapab zis aste de pti gonaz dan sepa ki pei pour R10. Penn ek en pti paviyon Sesel lo la, ekri *Seychelles*. Apre vann li ek en

touris R100. Sa i vremen mal e malonnet.

Nou bezwen mazine ki ler enn i fer en keksoz mal dan en lendistri, se pei antye ki ganny blanmen e ganny kritike. Annou servi nou kreativite en pe plis.

Mon pe kriy bann artis la. Vin devan avek zot bann prodwi. Kree bann keksoz ki touris pe rode. Pa fer keksoz zis pour marse odganm, ki apre pa vann parey zot oule, akoz napa ase sa kalite touris. Fer bann kreasyon ki pli abordab osi, ki i ava ouver laport avek tou kalite marse.

Nou Sistenm Ledikasyon Sesel, in donn tou sitwayen akse depi a en tre zenn az. Me i osi annan paran ki al an deor Sistenm Ledikasyon piblik. E sa i normal. E sa i zot fason pou fer sir ki zot zanfan i ganny en bon ledikasyon, ki zot ti a voudre.

Lekol Plaisance Primer ek Segonder i 2 lekol ki mon'n partisip ek zot ler zot i'n bezwen mwan, Mr Speaker. En keksoz ki mon'n touzour ganny fer resorti avek bann ki ansarz, parmi bann lezot defi ki zot rankontre, sirtou segonder. I sa mankman partisipasyon paran parfwa, dan bann aktivite lekol.

Detrwa *weekend* pase nou ti zwenn avek *Chairman PTA*. Kot nou'n ede repenn lekol an deor, e aranz en pe

son vizaz. Sa ki ti dezapwentan, sa kantite paran ki ti prezan sa zour.

E alors, mon profite pou lans en lapel, pa zis avek paran me osi avek nou bann ansyen koleg. Parey mon pe koz lo la, nou zenerasyon ozordi ki nou pe koze. Pou koste kot sa de lekol. Annou gete kwa ki nou kapab redonn lakominote ki'n ed nou ariv kot nou ete ozordi.

Bann proze distrik Plaisance an 2023, in viz plis ver lo bann semen ki pou rann lavi nou bann zabitan pli meyer. An tou, i annan 6 proze ki'n ganny idantifye. I annan Proze *Tri Star*. I enn ki nou'n bezwen retourn lo latab pour detrwa fwa avek, akoz sa in ganny pou fer avek *wayleave*.

Me erezman la an se moman ki nou pe koze, tou keksoz in finalize. Plan in ganny met kot *planning* pour laprouvasyon, ki espekte *tender* nenport ki moman.

Mon reste tre pozitiv ki sa lannen bann zabitan i ava vwar en laklerte dan sa rezyon.

Copolia sa lannen nou'n vwar 2 proze semen. Enn ki lo staz byen avanse, ki pou deservi en group zabitan, ki ti pe kriy lasasen pour plizyer deseni. *LDS* in vini. E nou'n tann zot. E nou pe bouze.

Lafanmir Khany, Lenclume, Dailoo anler kot Mrs Pierre, zot semen

aktyelman ki nou pe koze, i lo *tender*. Zot osi en pe letan espere. E la nou kapab dir zot ki zot letan espere in ekspire. So, nenport ki moman zot pou kapab vwar konmansman sa semen.

Lafanmir Isaac, Lephy, Jerome, wi Gouvernman in finalman aste sa bout later pou fasilite zot semen pou ariv kot zot. Zot osi Mr Speaker, en bon pe letan zot pe espere. Sa bann dimoun laba anler. Ti fer lapenn mannyer zot ti pe ariv kot zot.

Ankor enn fwa *LDS* in vini, in ekout zot. Alors neserer in ganny fer avek sa propriyeter prive. Kot la tre byento, nou pou konmans zwenn zot pou nou fer diskisyon, lo ki mannyer nou pou fer demars pou nou demar sa semen ankor. Ki pou deservi ankor en lot group zabitan.

SLTA in konmans plizyer travay koltar dan bann sou distrik. E sa lannen mon pe met lanfaz ek zot pour de landrwa ki bezwen ganny latansyon. Sa i *Fairview*, kot travay in konmanse. Kot zot ti'n aret dan semen. Kot zot in fer mwan ganny enformen ki zot pou konmanse *anytime soon*.

E osi Belvedere ek Rochon ki lo lalis pour *maintenance*. Lotorite Distrik in osi revwar bann lalimyer kot

ti napa. Bann *crash barriers* lo bann landrwa ki danzere. Sirtou kot i annan bann lakaz ki o bor bann gran kontour. Mr Speaker, tousala in konmanse e i annan ki'n fini konplete.

Prezidan in demande ki sitwayen i kontribye dan fonksyonman Gouvernman. Mon fyer pou note, ki langazman nou bann zabitan dan nou bann groupman dan distrik, in reste enn ki akseptab an 2023.

Nou bann madanm ki nou onore tou le, le 8 Mars. Sa lannen i pou fer katriyenm edisyon ki nou pe fer. I pou osi fer karantyenm group – karantyenm madanm ki'n ganny onore depi 2020 ziska la.

Bann ki nou'n onore dan nou group trwazyenm az osi, zot in ganny sans partisip dan plizyer aktivite. Kot zot in osi rankontre Prezidan Larepublik. Ki annan ki premye fwa in al *State House*.

E i annan osi sa lannen kot nou pou annan ankor plizyer lezot aktivite lo nou plan kalandriye ki nou'n devlope pour zot, ankor enn fwa, pou fer sir ki bann ki dan zot vye zour dan lakour, zot pa santi zot *boring*. Kot zot pa santi zot ganny neglize, ouswa kekfwa zot in ganny oubliye.

2024, nou pou pli angaze ankor, kot nou pou annan en

lot aktivite ki nou pou fer dan nou distrik. Kot la nou pe deside pou anmenn tou zenn nou distrik ansanm pour en premye *Youth Symposium*. Ki pou vin en *forum* kot bann zenn pou kapab eksprim zot laspirasyon pour distrik e pei pandan bann lannen ki a pe vini.

E Mr Speaker, mon pou osi servi sa, pou nou kapab annan nou en dokiman dan nou distrik, kot i ava vwar kwa ki zenn i anvi? Kwa ki zenn in deside? E kwa ki zenn i annan aker pour son pei ek son distrik?

Mr Speaker, lanbisyon nou lazenes ozordi, ankor mon oule retourn lo mon zenerasyon. Nou'n vwar ki ozordi partou kot nou pe pase, kot pei pe marse, nou fyer ler nou vwar bann zenn sorti Plaisance pe pran bann responsabilite dan Gouvernman, dan pei ozordi.

Nou'n war zot bokou pe fer sa. Sirtou kantmenm avek bann defi ek bann *challenge* ki vin avek. Sirtou parey ler ou dan bann pozisyon dirizan.

La mon pou profit sa lokazyon pour mwan osi felisit Mr Ronny Antat, nouvo *CEO Seychelles Licencing Authority*. Mr Antat en zanfan Belvedere. Mon pa bliy osi Ms Phillianne Ernesta, en lot zanfan Belvedere ki li in pran

pozisyon Lekonomi Ble. Enn bann pozisyon kle dan pei.

E byensir, Ms Lisa Lautoy, nouvo *CEO ESA*, ki'n grandi dan *Ex Kan Gard*, Mont Fleuri. E byensir nou pa osi bliy bann lezot ki deza dan bann pozisyon kle dan Gouvernman, ki pe fer en travay eksepsyonnel.

E osi bann ki'n ganny bann promosyon ek bann nouvo responsabilite, ansanm dan menm lespri pou amelyor lavi sak sitwayen ek sakenn de nou.

Alors, a la par Lotorite Distrik, mon anvii dir zot felisitasyon e tou le meyer dan zot nouvo post ki zot in pran. Se sa ki fer mon fyer pou dir Mr Speaker, ki mon vremen sanse pou reprezant en bastyon ki apartyen a bann dimoun entelizan. Si pa *PLS*, ou a dir mwan lekel Mr Speaker?

Mr Speaker, letan mon pe koze la, konman Manm Lasanble pour Plaisance. Konman bann lezot travay ki mon annan pou fer, apard dan Lasanble, apard rankontre bann dimoun dan distrik e mon osi annan bann komite Lasanble ki mon asiz lo la.

E mon annan mwan 2 komite ki mon asiz lo la isi dan sa Lasanble. 2 komite ki nou dir parey nou dir, *oversight*. Enn bann komite ki mon konmans avek premye, i

Komite COGA. Ki li COGA li, i swivre tou bann lasirans ki Gouvernman i donnen isi dan sa Lasanble.

Son *Chairman* Mr Speaker, se Onorab Mrs Sylvanne Lemiel, Manm Lasanble pour Anse Royale. Enn mon *Chair* ki mon ador li en kantite. Mon kontan li bokou. I konn tre byen Mr Speaker.

Me selman yer, in sok mwan en pe ler mon'n ekout li. Ou a krwar i ti en pe ankoler yer. Mon mazine, selman pa li ki'n anvii dir sa bann keksoz.

Bann keksoz ki mon *Chairman* ki mon kontan in dir yer, in donn mwan en lenpresyon ki bokou keksoz pa pe marse. Naryen pa pe marse. Sa ki mon pe ganny en konpran.

Me selman, ki bann bokou dimoun i kontan fer mwan konpran se ki si keksoz pa pe marse. Bann vizit ki zot ale lo televizyon. Bann *interview* ki zot donnen. Zot ganny dir ki tou keksoz i ok. Tou keksoz i bon. Alors, ki nou pou konpran?

Lot Komite ki mon lo la Mr Speaker, i komite ki vey bann zafer kont piblik. Ki nou byen konn li konman *FPAC*. Li son *Chairman* i Mr Onorab, Sir Sebastien Pillay. Kekfwa ou pou demann mwan aköz mon dir li Sir Mr Speaker. I mon

profeser. Mon *still* annan respe pour li.

Mr Speaker, mon pa tro annan gran problemm avek mon *Chairman*. Me sa ki'n sok mwan bomaten ler mon'n tann enn mon koleg, ki asiz ek mwan lo sa komite, in deklar en lalis koripsyon. In dir koripsyon in tro bokou, pa kapab gete. Sak in defonse.

Be Mr Speaker, be nou Manm *FPAC* nou! Annou anvoy keksoz devan nou a travay!

(APPLAUSE)

HON RICHARD LABROSSE

Si nou dan Gouvernman nou pa vwar, zot anvoye nou a travay silvouple!

Dan menm laliny Mr Speaker, an terminan, mon ti a kontan remersye tou zabitan Plaisance Mr Speaker. Mon pou dir ki mon vreman privilezye ler mon dir sa. Parske mon ozordi dan Plaisance, napa *LDS*, napa *US*, napa lot. I annan zabitan Plaisance.

E zot *MNA* ki zot annan se *MNA* pour Plaisance. Se pour sa rezon ki mon kapab ganny konversasyon avek zot tou. Mon kapab ganny en pti *phone call* avek zot tou. En pti *advice* avek zot.

Kot zot santi mon pe al tord, zot pou dir mwan non, al drwat. Kot zot santi mon pe fer

byen, pou donn mwan lankourazman. Se sa ki mwan mon pe santi dan mon distrik ozordi.

Kantmenm zot in sey fer sa bann dimoun per dan zot *meeting* pou zot pa koz ek mwan, zot pa pou kapab anpes sa bann dimoun koz avek mwan. Parske mwan, mon'n grandi devan sa bann dimoun. Mon'n touzour annan respe pour sa bann dimoun. E nou pou kontinyen parey zot in vin zwenn nou.

Mr Speaker, ler mon lo sa laliny osi, mon ti a kontan osi remersye tou dimoun dan mon distrik ki'n donn zot *wayleave* pou fer kek proze, oubyen pou amelyor lavi kek zabitan. Menm parfwa pa pou zot. Me, pour bann ki pli o. Sirtou avek parey nou dir, *wayleave*.

La mon pou remersi Ms Naan Vidot, ki'n donn nou permisyon pou met en zoli *bus stop* lo son propriyete, ki zabitan La Louise ti pe espere pour en bon pe letan.

E osi Mr Raymond Louise, ki tre byento in fini fer bann finalizasyon, ki bann zabitan dan *Fairview Estate*, apre ki tou lazournen ler mon vwar zot lo *bus stop* Mr Speaker. Mon leker i fermal.

Mon demande. Konmsi, akoz tou sa lannen sa bann dimoun in koumsa pe esper bis dan soley, lapli, loraz? Me, nou'n konmans en

konversasyon ek son met kot zot pe esper bis konmela. Me sa madanm in fer mwan ganny en konpran ki i annan en proze prive ki li i pe al fer lo la.

So, se pour sa rezon kot nou'n bezwen apros Mr Louise, kot li volonterman in donn nou permisyon. Kot tre byento nouvo *bus stop Fairview Estate* pe al ganny konstrir.

E la nou pou bezwen osi ganny en konversasyon avek distrik Les Mamelles. Kot son balizaz lot kote, pou nou gete ansanm si nou kapab fer sa de proze, kot i ava annan li 2 *bus stop* ansanm. E sa parey nou dir, i pou en konversasyon ki nou pou ankor pe diskite.

An terminan Mr Speaker, mon ti a kontan osi remersye mon Clerk, Ms Nadia Valentin pour son zefor ekstrenm ki i donn mwan toulezour dan mon louvraz.

E osi Biro Ladministrasyon Distrik. Sa i enkli mon *DA*, Ms Florentine. *Office manager* Ms Sylvianne. E osi Ms Emily. Ek tou lezot travayer dan Biro Ladministrasyon Distrik ki enkli nou *welfare officer* ek nou *social workers*.

Ki ankor, sa lannen mon'n konnen poudir i pou en lannen vreman travayant. Alors, nou pou met tou nou zefor ansanm, pou nou fer sir tou sa ki nou fer, nou fer li dan

lentere distrik Plaisance. Avek sa Mr Speaker, mon ti a dir ou mersi.

(APPLAUSE)

MR DEPUTY SPEAKER

Mersi Onorab Labrosse. Aprezan mon pou pas laparol avek Onorab Rachel Spiro, ki i ava osi son *maiden speech* pour Lasanble Nasyonal.

HON RACHEL SPIRO

Mersi Mr Speaker. Bonn apre midi Mr Speaker. E bonn apre midi tou mon bann koleg Onorab. Bonn apre midi tou dimoun ki a lekout.

Konman en *nouveau venant* dan Lasanble Nasyonal, mon oule remersi *leadership* mon parti pou konfyans ki in fer dan mwan. Parey mon'n dir mon en *nouveau venant* dan Lasanble. mon oule remersye tou bann Manm ki'n akey mwan dan sa 7eme Lasanble osi.

Mon sezi loportinite pour fer en analiz o profon ler mon'n la anndan. E sa latmosfer ek lenportans sa lenstitisyon i fer mwan santi ki mon'n byen bezwen annan en sans responsabilite pour defann lentere sa nasyon e Gouvernman dizour rankont avek pep Seselwa.

Se dan sa lespri ki mon'n fer mon analiz pour reponn sa premye diskour lo Leta nou

Nasyon, ki mon'n swiv e ekoute konman en Manm Lasanble. Akoz, lepase mon'n ekoute Leta Lanasyon parey lezot sitwayen Sesel.

Ozordi mon konekte tou lede ansanm. E mon santiman, se ler mon pe analiz sa diskour lo leta mon nasyon ki Prezidan in fer. Malerezman mon bezwen dir, ki mon e lezot mazorite Seselwa, i tre dezapwente.

Sa i akoz Prezidan pa'n tous lo bann keksoz ki pe afekte Sesel ozordi. E malgre mon'n ekout bann Manm Lasanble LDS koze, pour sey fer krwar ki tou keksoz i *ok* zot pa'n kapab reziste fer sorti sa lalis litani problemm relye avek linefikasite zot administrasyon.

(APPLAUSE)

HON RACHEL SPIRO

E tou sa i komans par mon ser koleg, Onorab Deshiela Bastienne swivi par lezot manm LDS ki'n koze. I kler ki zot *tune* pa aziste akoz zot in menm admet ki zot pa satisfè ek servis ki pe ganny donnen. Tel koman bann o zofisye ki pe *travel* e servis met lapwentman kot Lopital ki fer dimoun fristre.

Mr Speaker, LDS in penn en portre ki zot Gouvernman pe *fail*, kontrerman avek sa ki Prezidan in dir Zedi pase.

Aprè ki Onorab Naddy Zialor in vin sey, reaziste pozisyon son lekip pour koz lo pozitivite. Malerezman, apre servi plis ki 30an dan Lopozisyon zot pa kapab kasyet zot natir.

(APPLAUSE)

HON RACHEL SPIRO

I malere Mr Speaker, sa ladres ki Prezidan in fer napa naryen sibstansyel, o kontrèr i pa reflekte vre leta Nasyon o komansman 2024. Annefe, pandan lazournen yer e ozordi mon'n tann plizyer konplent lo inefikasite zot Gouvernman sorti lo kote LDS menm si zot oule fer nou krwar tou keksoz i *ok*.

Me Mr Speaker, Seselwa i en nasyon byen entelizan, ki vwar byen kler e kapab demaske tou sa bann mansonz pou vwar vre leta ki nou ladan. Vre Leta nou Nasyon, se ki sa pei pe ganny dirize par en dirizan ki pa konn naryen lo lafason pou diriz en pei. E pandan sa 3 lannen...

(APPLAUSE)

HON RACHEL SPIRO

I pa'n fer en zefor pou li aprann e ozordi be blanm tou dimoun pou son linefikasite.

(APPLAUSE)

HON RACHEL SPIRO

Mon enterakte ek en kantite dimoun, mon fer letour dan en kantite distrik. Mr Speaker, sa ki mon vwar i sok mwan. bokou sa bann dimoun pa pe viv an dinyite e Gouvernman pa pe get dan sa sityasyon dan en fason serye. Mon mazin sa msye St Louis ki pe viv tousel e ganny difikilte pou fer fas ek son bann aktivite toulezour.

Mon mazin sa madanm dan *Belonie* ki li osi pe fer fas ek plizyer difikilte. Mon mazin sa msye Les Mamelles ki dir mwan i pe bezwen aste latizann dan farmasi aköz Minister Lasante napa.

Prezidan in koz bokou e menm tro bokou. Prezidan ti'n devret dir nou ki apre ki in analiz sityasyon dan sa pei i ti'n devret donn nou. Donn sa bann dimoun en logmantasyon pou sa ban dimoun aze, e sa ti a reflekte larealite bann dimoun aze ozordi.

(APPLAUSE)

HON RACHEL SPIRO

Mr Speaker, nou'n tann koz bokou lo en ladministrasyon ki konsilte. Apre 26 *meeting* piblik kot sitwayen in met ater tou sord kalite problem ki mazorite pa ankor ganny rezourd. Oubyen sa

ladministrasyon in zwe sourd lo zot. Prezidan pa kapab vin koz lo konsiltasyon.

Annou pran en legzanp tipik, bann dimoun dan Sekter Tourizm. Bann pti letablisman ki ti dir ki sa *tax* lanvironnman pou afekte zot bann pti biznes. Me eski i ti ekoute? Repons i non.

(APPLAUSE)

HON RACHEL SPIRO

Si sa Gouvernman i vreman konsilte, kestyon se ki aköz ki i kontinyen pe fer mars aryer e retourn lo son bann desizyon?

Sa i senpleman aköz i en Gouvernman ki oule fer gro lebra. E fer krwar aköz i annan en mazorite dan Lasanble, zot pa bezwen fer konsiltasyon. Se selman ler pep i proteste, e ler presyon i ganny mete lo son ladministrasyon ki parfwa e mon dir byen parfwa ki zot rekonsider zot bann desizyon.

Sa i klerman montre ki nou annan en Gouvernman ki pa konsilte e ki fer son pep fristre. Sesel in fer progre aköz in toultan kont lo son lafors travayer ki debourye e fer nou pei fyer. Me mon oule montre lapresyasyon pou sa lafors travayer ki Prezidan i plito menase. Sa in menas sa bann dimoun e in refer lo travayer piblik ki pa pe deliver, ki pe

trenn lipye. E menm dir ki zot en bann move zanfàn.

Mr Speaker, Sesel bann travayer i travay dir, me parfwa zot mal ganny rekonpanse. Sa i fer mwan mazin ankor lo sa madanm, lo sa bann fame *meeting* piblik kot en travayer in sey fer Prezidan konpran sa inegalite dan pansyon ant bann Lapwentman Konstitisyonnèl e bann lezot kad travayer. La ankor Prezidan in zwe sourd e zet sa size anba, an dizan ki napa *one size fits all*.

Prezidan in plito servi menas anver travayer Servis Piblik, e dir ki si zot pa pe delivre zot pou ganny pouse. Tou travayer dan sa pei i anmenn en kontribisyon valab pour fer lekonomi en pei marse. Servis piblik i annan en fason ki dil ek travayer ki pa delivre. I pa plas en Prezidan pou dil ek travayer dan Servis Piblik.

(APPLAUSE)

HON RACHEL SPIRO

Se sa Mr Speaker, ki apel viktimizasyon travayer. Sa ki apel la diktatir. Sa i pirman en manev pou pous serten dimoun dan travay angiz zot pa pe delivre.

Viktimizasyon dan sa pei i ankor pe ron z sa sosyete, ki sa travayer ki ganny fer aret travay pou bann rezon ki pa valab, oubyen zis zot kontra pa'n ganny renouvle, oubyen zot kontra in ganny terminen.

Mr Speaker, sa i montre lenterferans kler lo lafason ki Egzekitiv i fonksyonnen. Kot en lord i kapab sorti pli o, pou termin lanplwa en travayer Sekter Piblik. Nou pa kapab annan en Prezidan ki kontinyelman enterfer e *micromanage* tou keksoz dan Servis Piblik.

(APPLAUSE)

HON RACHEL SPIRO

Sa ladministrasyon i bezwen les bann teknisyen fer zot travay. E si i annan en dimoun ki bezwen ganny pouse se Prezidan li menm ek son prop *Cabinet*.

(APPLAUSE)

HON RACHEL SPIRO

Zot ki bezwen *step down* e les en lot ki kapab diriz sa pei pran labar.

Linite pa pou zanmen egziste dan sa pei, si bann *leaders* pa aret viktimiz son sitwayen. Pa pou zanmen annan linite ler dan en

Lasanble Nasyonal lensilt pou denigre bann dirizan ouswa en adverser politik i ganny permet. Pa pou zanmen annan linite ler dimoun i kontinyen ganny anprizonnen zis par malis.

E mon enplor ou Mr Speaker, pou met en lord dan Lasanble kot respe e tolerans a ganny aplike. Mon enplor ou pou fer sa dan en fason enparsyal. Mwan, mon'n vwar ki napa enparsyalite e *no wonder* Lopoziyon i bezwen reakte dan sa fason. Aret tret Lopoziyon dan en fason e an rezilta sa Lasanble a kapab vin sa premye landrwa kot respe pou bann *leaders*, respe antre nou ban Manm dan Lasanble, nou bann adverser politik e nou sitwayen i ava kapab ganny en fason fer pou zot swiv.

Pou napa linite e rekonsilyasyon si Prezidan pe pres lo la. Ki pa pres lo la koman en valer kle. Leta nou Nasyon ozordi se ki Lopoziyon pe sey reprezant konsern lepep e mazorite *LDS* pe bloke.

(APPLAUSE)

HON RACHEL SPIRO

Mr Speaker, ozordi dan Sesel dimoun i kontinyen soufer pourtan avan 2020 seval

batay *LDS* ti pri lavi. E ki Gouvernman fodre fer desann pri lavi. Zot ti menm annan formil mazik ki mannyer pou fer desann pri lavi. Me ozordi nou tann zis leskiz, partou dan lemonn pri in monte. Sa pep pa anvi tann sa, sa pep i oule ou ki respekte e deliver lo son bann promes ki in fer pou ganny elekte.

(APPLAUSE)

HON RACHEL SPIRO

Zot pa bezwen en dirizan ki fer zis fo promes avek son pep. Sa menm Gouvernman ki oparavan pa ti vwar nesesite *STC*, e ki ozordi se zot menm ki krwar dan *STC*. I bezwen reste e ganny partaze pou rekonpans bann ki'n finans konpany eleksyon.

(APPLAUSE)

HON RACHEL SPIRO

Sa Gouvernman in *fail* lo sa size fer desann pri lavi. E pou bous lizye Seselwa, i dir ki zot pe al fer desann pri lo serten komodite kot *STC*. Me an realite, se ki lo marse pri pa pou desann.

Dan enn son bann program politik pou bat latet Seselwa pou ganny vot, Gouvernman *LDS* ti promet pou sekwe pye pou ranpli pos Seselwa. Me la ki nou war? Vre Leta nou Nasyon, se ki pri

elektrisite ek delo osi in monte e tou lezot komodite in monte. Napa naryen ki pe antre dan pos Seselwa.

(APPLAUSE)

HON RACHEL SPIRO

La mon mazin sa manman ki annan 2 oubyen 3 zanfan, ki pe al lekol e ki pe plennyen. Pa kapab aste liniform, sak lekol e kaye pou son zanfan pou larantre lekol. Mr Speaker, sa i ras ker.

In pran sa Gouvernman plis ki 3an pou zot realize ki sa pep pe soufer. E ki zot dan difikilte, selman zot deklar zot lekor koman en Gouvernman ki reste konekte.

Sa i fo, zot en Gouvernman ki sourd lo soufrans sa pep. Zot plito en Gouvernman ki pe fer sir zot ranpli zot pos lo soufrans malere. E bann fanmir i kontinyen soufer e napa larzan dan pos. Larzan pe al dan sa ki pour zot.

(APPLAUSE)

HON RACHEL SPIRO

Lasistans sosyal pou bann fanmir in vin en zouti politik pou LDS. Kan sa Gouvernman ti vin o pouwar an 2020, preske tou lasistans sosyal ki bann fanmir ti pe gannyen ti ganny koupe. Akoz dapre

Gouvernman LDS ti annan tro bokou labi.

Mon'n vwar dan mon prop lizye Mr Speaker, kot en madanm ki ti travay ek *Cleaners Corporative* ki'n eskente, ki'n sey tou pou fer 2 bout zwenn. Me det e pert son *partner* in fer li tonbe.

Ki mannyer ASP anba LDS in fer sa madanm vir an ron. Son zanfan in soufer. Wi Mr Ramkalawan, akoz move desizyon ki ou, ou'n pran. Olye adres labi, lasistans pou bokou fanmir in ganny koupe di zour o landmen.

Bokou fanmir in vwar zot dan dezespwar e en kantite fanmir in soufer e ankor pe soufer akoz zot pa kapab fer 2 bout zwenn. La an 2024, Prezidan i vin dir nou ki lasistans in ganny revwar e menm ogmante. Byensir lasistans bezwen ganny ogmante akoz pri lavi osi in ogmante plis ki zanmen.

Se prezan ki sa Gouvernman i rekonnet ki serten fanmir i bezwen lasistans. Sa i montre ki sa Gouvernman i pa enterese ek *welfare* son pep, e ki zot dekonekte ek realite.

Sityasyon drog Mr Speaker, in vin pli pir ki zanmen pou en pti pei parey Sesel, e deplizanpli plis zenn pa pe ganny eparnye. Ler Prezidan i dir ki politisyen ki pe soutir droger, mon demann

mon lekor, lekel politisyen ki Prezidan be blanmen?

Sel politisyen ki mon konnen i frekant droger se pa lot ki sa enn ki annan lalis.

(APPLAUSE)

HON RACHEL SPIRO

Son ladministrasyon napa en stratezi konkret lo ki fason pou dil ek bann trafikan. Antretan ki i pe rod solisyon e fer sanblan, bann adikt e zot fanmir i ganny teroriz par sa pti group zonm maske ki pran lord pli o. Apre ki zot in fer tou sord dega e teroriz bann zabitan kot zot lakour parey dan *Corgat Estate*. Prezidan i deklare ki *Corgat Estate* in vin pli an sekirite. Sa i zis en fars pou tir latansyon lo vre probleNm. Akoz Mr Speaker, sa pa laverite.

Laverite se ki tou prograNm reabilitasyon ki ti annan an plas pou sa bann adikt in ganny detri par sa ladministrasyon. Bokou sa bann zenn in napa en landrwa e pe forse mandyan. Zot napa lanplwa akoz tou sa ki ti annan ki zot ti pe sey fer in arete.

Drog in ganny sezi e apre dir in ganny detri, me selman napa okenn laprev. Medya pa ganny met okouran, laverite i ankor pe ganny kasyet e antretan bann paran i kontinyen soufer.

Prezidan i kontinyelman donn *warning* parti *warning* bann *dealers*. Tandis ki sa travayer Sekter Piblik ki fer byen son travay, li i ganny pouse zis akoz in refize fer faver en gro sef dan *LDS*.

(APPLAUSE)

HON RACHEL SPIRO

Enn zot bann gran siporter, e *sponsor*. Sa travayer li, ni en *first warning*, direk *out*. I'n ganny met deor Mr Speaker. Vwala vre Leta nou Nasyon. Trafiker drog pe ganny soutire e sa travayer i ganny met deor.

(APPLAUSE)

HON RACHEL SPIRO

Mr Speaker, konman en manman mon debout a kote tou fanm Seselwa ki travay e trimouse. Mon konpran zot soufrans e mon garanti zot ki *United Seychelles* i annan en plan pou reabilit bann adikt.

Pourtan Mr Speaker, Prezidan i konn tou sa bann *dealers*, selman nou pa ankor zanmen elimin drog dan nou pei. Mr Speaker, Prezidan fodre parey Angle i dir '*put your mouth where your money is*', e *deal* ek sa bann trafikan.

(APPLAUSE)

HON RACHEL SPIRO

Si sa i anmenn mwan lo sa size Lasante. Nou servis lasante ti enn ki ti pli meyer dan larezyon.

Mr Speaker, mon pe ganny enteronpe.

Nou servis lasante ti enn ki pli meyer dan larezyon. Apre zis 3an anba sa ladministrasyon, servis in deteryore e dimoun in per pou al lopital. Nivo lizyenn in desann, lopital in vin pli sale e sa ladministrasyon i kanmi pou dir Sesel in etabli en nouvo rikord.

Pa enn ki nou kapab felisit nou lekor, felisit sa ladministrasyon. I en rikord perdi 7 pti baba dan en kourt lespas letan. Sa i en premye dan listwar Sesel. Dan en letan kot nou napa en pandemi, nou perdi 7 pti baba sa i montre klerman en deteryorasyon enkyetan, dan nou servis lasante. E sa i fer lapenn.

Mr Speaker, ler en lopital i bezwen esper zis donasyon dra, lili, *wheelchair* e latizann pou donn swen bann pasyan. Ler en pasyan olye geri i sorti lopital ek lenfeksyon. Eski Leta nou Nasyon i an bonn sante?

(APPLAUSE)

HON RACHEL SPIRO

Larepons i non. O kontrer i montre ki menm si lasante

lannen apre lannen nou'n investir ladan, sa larzan pa'n ganny byen servi e nou pli move ki avan. Sesel in toultan premye dan plizyer domenn, ki swa dan larezyon oubyen dan lemonn.

Prezidan in donn lenpresyon ki sa in arive dan sa dernyen 3an, be sa i fo. Sa ki laverite se ki telman in oule pran laglwar e donn son lekor meday. Prezidan in vin premye Prezidan pou donn son lekor en meday doner. Prezidan pe rekonpans son lekor pou lenkonpetans e linefikasite.

(APPLAUSE)

HON RACHEL SPIRO

Rol medya se pou enformen e edik sa pep. Mr Speaker, ozordi dan Sesel medya nepli kapab zwe son rol san lenterferans. Nou annan en dirizan ki pa pa'n ganny formasyon konman en zournalis me ki oule fer louvraz zournalis. I menm oule dir zot ki mannyer pou fer zot reportaz, fodre zot reportaz i dir ki i pe fer tou byen.

Me Mr Speaker, Prezidan i bezwen konpran diferans ant son rol e rol medya, e aret enterfer.

Si zournalis i kler tors lo bann sityasyon ki son ladministrasyon pe kasyet, fodre pa ki i pran lakoler. Fodre rann kont sa pep, e aret

soutir serten dimoun dan son ladministrasyon pou fer plezir bann investiser.

Gouvernman i la pou sof gard nou lanvironnman e nou bann aki. Me zot pe fer tou lekotrè. Proze kapital pou 2024, en long lalis proze in ganny prezante.

Ler mon gete ou a krwar sa Ladministrasyon i fer zis *wishlist* san en bon plan. Akoz en Gouvernman responsab i bezwen annan son lalis proze kapital, e priyoritiz li e met finansman pou proze materyalize. Si non proze zanmen pou ganny konplete, oubyen i pran bokou lannen pou ganny realize ouswa i pa pou ganny realize ditou.

Legzanp tipik i sa fame Klinik Baie Lazare. Se selman prezan ki *tender* i ganny sinyen. E zabitan Baie Lazare pe kontinyen espere. Tou sa bann proze Mr Speaker, napa leksplikasyon valab akoz zot pa ganny realize. Pourtan larzan ti'n ganny mete dan Bidze. Si i korek ki pei pe fer byen, mon pa vwar rezon akoz bann proze pa pe ganny fer.

Eski nou larzan *tax* pe ganny byen zere anba sa Ladministrasyon? Oubyen pe ganny servi pou bann benefis personnel? Tel ki bann voyaz a aletranze, gro, gro *allowance* par si parla.

Mr Speaker, larzan *tax* bezwen ganny zere pli byen e

ki Gouvernman i arete trangle sa pep pou demann donasyon e fer *fundraising* pou zer sa pei.

Sitwayen in vin pli per pou eksprim zot lopinyon. Pourtan sa i enn nou drwa. Prezidan i dir ki sitwayen i lib pou eksprim zot konmela, be sa pa korek. Akoz ler dimoun i fer kritik kont son Gouvernman oubyen dir kwa ki mal zot ganny targete.

Si dimoun i lib, akoz ki *CID* bezwen fer dimoun raport kot kord gard Santral pou fouy lo zot telefonn, pran zot *fingerprint*, oubyen met zot dan kaso akoz zot in eksprim zot lopinyon.

Si nou annan laliberte lekspresyon, akoz ki medya pa kapab fer son louvraz san lenterferans? Akoz ki bann program tel parey lopinyon i en menas pou sa Gouvernman? Akoz ki sa bann dimoun pa kapab annan zot prop lopinyon? Kwa akoz zot lopinyon i diferan avek sa ki ou anvi tande?

Sa Gouvernman pa pare pou aksepte okenn kritik kont li. E se pou sa rezyon a tou pri dimoun i ganny anpese eksprim son pwennvi pangar laverite a sorti. Mr Speaker, laverite nou pa pou kapab kasyet i pou bezwen sorti a tou pri.

Mr Speaker, sa size lanplwa i enn ki trakasan.

Bokou zenn ki mon koz avek ki'n kit lekol i ankor pe ganny difikilte pou ganny en lanplwa. Mon oule refer lo ou sa garson ki mon'n esey tou pou fer li ganny en lanplwa, me ziska la pa ankor ganny en plasman. E pa pe kapab kontribye pou ed son paran.

Gouvernman pa pe koz lo ki fason sa pou ganny adrese. O kontrer, Prezidan pe fer lafanfar lo kantite lotel ki pe ganny konstri, oubyen pe al fer louvertir byento. Prezidan i devret dir konbyen zenn ki la deor ki pe al ganny lanplwa dan sa bann lotel? Oubyen zot pou ganny dir zot napa leksperyans?

Plis lotel i ouver, plis lanplwa pou etranze. Akoz napa en bon program formasyon ki ganny egzize par Minister Lanplwa pou kapab asire ki Seselwa i antre dan lanplwa.

Hon Zialor, in koz lo spor e bann *sportsman* mon oule i mazin byen lo ki parti *United Sesel* in fer pou li, pou ankadre li pou li vin sa ki i ete ozordi.

Nou bann *sportsman* in fer Sesel fyer. Nou tim *Volleyball*, nou bann bokser tousala in fer sikse. Avan 2020 *sportsman* Sesel ti pe fer sa pei fyer. Zot in anmenn en kantite meday.

Ozordi bann zenn *sportsman*, bezwen marse rod

sponsor pou zot partisip dan *sports*. Mr Speaker, Minis *Sports* ti pou retourn Sesel ek en *cargo* avyon plen ek meday. Me ki nou vwar? Ni en kartron meday Minis pa'n ranpli.

(APPLAUSE)

HON RACHEL SPIRO

Minis in *fail*.

Mr Speaker, Prezidan in refer lo lasistans pou bann *sportsman*. Be oli lasistans? Lasistans *sportsman* ti gannyen avan, me pa la anba sa Ladministrasyon.

Mr Speaker, Sesel ti annan en bon sistenm ledikasyon ki ti an plas. Me apre sa detrwa lannen, ledikasyon ti'n ...

Apre sa detrwa lannen ki nou'n donn ledikasyon e bon loportinite tou nou bann zanfandepi periskoler ziska liniversite pe enport son mwayen. Me ozordi nou labaz ledikasyon pe deteryore. Bann lekol pe fer fas avek bann mankman lekipman e napa resours. Resours i tre limite, oubyen napa ditou.

Bann lafnet ki'n kase, lekol ki pe koule. Tousala i vre sityasyon ki letan nou nasyon i ladan. Menm si Prezidan pe mansyonn lakantite zenn ki'n al etidye aletranze, sa pa vedit ki nou sistenm ledikasyon pe fer pli byen. Performans nou bann zenn, pa alaoter.

Pourtan Minis Ledikasyon in envestir larzan dan teknolozi. Nou ti pou ganny en sistenm ledikasyon pli *high-tech*.

Mr Speaker, ler labaz pa amelyore vin ek tou teknolozi, rezilta pou parey. Sa ladministrasyon i rod tou fason pou dekouraz sa bann teachers. E nou perdi bann *teachers* byen kalifye. Fodre ki sa Gouvernman i aret koz ledikasyon labous plen.

Mr Speaker, koman en nouvo Manm Lasanble mon pa pou pretann konn tou keksoz. Me mon kapab dir sa pti bout ki mon'n tande depi yer ek ozordi, mon demann mon lekor si Seselwa in fer en bon swa.

(APPLAUSE)

HON RACHEL SPIRO

Oubyen eski sa bann promes ki'n sitan dou, kot sa ki ti dimyel an 2020 in vin vineg an 2024. Pep Seselwa pe demande ki ou ek ou Ladministrasyon in delivre lo tou sa ki zot in promet pandan sa dernyen 3an. Arete fer zot tourn an ron, sa pep in nepli anvi antann leskiz. 2025 pa lwen, e Seselwa pa ankor vwar naryen ki ou ek ou Ladministrasyon in fer.

Mr Speaker, Seselwa in fatigue viv lo fo promes. Zot oule war en meyer Sesel e en lavenir pli briyan. Sa

Gouvernman in *fail* sa pep. Seselwa in nepli kapab esper 2025. Zot pe dir ou Mr Prezidan ek ou Ladministrasyon sed laplas, e les en lot diriz sa pei. Mwan mon dir ek Seselwa, ki an 2025 *US* sel opsyon pou Sesel.

(APPLAUSE)

MR DEPUTY SPEAKER

Mersi. Mon pa ti anvi entervenir enteronp Onorab Spiro parski ti son *maiden speech*. E alor nou'n gard sa, me selman in fer en remark akoz in adres lofis Speaker. E lefe ki mon dan sa *chair* la, mon oule zis kosyonn Onorab. E rapel tou dimoun, tou dimoun nou *Order* 59 partikilyerman 59 (5), 59 (7) (d). E pou okenn Manm ki annan okenn problemm avek Speaker, ki ou dan parti mazoriter ou parti minoriter mon zis rapel bann Manm ki *Order* 14 i fer provizyon ki manner nou *handle* sa.

Donk, nou zis...

HON SEBASTIEN PILLAY

(Off-mic)

MR DEPUTY SPEAKER

Wi, mon pe kosyonn zot *order* ki ou pa fer bann *mistake*...

(Interruption)

MR DEPUTY SPEAKER

Onorab Pillay! Onorab Pillay!
Mon ava ganny lord silvouple.
Mon ava ganny lord.

So, mon pe zis kosyonn
bann Manm parey mon fer tou
letan. Nou bezwen konn nou
Standing Orders. E ki alor nou
pa fer bann *rookie mistakes*.
Mersi. Nou pou *adjourn* la e
nou re pran travay 4er. Mersi.

(BREAK)

MR DEPUTY SPEAKER

Welcome back tou dimoun. E
nou kontinyen avek nou
travay pou sa Merkrede. Nou
dernyen morso travay. E
prosen entervenans ki pou
donn son reaksyon lo Diskour
Leta Lanasyon par Prezidan
Larepublik, se Onorab Sathya
Naidu.

HON SATHYA NAIDU

Mersi Mr Speaker. Tou Manm
Onorab, *staff* Lasanble
Nasyonal. Ser ek frer pep
Seselwa, bonn apre midi. E en
bonn apre midi spesyal i al
pou zabitan St Louis. En
group zabitan ki'n toultan
rezilyan, malgre serten defi
parfwa ki nou kapab
rankontre dan lavi. Nou
sirmont li atraver
determinasyon ek kouraz.

Mr Speaker, Oktob 2020,
Sudarsan Sathyanarayanan
Naidu, 1280 vot i fer 60
poursan vot an term konfyans

ki dimoun St Louis ti met dan
mwan.

(APPLAUSE)

HON SATHYA NAIDU

E pour sa mon dir mersi. E
kekfwa sa 40 poursan ki pa ti
vot pou mwan, zot kapab donn
konsiderasyon neserer pou
donn mwan tou sipor. E mon
pou donn zot en lide aköz.

Premyerman Mr
Speaker, i donn mwan en gran
loner ek plezir pou mwan
prezant mon katriyenm
repons par nou premye
Prezidan Elekte.

Zabitan St Louis, mon dir
avek tout lafyerte. En zonn
ki'n lite pou 35an kot in donn
tou son kouraz pou sa pep ek
sa pei. E pou li apre plizyer
defet i pa'n zanmen les tonbe,
e pou li finalman ariv premye
Prezidan Elekte.

I ti annan serten ki ti dir
i pa pou zanmen war baro
State House. Me toulezour i
vwar baro *State House*, koman
Prezidan Ramkalawan.

(APPLAUSE)

HON SATHYA NAIDU

Sa slogan 'Sesel pour tou son
zanfan' mon panse ki Bondye
ki'n deside ki ler i pou'n
komans son manda ti pou vin
lo sa slogan.

Sa slogan i promouvwar
linite, i elimin viktimizasyon. I

promouvwar egalite, i promouvwar en sosyete ki baze lo merit. I promouvwar diversite. I promouvwar politik avek prensip.

Mr Speaker, mwan mon fyer pou form parti sa misyon sakre pou transform mon pei e mon distrik. E pou anmenn prosperite pou mon pep. Latas devan mwan avek Prezidan ek tou bann dirizan lo kote *LDS* i enn ki enorm. Me i pa enposib. Si nou travay dir nou kapab fer li. Zis parey ler nou ti *deal* avek problem *COVID* atraver en program vaksinasyon efikas ki Sesel ti pe ganny rekonnèt lo en baz mondyal.

Nou'n asire ki nou'n reouver nou frontyer pou fer sir ki nou pilye prensipal tourizm i re debout lo son lipye. Nou bann ser ek frer ki pa ti dan lanplwa, i ganny sans pou retourn dan lanplwa. Get kote Sekter Tourizm i ete ozordi. Zis parey *Air Seychelles*, kot Sekter Lavyasyon ti pe fer fas avek en kriz. Plizyer *Airline* ti pe frenmen, e *Air Seychelles* ti pou enn. Me gras a gouvènan *LDS* atraver Prezidan, Vis-Prezidan, Minis Hassan ek son delegasyon lo kote Departman Finans, zot in kapab fer travay neser pou fer sir...

(APPLAUSE)

HON SATHYA NAIDU

Pou fer sir ki *the Creole Spirit is soaring high in our skies*.

Mr Speaker, mon oule felisit bann zenn dirizan kot *Air Seychelles* ozordi. Sa 2 zonn pe fer en travay formidab. E mon rekonnèt sakrifis ki bann travayer *Air Seychelles* ti bezwen fer pou gard nou aeryen nasyonal a flot. E mon salye zot pou sa.

Mr Speaker, ler nou al partou kote dan tou kwen Sesel nou vwar devlopman. Sa i demontre lavolonte *LDS* koman sa parti pou met lenfrastruktir annord pou epanouisman nou pep.

Mr Speaker, nou pep i annan en kantite lekspektasyon. Parfwa mon santi lekspektasyon i pa realistik, e apre pli tar mon ava donn serten legzanp.

Me selman nou annan en Gouvènan ki'n demontre poudir ki i pare pou ekoute kan fodre. E si nou bezwen revwar en desizyon, i pa savedir en siny febles. Me plito nou annan en Gouvènan ki reponn a lavwa e lapel nou pep. Mon pep nou bezwen fer en refleksyon serye. E mwan *comme d'habitude* mon pou fran e onnet dan mon refleksyon.

Prezidan Ramkalawan, i fer 4 fwa ki ou'n koz lo servis piblik. Mon konpran ou fristrasyon espesyalman

koman en Prezidan ki pa dan biro, i al lo teren, i konnekte ek son zabitan.

(APPLAUSE)

HON SATHYA NAIDU

I fer tou sa ki posib pou rezourd problem nou pep.

E se la kot i konpran problem ki nou annan dan *civil service*.

Zis parey li, mon osi mon partaz menm santiman. Mon konnen *RBM*, i en zouti ki nou'n *roll out*. I en zouti ki mon santi ki dan le fitir nou pou kapab vreman vwar son lefikasite dan son lanplè total.

Rezon se akòz nou annan 11 mil travayer dan *civil service*. Ekskli bann *carers*. E alors i pou pran en pe letan pou nou fer sir ki sa i marse. Kot ler i pou marse, nou pou kapab fer en distenksyon kler ant sa ki pe travay e ant sa ki pe trenn lipye.

Mr Speaker, mon kontan ki mon Gouvernman in pran sa linisyativ pou met sa zouti an plas.

Sa program *Executive Leadership* ki annan mal ladan? En bann kankan lo kote Lopozisyon. Dan lavi zanmen ou aret aprann, ou aprann toulezour. *You learn new things*, ou *upgrade*. *E what is wrong?* Ou'n anvoy en group *PS* avek *CEOs* pou zot

ganny en pe plis konesans, pou zot aprann bann *best practices*.

Konbyen nou koman bann Onorab ler nou vwayaze, nou pa al *workshop*? Onorab Pillay pa'n zanmen ale dan son lavi? I konn tou li? i annan en boul kristal ki dir 2030 kote nou pou ete? Annou realistik parfwa. Sa i klerman mank respe pou tou bann *PS*, pou tou bann *CEOs* ki pe travay pou sa pei.

(APPLAUSE)

HON SATHYA NAIDU

Mr Speaker, mon bezwen dir ki mon swe se sa *leadership program* pou bann ki'n ale la. Mon swe se ki zot met sa an aplikasyon. Mon swe se ki zot met sa ki zot in aprann an aplikasyon.

Mon annan gran respe pou zot. Me selman tanzantan mon bezwen enterfer, pou kapab rezourd problem mon dimoun.

Ler ou *MNA*, parfwa zot demande ki kalifikasyon, *jack of all trades*. Mon fer tou lo lapar mon zabitan pou fer sir ki zot dosye, zot *files*, zot ka i bouze, i ganny ekoute nou kapab trouv solisyon.

Me selman parfwa, wi ou bezwen *micromanage*. Me mwan en dimoun vreman determinen, se sa rezon akòz zot in met mwan dan sa

Lasanble. Se sa rezon akoz zot in met mwan koman Manm Elekte pou distrik St Louis. Malgre ki US sa letan ti fer en konpany sal kont mwan.

Me ozordi, *the proof is in the pudding*. Me an relasyon avek travay, travay ki bezwen ganny fer pou bouz *file* dimoun ler i pa arive apre plizyer rankont, plizyer *meeting* i rann mwan fristre.

E se la kot mon pou servi Lasanble Nasyonan koman en Lezislater, pou desarz mon rol *oversight* kot keston pou ganny demande pou fer sir ki sa bann departman relevan i delivre ver aspirasyon mon bann zabitan.

Mr Speaker, en lot size se tro bokou birokrasi dan Gouvernman. Les mwan ilistre serten legzanp. Ler i annan en proze semen, semen Kato. Apre 30an ki zabitan St Louis in demande, i dan *pipeline*, i pe vini. E an relasyon avek sa proze, *Board Planning* in bezwen revizit proze. Mon apresye ki mon'n ganny envite. Me keston ki nou pe poze, be si *planning* depi o komansman in vwar ki plan i bon, *wayleave* in fini ganny donnen. Akoz eski nou bezwen retourn ankor kot *Board Planning*?

Ou vwar, *you see where the red tape is*? An relasyon avek en biznesmenn ki pe atann pou ganny en repons.

Lenformasyon i bezwen vin a tan, *time is money and money is being lost for that entrepreneur*. Fodre ki nou fer sir, fodre ki nou fer sir ki lo kote *planning* lo kote *licensing* pou sak kategori *what is the 5 requirements*.

Servi medya, vin avek en ESA, vin avek *licensing* pou ki napa mankman konprezon lo sa biznesmenn. An sa ki konsern sa provizyon dan *Physical Planning Bill* ouswa regilasyon ki an plas pou li konpran byen kot i devret debout. Akoz i annan pa mal endividi ki'n met sa konsern de lavan.

E mon bezwen dir ki mon annan en bon korperasyon avek *Mademoiselle* Angela Servina. Ler mon anvoy en *email*, deswit i reponn. Mon vremen kontan lafason ki nou travay, me selman mon bezwen partaz fristrasyon bann dimoun ki'n met mwan la.

Mr Speaker, ankor enn fwa mon lentansyon i pa pou plas tou bann *Civil Servants* dan en sel kategori. I annan zot ki travay vremen dir, zot donn 200 poursan dan zot *job*. Zot komans bomaten e zot fini aswar tar. E parfwa i annan serten zot ki bezwen fer en travay lezot. Me zot fer li. E se zot ki'n kapab ed mwan bouz mon distrik de lavan kot

ansanm nou'n kapab trouv solisyon.

Me selman efikasite dan *civil service* i reste en nesese. Akoz si mon'n fer mon bout, i reste pou ou fer ou bout osi. Se koumsa ki nou kapab avans nou pei ek nou pep de lavan.

Ler nou pe koz lo lavansman nou pep, Mr Speaker, i anmenn mwan lo size lanplwa. Ozordi partou kote kot mon ale, mon vwar ki i annan plis etranze. *And the trend is worrisome.* E nou bezwen fer tou sa ki posib pou nou kapab sanz sa tranzitwar, nou'n erite sa. I annan travay ki nou bezwen fer pou adres sa problem.

Size kot zenn pa pe ganny lanplwa akoz mankman leksperyans, i bezwen ganny adrese. Me selman mon santi ki parfwa sa *competency level* dizon en *certificate in carpentry for example.*

Dizon sa zenn i ale ek son sertifika kot en lakonpanyen konstriksiyon. Eski sa lakonpanyen konstriksiyon pou rekonnèt sa kalifikasyon? Eski i ase ouswa sa program *TVET* ki pe ganny revwar pou fer sir ki i ganny lanse dan en fason ouswa dan en moman apropiye? Eski i pa pou ede pou fer ki *S4, S5* pou ganny ou *certificate* pou ganny *advance certificate.*

Akoz kantmenm en zanfan pa akademikman doue

lo kote *skills*, isi Sesel nou annan konpetans. E si nou donn sa sipor nesese, *by the time* i pou'n ariv pos segonder i kapab ganny *diploma.* Ki fer ki i bokou pli atraktif pou sa anplwayer donn sa zenn sa loportinite. Kekfwa nou bezwen fer en refleksyon serye ver sa direksyon.

E mon lans en lapel avek *advisory committee* lo kote *SNYC* pou kapab pran a ker sa konsern ki zenn i annan. Akoz mon pe koz koman en reprezantan zabitan St Louis. E mon swe se atraver *SNYC*, atraver Departman Lanplwa, apart *My First Job Scheme* annou sey regarde.

Me selman mon bezwen dir, i annan 2 zofisye lo kote Departman Lanplwa ki mon lyez byen avek e mon'n kapab met zenn dan lanplwa.

E enn bann konsey ki mwan mon pou donn zenes se, pa perdi lespwar apre ki ou'n tap detrwa laport. Tape ziska ler ou ganny lanplwa. Les mwan donn en legzanp, mon madanm Hashini. Mon'n marye, i ti bezwen ganny lanplwa isi Sesel e i ti'n bezwen tap 24 laport avan ki in ganny lanplwa. E mon pou bezwen tous en size, e napa okenn konfli lentere.

Ozordi i *Canada* lo en *PR* i pe travay i pe debourye. E mon bezwen dir ki pou bann Seselwa ki'n marye avek en

etranze, i annan pa mal *red tape* ki zot, zot bezwen sirmonte. I napa *rent* pou peye, i napa *airfares* pou peye. Alors, annou sey protez sa *family unit* pou sa Seselwa ki'n marye avek en etranze, aret donn sa bann dimoun lenfirmite.

Annou sey fer nou mye posib pou nou kapab elimin sa *red tape*. Akoz i annan pa mal Seselwa la deor ki'n menm apros mwan e met sa konsern. Me en keksoz ki mon bezwen osi fer resorti avek Lanplwa, se latitud. Kiltir ki nou bezwen kiltive parmi nou bann zenn lo lafason ki zot regard travay. Dedikasyon sakrifis ki zot pou bezwen fer avan zot vwar en logmantasyon lo zot saler.

Pa eksepte premye zour vini, ou pou ganny logmantasyon mwan prosen, non mon frer ou bezwen travay dir. E alors i annan en nesosite pou revwar sa kiltir. Avan mon zenerasyon pou bann ki ti'n swiv dan bann lannen 80, 90 an montan. *There was a culture that was there amongst our people*. E dan ... mon pa konnen kot in perdi, lekel sa dirizan ki ti la.

Be sertennman pa Prezidan Ramkalawan ki ti Prezidan sa bann letan. Sa bann desizyon ki zot ti'n kapab pran pou protez nou zenerasyon pa'n ganny fer. E i reste lo nou pou fer sa.

Ozordi i enportan ki nou fer nou bann zelev depi a tre zenn az konpran lenportans ledikasyon. Pli ou edik ou lekor, posibilite i toultan la. 100 pousan la pou ou tir ou lekor dan lapovrete.

Si oule tir ou lekor dan lapovrete, *study hard that should be the message*. E an menm tan nou bezwen montre nou bann zelev, dan konteks Sesel napa vreman konpetisyon. *You do above average, you'll get a good job*. Dan lezot pei i pa leka, i annan konpetisyon entans pou travay. Isi Sesel *it's a land of opportunities*, e i enportan tou bann zelev i pran sa loportinite o serye.

Wi kekfwa ler mon pe dir sa, zot pou dir i annan disparite ek ant Seselwa avek etranze dan Sekter Tourizm. Ankor enn fwa en keksoz ki nou'n erite. Al regard *Labour Migration Policy 2019* Gouvernman avan, nou'n erite.

Me i ti a bon parey Onorab Lemiel, sel pwen ki mon'n dakor avek li dan son diskour. In dir ki nou bezwen konn *statistics*. Ki mannyer eski sa *localization plan* pe ale? Akoz i annan en leokri parmi bann Seselwa pou dir, *ahh...* nou pe ganny defavorize, isi laba.

So, annou sey gete ki Gouvernman dizour pe fer pou

adres sa *issue* dan Sekter Tourizm. E mon ava retourn lo ledikasyon.

Onorab in koz lo bann ansennyan. En keksoz ki mon bezwen dir se dan mon konteks, mon annan en bon relasyon travay avek Miss Medgee koman *headteacher Belonie* Segonder. Mon ti'n ganny sans asiste en rankont ant bann *staff*, ler zot ti pe prepar pou zot lannen. Akoz mon asiz lo *School Council Belonie*, mersi Mr Robert David.

E an relasyon avek sa, diskisyon ki bann ansennyan ti'n tenir parmi zot. Zot in adres bann defi, ki mannyer eski zot pou sirmont sa defi? Nou napa ase ansennyan pou en tel size, sa lot pe dir mon kapab *double* mon *shift*. E zot ti pe partaz en sel vizyon, e sa se pou bann marmay dan lekol perform pli byen dan zot ledikasyon.

E mon salye tou bann ansennyan ki pe fer sa travay dan sa fason. Mon salye zot pou sa zefor ki zot pe mete malgre bann mankman ki zot, zot konn tre byen sa Gouvernman ki la, sa ladministrasyon ki la in erite. Me selman mon vreman valoriz sa kalite lapros ki annan dan lekol. E mon bezwen fer resorti poudir dan *parents, teachers meeting* i annan sa size *vape*.

Electronics cigarettes, i en gran konsern dan lekol ozordi. E mon konnen ki dan lefitir i annan *Tobacco Control Act*. E baze lo sa lamannman ki pou ganny propoze, i enn ki mon pou siporte antyerman ler le moman pou arive. Akoz nou bezwen fer sir ki i annan regilasyon serye lo sa.

An relasyon avek sa, i anmenn mwan lo size drog. E nou tou nou konn sityasyon drog dan Sesel. E Mr Fady Banane ti'n fer en dokimanter. Mon rapel zour i ti fer son dokimanter ti annan pa mal koze *comme d'habitude* dan konteks Sesel. Maksimonm *a week and then everybody forgets it*. Mon krwar pa Departman Ledikasyon i devret servi sa koman en zouti pou edik nou bann zelev akoz zot pa devret soumet zot lekor avek sa pwazon.

E sa ki mon'n vreman kontan avek dokimanter Mr Banane, se son garson ti dir "papa ou'n pas dan serten trazedid dan lavi, me selman zanmen nou pou oule pran sa semen". I ti konn danze ki devan li, si an ka i pran sa semen ki son papa ti'n pran. E mon annan en bon korperasyon avek li, ansanm nou pou demar lo en proze kot sa dokimanter pou ganny *screen* pou nou kapab sansibiliz marmay pou nou kapab fer marmay konpran,

how real it is out there in this world.

I enportan pou nou sov nou zanfan, nou zanfan i responsabilite nou tou. E mon pe lans en lapel ek bann ansyen zelev Lekol Belonie Segonder, pou vin zwenn nou baze lo sa demars ki mon pe fer avek *Mademoiselle* Tessa Henderson pou etabli en *Belonie Secondary School alumni night club*. Ki pou anmenn tou bann diferan *cohort* ansanm. Akoz mon vwar en kantite zot ki ti lekol Belonie, ki pe fer byen dan zot lavi. Zot kapab retourn ver zot lekol, e kontribye vizavi devlopman nou bann zenn.

Fodre ki nou fer li, fodre ki nou sanz nou *mindset* e vin devan. Akoz se la kot nou pou vremen vwar sa lespri volontarya Mr Speaker. E sa i anmenn mwan lo size le 7 Desanm.

Premyerman les mwan remersye Mr Jonathan Naidu, les mwan remersye Mr Rajkrishna Murthy, Philippe Lailam, Bradley Larue avek Evans Mellon ki'n vin devan. 400 bwat manze, 200 pake delo *dispatched to* Cascade pou ed bann zabitan Cascade.

San demann naryen deswit zot in reponn mon lapel, e zot ti fer lesansyel. E diferan lezot dimoun dan diferan distrik partou kote ti'n vin ansanm. Akoz zot ti

konnen nou pei ti dan en moman ki zanmen in fer fas avek. E nou tou nou ti'n met lanmen ansanm pou sey nou mye pou nou kapab rezourd sa problem. E lafason politik pe ganny fer lo sa size, i degoutan. I degoutan.

E nou pa pou kapab fer sa bann keksoz koumsa. La mon mazin mon koleg Onorab Monthy, sa kantite travay ki in bezwen fer. Sa kantite fardo ki in bezwen rankontre dan en serten sans, ouswa fer fas avek. Ki mannyer eski ou krwar i pou santi, ler Lopozisyon i fer sa bann kalite politik bon marse? *Plywood* zot deside si ou siport zot wi ou non. Zot devret onte!

(APPLAUSE)

HON SATHYA NAIDU

Mr Speaker, St Louis. St Louis ti pas anba radar le 7. St Louis ti pas anba radar le 7, akoz mon pa pou kapab konpar sa ki ti'n ariv ek Cascade. Mon kapab dir St Lousi in pas 5 poursan konparezon avek Cascade. Me an relasyon avek St Louis sa zour le 7, mon ti'n resevwar 50 *phone call*.

Ladan 40 diferan fanmir. E mon kapab dir ki lapli le 7 in koz en *landslide Serret* lo montanny St Louis. E nou'n bezwen evakye 2 *household*. Curio Road lafanmir Talma, nou'n bezwen evakye en

fanmir. Lo zot prop lavolonte Roland Chang-Chou *Waterloo* in bezwen evakye.

In annan 8 lakaz ki ti'n ganny konpletman inonde akoz kantite delo ki ti'n desann le 6 avek le 7. Non le 6 avek le 12 Desanm Roche Bois, e ozordi atraver *PUC* nou pe fer travay neseler pou en *assessment* ganny fer par en *hydrologist*.

Sityasyon *Serret*, annefe zis Vandredi pase mon ti lo teren. Mon'n al anler lo sa montanny atraver site *Cable and Wireless*. Nou'n pran apepre 3erdtan pou etidye sa sit, i annan en pe risk. E mon swe, mon swe se ki ler nou soumet sa bann risk aksyon i ava ganny pran lo en baz imedyat.

Me mon bezwen fer resorti poudir ki in osi annan lakaz, 6 lakaz kot *boulders* in zis tonm par deryer i pa'n kraz zot lakour. Zot in vreman sanse.

E mon ti pe demann mon lekor, be ki mon pe al fer? Mon zis al tap lo en laport, en *businessman* i dir, mon annan en sonm larzan la ed sa bann dimoun. E mon ti'n kontakte Mr Jimmy Labrosse, dan lespas erdtan, nou'n nobou kapab ed sa 6 fanmir. Alors 18 fanmir in ganny afekte, savedir 22 pa'n ganny afekte.

E i annan serten ki ti annan krentif, senpleman

akoz i annan en *bolder* par deryer zot lakour. Apre tou sa ki zot in vwar baze lo nouvel, zot in bezwen ganny enformen poudir napa risk. Nou'n anmenn *DRMD*, nou'n fer le neseler. E in annan serten ki nou ti'n bezwen dir pran ou responsabilite mon frer, mon ser. Sa i tonm lo ou, i pa tonm lo *MNA*, i pa tonm lo *DA*.

I annan serten zot ki ti pe rod 25 mil. Mon ti bezwen dir non, 25 mil i pa pou aplik pou ou. E dan ka St Louis, zis en fanmir ti'n resevwar 25mil. Akoz i enportan ki napa labi dan bann sityasyon parey. E se nou koman bann Onorab ki annan sa responsabilite pou nou sansibiliz nou pep.

Pa akoz, lontan ou konnen ki ti pou arive? Akoz vot baze lo tou sa ki ti'n arive St Louis, 25mil. 25 ti pou vin 50, ti pou vin 75 anba zot *watch*. Koumsa ki'n marse anba zot, *ok*?

An relasyon avek politik. Mon kapab dir ki atraver politik ou kapab anmenn sanzman pozitiv dan lavi ou dimoun. E mon oule remerci zabitan St Louis pou lefe ki zot in donn mwan sa loportinite pou deservi zot. I annan en ta travay ki nou'n fer, 2020, 2021 lafanmir Adela 5 *unit*. 6 *unit*, in ganny konstri lannen pase pou ed 6 fanmir.

E sa 6 fanmir la mon pa ti regard ki kouler politik. Mil

fwa mon fer en keksoz ki byen e pa ganny elekte, dan plas fer en keksoz mal e ganny elekte. Keksoz mon bezwen fer resorti se mon konnen i kapab annan aplikan x ki pa siport mwan. I pa bezwen siport mwan aköz mon'n donn li en lakle lakaz. Aköz li ki'n met son zefor, li ki'n kontribye.

E pou ou aköz ou'n tik anler ou pou vin dir be ki manner in gannyen. Mon bezwen dir ou bezwen swiv kriter, mon frer, mon ser. Be ou bezwen kontribye pou ou ganny lakaz. E nou bezwen revwar sa R50, mon konnen pri lavi i en *issue*, *yes*. R150 par mwan eski i ase vizavi kontribisyon HSS? *Let us be realistic*.

E dan lepase ou konnen ki zot ti fer, zot pa ti'n donn konsey ki byen avek bann aplikan. I annan en ta aplikan, mon dir mon ker ou kapab met en R800? Napa problem Onorab mon a fer. Landmen i monte i fer, koumsa ki ou bezwen fer pli ou kontribye pli ou sans i ogmante. An menm tan nou bezwen pran ka avek.

Dat laplikasyon, *ok*. E baze lo sa, i annan en proze *16 unit Waterloo* ki mwan mon'n kapab demare. Wi mwan, aköz i mon linisyativ. E mon fyer poudir ki sa proze in demare malgre tou lobstak. Petisyon sorti kot 3 mousketer, en madanm ki ti pe kriye pou dir

dimoun St Louis pe mor lafen *Gorden Square*.

Li i pa ti oule donn *wayleave*, i ti krwar ki proze pa ti pou komanse? Proze in komanse, e se 16 fanmir ki pou resevwar sa benefis *and I am proud of my effort*, Mr Speaker.

Aköz mon'n travay dir...

(APPLAUSE)

HON SATHYA NAIDU

E an relasyon avek proze lakaz, i annan en bout later. Zis yer swar mon'n ganny nouvel keksoz pe al dan en bon direksyon 19san met kare later pou nou otan ki Finans i permet, finansman i permet bouz de lavan avek en proze *mid-range condo*. Sa i pou dan benefis distrik St Louis, distrik Mont Buxton e pou kwa pa menm Bel Air.

E nou zenn profesyonnel i annan en plas an sa ki konsern bann proze lakaz dan distrik St Louis.

An relasyon avek bann *housing estates*, 5 dan 10 i pe pas atraver renovasyon. *Ex Geers* i en pe pli konplike, alors i pou pran en pti gin plis letan me travay pe ganny fer. *Harrison* nenport ki dimoun ki pas *Harrison* zot pou vwar en nouvo fasad. Me selman dan en *unit*, drog ti pe ganny vann. Mon'n donn zot en *warning*,

mon'n fer tou sa ki mon kapab.

E problemm i preski rezourd, mon pa pe tann dimoun pe konplent. Ou konnen akoz? Mon ki'n bezwen fer patrol. E alors, mon pe lans en lapel avek Lafors Lapolis Sesel ler i konsern sa *vicinity Harrison Flat, Rue Frère Des Maristes* sa *vicinity* antye la, fer sir ki zot patrole. Kordgard Santral pa lwen. 6 semenn konsekitiv mon'n fer sa bann marmay ki pe konsonmen in fann kler akoz zot in vwar mon loto.

Si mwan mon'n kapab rezourd en problemm direktman. Akoz mon'n ganny ase avek bann lezot zabitan pe ganny pran otaz par en fanmir ki vann drog. Mon'n kapab met en lafen avek sa, mon fyer poudir mon'n fer li. E an menm tan Sant Kominoter St Louis. Lontan sant ti pe ganny servi koman en landrwa kot drog ti pe ganny vann. Anba mon *watch*, in nepli leka. E mon fyer pou dir ki mon'n nobou kapab fer sa travay dan lentere, zentere bann zenn.

Ler nou pe koz renovasyon Sant Kominoter 1.1 milyon in ganny investir. Mon'n ganny *sponsorship* pou en *computer room*. Nou pe enstal en *games room*, mon pou met en *projector* avek en *screen* pou bann zenn vwar

premier league. Nou pe met keksoz an plas.

I annan en plas pou zenes dan proze ki distrik pe antreprann li ladan. Nou annan en zoli proze lo nivo *sports* an sa ki konsern nou proze laplenn, ansanm avek *basketball court*.

Pros R3 milyon pe ganny depanse. Ladan R800mil i sorti kot Sekter Prive. E mon oule dir mersi mon frer, mersi pou lefe ki ler mon'n *call* ou, premye *call* ki mon'n fer Sathya napa problemm mon vwar ou pe debourye, R500 mil in fini met ater sa i ava ed nou ganny en *changing room* avek en *sitting area*. E an menm tan i annan en Anbasader ki'n osi vwar travay ki pe ganny fer. In dir li osi parey, atraver bann finansman apropiye pou donn lankourazman distrik St Louis.

Mon lans en lapel avek *St Louis Sun*, nou pe travay tre byen dan *league*. Premye lo *league*, *hopefully* nou ganny *league*. Me ti a bon si zot vin itiliz nou fasilite. Donn lankourazman bann marmay. Mon konn nou lekip *volleyball* pe ganny pa mal *issues* an sa ki konsern fasilite. Pa trakase, tre byento nou pou fer sir ki zot osi zot ganny sans pou vin fer zot lantrennman. Sa i aplik pou nou lekip *Basketball* osi.

So, ler tou nou bann lekip dan distrik i vin rann en

vizit pou zot sesyon lantrennman i ava kre en bon latmosfer. E sa i ava ed sa zenerasyon ki devan nou. Sa zenerasyon ki nou bezwen akonpanyi li. E nou bezwen donn li tou soutyen neseler.

Mr Speaker, ler nou pe koz lo bann federasyon sportif, zot pou bezwen pran zot responsabilite. E fodre ki zenes, fodre ki zenes ki pe pratik sa bann diferan disiplin i vin devan, i *challenge* zot i met devan zot konsern. Servi SBC si fodre, nou ava bouz sa bann federasyon.

An relasyon avek proze semen, mon ti pou ekspekte Onorab Rachel Spiro ti pou dir en keksoz lo proze semen Belonie, proze Semen Kato tou sa bann proze semen. Belonie anefe Onorab, dan lepase ou'n travay lo sa *file*. Mon dir mersi, *file* ti'n pri.

Aprè 22 *meeting*, 45 let mon'n nobou kapab finaliz later. Lendi mon'n zwenn zabitan Belonie. Nou pou tap tou pou tou otan ki posib pou nou ganny finansman neseler.

I annan tou sort kalite proze ki *ex DA*, Onorab Rachel i konnen me i pa'n dir naryen. Ou konnen akoz Mr Speaker? Par legzanp 2016 Dan Koko, dimoun pa ti ganny lavant. Anba mon *watch* zot in ganny lavant.

I annan ka konpansasyon pou lavalè R2

milyon kot ladministrasyon presedan ti'n abiz drwa bann dimoun, mon'n nobou kapab rezourd. Ansanm avek Onorab Loizeau, *Curio Road*, ansanm nou'n vini. La tou bann zabitan lafanmir Talma, Ally, *Curio* zot vreman kontan. Be ansanm ki nou'n vin pou nou kapab met en *stop* avek sa *issue*. Be lekel ki ti dan Legzekitiv dan lepase?

Lekel ki ti *DA*, mon bezwen poz kestyon. Ou a krwar i pa pe vin St Louis koman kandida 2025? Ou a krwar. Ou a krwar.

Me les mwan zis dir zot, mon pe *up* mon *game*. Mon pa pe zis get lezot proze lo baz nasyonal *Victoria Market*, *Sir Selwyn-Selwyn Clerk*. Mon pe met mon lanmen lo la, mon pou fer sir ki renovasyon i ganny fer. E *Market Street* mon'n fini met en demann avek *SLTA* pou nou met en bon kous koltar, aranz pyeton.

Naidu pe travay, li ki pe *rule border*. Nou pa pou zanmen les tonbe! Ya Papa!

(APPLAUSE)

MR DEPUTY SPEAKER

Mersi Onorab. Mon pou aprezan envit Onorab Kelly Samynadin pou pran laparol silvouple. Mersi.

HON KELLY SAMYNADIN

Mersi Mr Speaker. Bonn apre midi Mr Speaker, tou mon koleg Onorab, *staff* Lasanble Nasyonal, ser zabitan Au Cap e tou dimoun a lekout.

Mr Speaker, diskour Leta Lanasyon ki ti ganny delivre par Prezidan Ramkalawan, i enn ki non-selman pe ilistre en portre pozitivite. Kot nou pe ganny demande pour nou inifye nou konman en nasyon.

Me i osi pe demontre ki manner nou annan en Gouvernman ki enkliziv. Kot sak sitwayen i santi ki zot garanti ki zot annan en plas e en par dan zot pei, ki zot apel pour zot pour konstrir. E benefisyè par bann louvertir e loportinite ki i annan pour ofer, zis parey manifesto nou parti i dir.

Sa menm manifesto i osi met lanfaz lo linite nasyonal, bonn governans, loportinite ek lazistis.

E letan mon'n ekout Prezidan Ramkalawan koze pandan son diskour. Mon'n realize ki nou manifesto i enn ki vivan. Akoz pandan son manda, *LDS* pe reazir lo son bann lobzektif.

Depi ki *LDS* in ranport eleksyon an Oktob 2020. In annan bokou travay ki'n ganny fer, dan demars pour etablir bonn governans e latransparans dan nou pei.

Sirtou kot i konsern amelyorasyon nou bann

lankadremman legal. Ki ti swa merit ganny met azour, oubyen ganny *repealed*. E zis pour note pandan lannen 2023, Lasanble Nasyonal in pas 32 Lalwa an total.

Mr Speaker, sa lobzervasyon i pa zis ganny rekonnèt lo en konteks lokal e mon not lapresyasyon *Transparency Initiative Seychelles*.

Me in osi ganny son merit enternasyonal kot lo *Corruption Perceptions Index* 2023. Sesel in trouv li klase ventyenm mondyal dan son lalit kont koripsyon avek 71 pwen.

Me amelyorasyon remarkab, se ki nou'n ariv lo premye pozisyon dan rezyon *Sib-Saharien*. Sa i anmenn mwan ver en pwen refleksyon. Si sa pei pa ti'n ganny sove an Oktob 2020, ki *ranking* Sesel ti pour annan lo lendeks koripsyon manner zot ti pe donn bal dan nou larzan *taxpayers*?

Mersi Lepep Seselwa pour sov nou pei. Se gras a zot, ki sa pei in kapab ganny en dezyenm sans. E an Oktob 2025, Seselwa pour kit Gouvernman *LDS* o pouvwar. Akoz.

(APPLAUSE)

HON KELLY SAMYNADIN

Akoz sa pei i dan bon lanmen.

Depi Oktob 2020, sa pei in aret plere, e i pa pour zanmen pler ankor. Seselwa i annan li en sel opsyon. E sa se pa pour zanmen fer Sesel retourn an aryer.

Mon fyer pour dir Mr Speaker, ki apre 3an dan lofis. Gouvernman LDS in kapab etablir en tre bon repitasyon pour nou pei. Ki enkli elevasyon nivo nou paspor e dan nenport ki kwen lemonn kot nou ale, nou byen ganny resevwar e respekte.

En levidans konkret se kot tre resaman, Sesel ansanm avek *Bahamas*, *Belize* e *Turk and Caicos* ti ganny retire lo lalis bann ziridiksyon Linyon Eropeen ki pa pe akonplir zot bann komitman anliny avek zot kriter *tax* bonn gouvrenans dan en dele letan spesifik.

Sa i vreman en gran lakonplisman pour nou pti pei e byensir en bon rezon pour selebre lakonplisman nou Gouvernman.

Ozordi Mr Speaker, mon pe fortman akey demann nou Prezidan anver son lapel pour linite, rekonsilyasyon e non-diskriminasyon.

Nou tou, bann Seselwa ki pe viv dan nou pei natal, ou menm bann ki pe viv aletranze, pe enport nou afilyasyon politik ou seksyel, krwayans relizyez, zanr ou etnisite. Nou devret kapab pe

santi nou lib pour nou viv isi. E zwir tou bann benefis e loportinite ki pe ganny met a nou laporte.

I domaz, ki i ankor annan serten ki pe kontinyelman senm negativite, trenn lipye, fer sabotaz e rann nou bann frer ek ser Seselwa fristre.

Sa dimoun ki annan son aplikasyon lakaz ou later ki pe espere pour en pe letan. I normal pour li ganny en *feedback* letan ki i demande. Akoz li osi i pe kontribye dan lekonomi nou pei.

Sa zenn ki'n anvoy son CV ek sertifika dan plizyer lenstitisyon. I normal pour li konnen si in *successful* ou non.

Sa dimoun ki pe travay san ses, ki ariv a ler, ki pare pour ed son koleg, ki demontre en latitud egzanpler. I merite ganny sa promosyon ou formasyon pli o nivo, ki lontan i ti pe espere. Oubyen ganny en bon *rating* lo son *appraisal* a lafen lannen.

Sa dimoun ki son aplikasyon *welfare* oubyen *carer* pe tard en pti pe. Enn pti *call* i sifi, pour li konnen ki *status* son aplikasyon. Si vreman nou bann patriyot, ki annan lanmour pour nou pei. Annou pa kree loportinite pour nou bann konpatriyot fristre.

Sa dimoun ki pe espere dan laliny pour pey son bil telefonn. I pa normal pour li

ganny entimide avek bann propagann politik, parti minoriter par en swadizan zofisye Gouvernman, pandan ler travay.

Wi Mr Speaker. Sa i en lensidan ki mon'n temwanny personnelman avan yer, kot en *show room* en lakonpanyen telekominikasyon.

Tousala Mr Speaker, i bann legzanp tipik lo bann ka ki ariv a latansyon bann Manm Lasanble lo en baz kotidyen, dan nou bann distrik respektif.

Konman bann *leaders* dan kominote, i nou responsabilite pour nou dir kot ki mal, pour keksoz kapab aranze pour le meyer. Mon pe lans en lapel a tou bann travayer Sekter piblik, pour met lanmen ansanm. Afen ki nou bann dimoun ki pe bezwen servis i kapab ganny enn ki zwenn zot lekspektasyon e enn ki rezonnab.

Pour bann ki pe deza fer li, mon dir zot felisitasyon e kontinyen debout solid. Akoz travay ki nou fer ozordi, se nou zanfan ki pour benefisye demen.

Dan son diskour, Prezidan in osi met lanfaz lo nou sans responsabilite konman en nasyon. I ti dir ki Gouvernman se nou tou. Ensi ki dan lafason ki nou pran swen avek nou lekor, nou

fanmir, nou letid ek nou metye.

Ozordi mon pou ankor ensiste lo rol bann etidyan. I vremen enkyet mwan pou tande ki zis 5 etidyan sorti S5 ki'n *apply* dan Lenstitisyon pour Formasyon bann Ansennyan.

Ki fer mwan realize ki problem pa zis annan pour fer ek saler. Sa bann etidyan pa oule retourn dan sa bann menm lenstitisyon kot zot ti lekol pour al travay.

Senpleman akoz letan zot get konportman zot bann kanmarad. E ki mannyer zot bann ansennyan i rankontre bokou difikilte pour mannye bann diferan problem disiplin, sa i vremen dekouraz zot.

Education Act, Lartik 43 i dir ki en zanfan ki'n anrezistre dan en Lekol Leta, oubyen lenstitisyon edikasyonnel. I devret premyerman. *Obzerv Code of Conduct* e lezot regilasyon ki Minister Ledikasyon i annan an plas.

Dezyenmman, asiste laklas regilyerman e ponktyelman.

E anfen, partisip avek dilizans dan bann program ledikasyon anba ki in anrezistre.

Zanfan! In plis ki ler pour zot reflexir lo zot rol konman etidyan. Demann zot lekor akoz ki zot vin lekol. E kwa ki

zot anvi akonplir ler zot sorti dan sa baro apre 5an letid segonder.

Eski zot pour kontinyen apiy lo zepol zot paran? Eski zot pour al tap laport biro *welfare*? Eski zot pour al vole devan laport dimoun?

Oubyen zot anvi en pos segonder ki pour donn zot formasyon ek kapasite ki neserer, pour rantre dan lafors travayer demen?

Kot zot zanfan ava grandi dan en fanmir ki stab finansyerman, ensi ki sosyalman. E ki an retour ava rann zot konman bann sitwayen endepandan dan en pei ki prospere.

Mr Speaker, bann paran zot osi, zot bezwen redefini zot rol konman paran. Ki enkli serten nou Manm dan sa Lasanble.

Lartik 47(1) *Education Act* i dir, ki paran en etidyan ki pe asiste Lekol Leta, oubyen lenstitisyon edikasyonnel. Ava par demann en ansennyan ou *headteacher*, konsilte avek zot an respe pour bann program ledikasyon sa etidyan.

E 47(3) i dir, ki sak paran ava sinyen e asir konformite avek *Code of Conduct* ki ganny delivre par Minister Ledikasyon. Ensi ki regilasyon ki ganny fer par sa lekol, ou lenstitisyon edikasyonnel.

Annou demann nou lekor si konman paran, sa ki nou pe

fer pour nou zanfan i ase? Eski nou pe donn li, ensi ki son ansennyan sifizaman sipor? Eski nou pe ed li ek son devwar lakour? Eski nou pe angaz li dan bann aktivite ekstra skoler, ki pour rann li konman en sitwayen respektab e rezonnab dan lasosyete demen?

Mon felisit tou paran ki tonbe leve avek zot zanfan e ki zet en koudey lo sa ki zot pe fer kot lekol. Sa swivi i enportan, aköz i vin konman en mekanizm sipor pour zot zanfan, ensi ki pour zot bann ansennyan.

Tousala, se bann pwen refleksyon ki merit ganny adrese. Letan nou pe egzamin nou bann rol pli profondeman e dan lafason ki nou bezwen re-modifye nou bann fason fer.

Mr Speaker, ledikasyon i pilye nou lasosyete. Malgre ki bann ansennyan i seye, performans etidyan i reste touzour en konsern. Laprev i la dan nou bann lekol, kot nou vwar ki bann zanfan ki zot paran i angaze dan zot letid, se zot ki demontre pli bon rezilta.

Mon pour profit sa loportinite pour demann avek Minister Ledikasyon, pour revwar nou bann lenfrastruktir skoler. Aköz sa osi i enn bann faktor primordyal, ki afekte laprantisaz bann ansennyan - bann etidyan, pardon.

I annan plizyer lekol ki'n benefisyè avèk travay renovasyon ki enkli Lekol Au Cap. E pour sa mon dir merci nou Gouvernman. Me par kont, i annan lekol ki merit en latansyon spesyal, tel ki Lekol Pointe Larue Segonder. Kot lanmwatye popilasyon etidyan Segonder Au Cap i etidye.

I annan serten laklas ki napa lafnet, *fans*, lalimyer oubyen laport e i menm annan ki demann en kous lapentir. Mon'n en ansennyan dan sa lekol pandan anviron 10an, ant 2011 a 2019.

E sa lekol pa'n zanmen pas atraver okenn travay renovasyon mazer. Alors, mon pe demande ki nou Gouvernman, nou fer en diferans. Ki en lizye i ganny mete dan sa direksyon pour byennet nou bann zanfàn e etidyan.

Mr Speaker, problemm meb, problemm resours dan lekol pa fek arive an 2020. Konman en ansennyan mon'n deza trouv mwan pe sey kalkile ki manyer pour partaz 10 liv avèk en laklas 35 etidyan. Akoz masin fotokopi pa marse.

En masin fotokopi ki ti pe bezwen partaz avèk 5 lekol, Pointe Larue Segonder, Pointe Larue Primer, Au Cap Primer, Anse Aux Pins Primer e Cascade Primer.

Tou lazournen masin ti kase, oubyen ti napa papyè. E nou ti bezwen kontakte paran pour asiste nou, oubyen nou ti kopi travay lo tablo.

Onorab Uranie, atraver ou Mr Speaker. Aret fer nou fer nou krwar lizour pour aswar. Prezidan Ramkalawan ti dir dan son diskour. Ki latmosfer nou bann lenstitisyon skoler, i bezwen enn ki pozitiv pour nou bann ansennyan. E i devret osi parey, egalman pour tou etidyan pour ki lansennyman ek laprantisaz i deroul byen.

I devret dan en latmosfer ki enkliziv e konfortab. Mon profite pour salye devouman e zefor tou bann ansennyan, ki pe travay avèk nou bann zanfàn. Nou konnen ki i pa en vokasyon ki fasil. Mon priye ki Bondye a vers son lagras ek son lasazes lo zot, pour zot kontinyen dan sa parkour nob.

Mr Speaker, dan sa demars pour garanti en Sesel ki inifye. I enportan ki konman en nasyon nou etabli en pei kot vyolans pa premye solisyon pour rezourd nou problemm.

Tro bokou nou dimoun, sirtou bann zenn pe perdi zot lavi aköz vyolans. Konmela in vin en *trend* dan nouvel, pour tande entel in pik entel. Oubyen nou vwar bann *videos*

kot zanfan lekòl e menm adilt pe agres kanmarad.

E souvandfwa, se bann adilt menm ki pe ankouraz sa bann komosyon. *Gone are the days*, kot konman en lager ti konmanse, nou dalon ti vin tire. Oubyen en adilt pli pros ti pas dan milye pour kalmi sityasyon.

Me mon pa perdi lespwar Mr Speaker. Avek louvertir fasilite lo Praslin. Bann zenn ki'n tonm dan la delenkans ava kapab annan en nouvo konmansman pour zot.

E mon sit mesaz *Minister Fonseka* pandan louvertir sa sant, "En vilaz lespwar e en lapros kolaborativ avek ledikasyon, lazenes, zafer lafanmir, lasante, bann Minister, departman osi byen ki bann lezot partener ki enterese. Nou pour en tim formidab pour konsepe ek zefor pour bann zanfan vilnerab an adresan zot bann *traumas* e dan ranforsisman bann valer pozitiv." Fen sitasyon.

Mersi ankor enn fwa pour nou Gouvernman pour get dan byennet nou bann zenn ki'n tonbe. E pour donn zot en dezyenm sans. Akoz se zot ki lavenir nou nasyon.

Mr Speaker, an sa ki konsern lape ek sekirite. Mon pour premyerman remersye Sant Lapolis Anse Aux Pins, anba ziridiksyon *ASP Jane Barbe*, ki annan en tre bon

lantant travay avek Lotorite Distrik Au Cap.

Mersi pour reponn lapel bann zabitan lemoman ki zot trouv zot bezwen lasistans. Malgre defayans dan resours, sirtou an sa ki konsern mendev. Me zot esey zot mye pour donn en servis ki rezonnab.

Mon pou profite pour segonn lapel Prezidan Larepublik anver bann zenn. Pour zwenn Lafors Lapolis akoz li osi, parey lansennyman ek *nursing*, i en vokasyon. E i demann bokou, sirtou an sa ki konsern disiplin.

Mr Speaker, yer mon'n antann serten alegasyon dan sa Lasanble, kot in ganny dir ki Prezidan Ramkalawan pe viktimiz Seselwa e zot pe dir ki in *fail* sa pep.

Be mwan mon annan trwa pti kestyon pour loter sa bann alegasyon.

Lekel dirizan ki ti responsab pour ordonn viktimizasyon, tortir, entimidasyon e fer Seselwa forse al egzile depi koudeta 1977?

Lekel sa dirizan ki pe *step up* pour bann viktim *TRNUC*, *PUC* Praslin, *fungus*, polisyon La Misère? E la mon fek aprann ki nou dwa Larisi \$6.6 milyon date depi en bann lannen pase. Lekel li sa dirizan?

E lekel sa Gouvernman ki'n *step up* pour asiste bann fanmir ki'n ganny afekte dan bann dezans le 7 Desanm, avek en lasistans R25,000 par fanmir, reparasyon bann lakaz, lasistans R1milyon pour bann ki bezwen rekonstrir zot lakaz.

Onorab Gill, atraver ou Mr Speaker, in dir yer ki Prezidan pe fer sabotaz. Eski sanmenm sa sabotaz ki i pe koz lo la?

Mon salye ou Onorab Monthy. Mon koleg dan rezyon les. Akoz ou'n demontre vre rezilyans, vre konpasyon apre sa lensidan lesplozyon dan distrik Cascade.

Mon pa konnen si sa soulye ki ou'n forse antre ladan ti pour antre dan mon lipye. Me mon konsider ou konman en model lespwar. I annan...

(APPLAUSE)

HON KELLY SAMYNADIN

I annan en *saying* ki dir, "*the Lord gives his toughest battles to his strongest soldiers*", e sa Mr Speaker i en fe letan mon get Onorab Monthy.

Mersi tou mon bann koleg Onorab, bann ladministrater distrik, bann *constituency clerks*, bann travayer Gouvernman Lokal e lezot endividi. Ki ti desann pour anmenn soutyen, pour

donn en koudmen nou koleg dan sa sityasyon dirzans kot bokou fanmir ti'n ganny afekte.

Ozordi, travay pe byen ale e plizyer fanmir in kapab retourn dan zot lakour. Oubyen dan demars pour konplet renovasyon, ou rekonstriksyon zot lakour.

Lepep Seselwa ozordi i fyer ki zot annan en Prezidan, en Gouvernman ki annan zot *welfare* aker. I pa ni anvi konnen ki ou kouler politik, si ou merite ou pour gannyen.

Ki fer mwan mazin son parol dan son diskour. "Annou sorti dan politik popilis, annou sofgard lavenir nou pei Sesel."

Me Mr Speaker, i annan en ti ptipti parti minoriter ki pour zot politik dan rigol i zot moto. Ozordi nou vwar zot pe gognard pledwari Prezidan anver linite nasyonal. Selman ziska la, sa menm parti ki en prodwi SPUP, SPPF, ankor pe lav zot lanmen. Ni en leskiz, ni en mo solidarite anver bann ki'n viktim rezim koudeta 1977.

Selman, zot oule koz labous plen. Ki se zot ki pe koz pour sa pep, se zot ki pour defann zabitan Cascade. Selman salte devan zot laport zot pa ankor kapab fini tire. Parey sa *saying* ki dir, "*put your money where your mouth is!*".

(laughter)

HON KELLY SAMYNADIN

Yes, koumsa ki dir.

Ki mannyer zot kapab anvi retourn o pouvwar si zot pa ankor kapab rekonsilye zot avek sa menm pep ki zot anvi i remet zot o pouvwar?

Yer en serten Onorab ti dir ki dan sa pti Sesel napa plas pour revanze.

Me Mr Speaker, mwan mon anvi dir li, ki si disan revanz ki pe sirkile dan lavenn zot parti aköz zot laswaf pouvwar. Nou pa ti pou'n vwar pasasyon Lalwa *TRNUC* an 2016. E nou pa ti pou'n temwanyan kot larm nou bann frer ek ser, ti verse an rezilta konsekans koudeta 77.

Malgre mon pa'n viv sa levennman. Me ozordi Mr Speaker, i evidan ki son sikatris i ankor vivid lo sa pep. Zot oule nou *walk the talk*? Zot osi fer parey.

Wi Mr Speaker, foudre nou *remind* zot, e nou pour toultan *remind* zot. Aköz sa bann menm dimoun, pe esey fer Seselwa krwar ki koudeta ti an Oktob 2020. E ki se zot ki pe vin anmenn vre sanzman.

Mr Speaker, Lendi mon ti antann en temwanyan ki ras ker lo *K-Radio*. Sa prezantatris ti pe rakont en lensidan ki'n pas atraver Vandredi swar lo *car park Docklands*. I ti dir ki tar dan lannwit, en pti garson dan son 9an, 10an ti pe

mandyan larzan. E ler zot ti demann li, ki i fer la sa ler. I ti dir zot ki i napa nanryen pou manze, son paran i dan drog, e li i li tousel kot lakour.

E sa pe arive dan lezot landrwa atraver Mahe Mr Speaker. Ki zanfan sa laz pe fer dan semen sa ler? Oli zot paran? Vwala vre sityasyon fleo drog dan nou pei. Se pour sa rezon ki mon pour kontinyen siport sa lalit asarnen kont drog.

(APPLAUSE)

HON KELLY SAMYNADIN

Aköz mon konsernen anver byennet nou fitir zenerasyon e lavenir nou pei.

Mr Speaker, lalit kont drog i reste touzour enn bann pli gran konsern ki pe preokip nou pei. Bokou fanmir, sirtou bann zanfan pe ganny afekte e pe sibir lenpak e danze adiksyon.

Mon siport travay ki Gouvernman pe fer dan son demars pour konbat kont sa fleo. E sa i enkli en *Drugs Rehabilitation Centre*, en Sant Rimann, ensi ki en *Maximum Security Center*.

Zot pe dir ki sa Gouvernman in *fail* sa pep. Eski lalit kont drog i sanmenm sa *failure* ki zot pe koz lo la? Met antet ki Ladministrasyon *LDS* in toultan kont drog e sa pa pour zanmen sanze.

Mr Speaker, an sa ki konsern Distrik Au Cap. Lannen 2023, in enn ki'n ase friktye. Nou proze *sitting facilities* kot laplenn foutbol in kapab materialize.

Nou'n annan plizyer proze resirfas semen, tel ki Semen D'offay, Semen St Roch e osi Semen Robinson. Nou'n osi enstal nouvo lalimyer, laglas, *crash barriers* ek *bin sites* dan bann landrwa ki ti annan mankman.

Mon pe demann avek tou zabitan, ensi ki lezot dimoun ki deservi sa bann fasilite, pour silvouple itiliz sa bann lenfrastruktir byen. Akoz zot apel pour nou e se nou zanfan ki pour benefisyé.

Mr Speaker, mon vreman rekonforte pour ki sa lannen distrik Au Cap pour benefisyé avek ankor plizyer proze.

Nou pour kontinyen avek lanbelisman bann lenfrastruktir semen. Tel ki resirfas Semen Green Estate, Semen Pointe Aux Sel, Semen Gaza ek Jerusalem. Nou pour osi kontinyen avek reparasyon ek lenstalasyon lalimyer, laglas ek *crash barriers*.

Tou travay lo planifikasyon *bus stop* Green Estate in aprezan konplete. E tre byento i pour antre dan en faz *tender*. E desito konplete zabitan Green Estate pour kapab esper bis piblik dan plis konfor. San ki zot bezwen sibir

lenpak kou soley for, oubyen labou letan gro lapli i tonbe.

Travay lo *Old People's Home*, ki ti'n rankontre serten retar pour demare byento pandan mwan Mars. E bann zabitan sa *home* i ava kapab viv dan sa landrwa, dan plis konfor parey zot merite.

Zabitan *Dolphin Courts* zot osi zot pa'n ganny kit deryer. E sa lannen travay renovasyon mazer pour ganny antreprann dan sa landrwa, apre plizyer lannen ki zot ti pe espere.

Kot zot in ganny anvair avek *fungus*, problemn delo monte dan lakaz. Akoz sistenm *sewage* pa bon, parmi plizyer lezot problemn.

I enportan pour note Mr Speaker, ki sa landrwa pa'n zanmen pas atraver okenn renovasyon. Mersi Gouvernman *LDS* pour mazin zabitan *Dolphin Courts*.

Proze renovasyon Lenstiti Kreol pour pe osi konmanse sa lannen. E se *GICC* ki annan kontra pour sa proze anba bann menm term ek kondisyon ki renovasyon Bibliotek Nasyonal ti ganny fer.

Mon pe profite pour remersye Lenstiti Nasyonal pour Leritaz, Kiltir ek Lar pour sa travay ki zot pe fer pour mentenir e prezerv nou leritaz.

Lenstiti Kreol i leker Distrik Au Cap e pour mwan

vwar li tonm an rin, ti pe vremen enkyet mwan.

Mon apresye pour note ki Langar Pirog, en lenfrastriktir ki form parti leritaz nou distrik pa'n ganny oubliye. Sa landrwa ki en pwen rankont pour plizyer zabitan, espesyalman pandan *weekend*. Li osi i pour benefisyé avek en nouvo fasad kot son twatir e lantouraz pour ganny re-anbelir.

Mr Speaker, mon osi apresye ki apre plizyer lannen kot zabitan Au Cap, ensi ki lezot zabitan rezyon les, sid ek sid was Mahe ti pe espere. Tre byento zot pour kapab temwanny transformasyon lo lakot nou zoli distrik.

Sa transformasyon pour konpri en proze miray lo lakot lans Au Cap, ensi ki en proze *breakwater*.

Mon oule felisit nou Gouvernman pou finalman met en lizye lo sa sityasyon, ki pandan plizyer lannen ti pe afekte distrik Au Cap e koz plizyer problem pour zabitan. Sirtou bann motoris ki deservi semen lakot les, pour ariv ver zot destinasyon.

Mr Speaker, pour ki Lotorite Distrik Au Cap i kapab fonksyonnen i pa depan zis lo son *MNA* ek son *DA*. I annan plizyer endividi ou regroupman ki pe travay *behind the scenes*, pour ki zabitan nou zoli distrik i kapab

reste an sekirite e ki bann diferan konsern i ganny adrese.

Premyerman, mon pour salye travay ki group *Senior Citizens* pe fer pour nou bann trwazyenm-az. Swa atraver bann lanmes, bann vizit kot bann malad dan distrik eksetera.

Mersi pour zot devouman e zot letan ki zot donner anver lezot dimoun aze dan distrik. Lannen 2024, i enn spesyal aköz nou pour akey en nouvo santener dan nou distrik.

Madanm Miette Derothe ki pour selebre son 100an le 10 Mars prosen. Enn pti madanm ki ankor tre for, ranpli avek lazwa *de vivre*, ki'n ganny beni pour ariv kot i ete ozordi.

Mon priye ki Bondye i a kontinyen met son regard lo ou, pour ki ou a viv ankor plizyer lannen parmi nou.

Mr Speaker, ozordi mon ti a kontan remersye tou bann endividi, lorganizasyon ek bann biznesmenn ki'n ed nou pandan lannen 2023. E ki'n ankor re-afirm zot langazman anver lepanouisman Distrik Au Cap pour lannen 2024. Notaman *Seychelles Prison Services*, *Maison Marengo*, *ANS Supermarket*, Mr Paul Latulipe, Mr Ralph Hoareau, Mr Roland Hoareau, Mr Henri Eichler, Mr Luc Gedeon, *Takamaka Rum Distillery*, *Eau*

Val Riche, Bukinghams' Palace e Lanbasad Sinwan. Mr Gaetan Payet, *Any's Take-away*, parmi plizyer.

Mon pa pour kapab termin mon lentervansyon, san mansyonn en group dimoun tre enportan e endispansab, ki pe fer en travay remarkab dan distrik. E sa se pa lot ki nou Au *Cap Events Club*.

Sa regroupman i konpri en group dimoun volonter, ki donn zot letan pour byennet nou zoli distrik. Ki enkli Mr Nigel Henrie konman *Chairman*, Ms Santasha Hoareau konman *Vice-Chair*, Mr Patrick Lajoie konman nou trezorye e nou *DA* Ms Sabrina Assary konman sekreter.

Mon rekonnet osi Darius Petrouse, Rodney Maria, Josemma Laporte, Danny Albert, James Mathiot, Giovanni Molle, Kevin Marengo e mwan menm konman bann manm ordiner.

Mon oule osi remersye nou *Chairman* sortan ki'n la depi konsepsyon, Mr James Auguste. Lannen 2023 in en lannen tre sarze pour nou klib, kot nou'n organiz plizyer aktivite ki'n viz ver rekonesans e *empowerment* nou bann sitwayen.

Tel ki Au *Cap Beach Fiesta*, ki ti en aktivite *charity* an partenarya avek Lasosyasyon *Powerboats*,

pour asiste serten dimoun ki dan bezwen. Oubyen pe viv avek dezabilite dan distrik.

Nou'n osi organiz defile pour Lafet Nasyonal, Bazar *Creole*. Nou'n al donn koudmen dan distrik Cascade swivan leksplozyon. E osi byen ki en aktivite *fundraising* pour sa distrik.

Ozordi, mon oule eksprim mon senser lapresyasyon anver zot, en group dimoun ki pa les politik vin en baryer. Akoz atraver zot volontarya, zot pe demontre konpasyon, la zantiyes, la zenerozite.

Mersi pour ki atraver zot, lezot pe deside vin devan pour ede dan nou zoli distrik beni. Mon ti a osi kontan profite pour remersi mon *clerk* Darius, nou *DA* Ms Sabrina Assary. *Staff* Ladministrasyon Distrik, zabitan Au *Cap* pour zot sipor kontinyel. Ki nou a kontinyen travay ansanm an 2024 pour boner nou zoli distrik.

Pour konklir Mr Speaker, mon oule asir Lepep Seselwa ki nou pei i dan bon lanmen. Malgre ki Lopozisyon i kontinyen fer propagann avek bi pour met retar dan travay sa Gouvernman. Nou, nou pour kontinyen sourd lo zot bann mansonz e kontiny sa travay ki nou'n ganny mandate pour fer.

Ki fer mon mazin parol Msye Prezidan dan son diskour; 'Travay i bokou, me travay pa fer nou per'. Nou pour kontinyen lalit pour kit Sesel debout lo son lipye. Akoz sa i nou pei beni e nou pour kontinyen travay pour son loner. Avek en Sesel pozitiv, kot sakenn de nou i pran son responsabilite, nou pour reisi kapab mentenir en meyer Sesel, en Sesel ki ini.

Ki Bondye i kontinyen beni tou zanfan Sesel. Mersi Mr Speaker.

(APPLAUSE)

MR DEPUTY SPEAKER

Mersi Onorab Samynadin. E dernyen entervenans pour nou sesyon ozordi se Onorab Egbert Aglae.

(APPLAUSE)

HON EGBERT AGLAE

Mersi. Mersi Mr Speaker. Mon a dir bonswar pep Seselwa, spesyalman tou zabitan Port Glaud.

Mr Speaker avan mon komans mon ladres. Mon le fer sorti poudir, nou lo sa kote latab, nou kritik travay ki Prezidan pe fer. Me non-pa maltret li. Parey atraver ou Mr Speaker, Onorab Doyace Porice ti fer letan i ti dan Lalyans, atraver en *recording*

kot i ti maltret Prezidan Ramkalawan.

(APPLAUSE)

HON EGBERT AGLAE

E osi Mr Speaker mon le fer resorti ki atraver ou, ki Onorab Labrosse in fer sorti, kot i konsern travay *FPAC* pour detekte koripsyon.

Me selman ler nou *Leader* Onorab Sebastien Pillay ti anmenn dan sa Lasanble, demann pour fer *investigation* lo koze *road - West Coast Road Project*. Zot pa ti dakor, zot pa ti aprouve.

(APPLAUSE)

HON EGBERT AGLAE

E Mr Speaker. Mon siport Onorab Rachel Spiro letan i ti dir, '*put your money where your mouth is.*' Akoz i konnen sa bann ki al manze, e sa bann ki sivre sa bann larzan. E i konnen ki nou pe koz lo la.

(APPLAUSE)

HON EGBERT AGLAE

Mr Speaker letan mon'n ekout bann Onorab lo lot kote latab. I montre mwan poudir, sa ki zot Prezidan ti prese semenn pase dan Ladres Leta Lanasyon. I pa li sa portre ki zot, zot ti ekspekte.

Zot in sit en lalis fristrasyon e problem. E

mwan Mr Speaker, petet zot napa sa kouraz pour zot dir zot Gouvernman kot i mal. Me mon a donn zot sa sipor pour fer li.

(APPLAUSE)

HON EGBERT AGLAE

Mr Speaker mon rekonnèt e solider avek tou zabitan Cascade e Petite Paris. E osi bann zabitan dan nor ki'n pas dan serten difikilte lannen pase ek ki zot lavi i pa ankor retourn parey i ti ete avan.

Mon osi rekonnèt bann ki malad e ki pe rod zot lasante, bann ki'n perdi zot pros e ki ankor pe esper. E osi bann ki ankor pe esper en rezilta baze lo zot bann kondisyon.

Mr Speaker, i regretab poudir ki Ladres lo Leta Lanasyon, Prezidan in penn en lot portre lo Sesel konpare ek larealite ozordi. E i pa'n adres size ouswa kestyon ki sa pep pe demande. Parey.

Enn. Sityasyon e pozisyon Sesel dan Lanmer Rouz e son bann lenplikasyon lo nou pei?

Dezyenm, pozisyon Sesel lo lagreman WHO, an se ki konsern bann dirzans lasante ki dayer mwan mon pa pe siporte.

(APPLAUSE)

HON EGBERT AGLAE

Sityasyon lagrikiltir dan Sesel e siport pou fermye, pa'n adrese.

Kou lavi dan Sesel an zeneral e size STC, zot in oubliye.

Nou sistenm lasante. Sityasyon leksplozyon CCCL e sor bann zabitan.

Sor Bann biznes Providence in ganny oubliye.

Mankman materyo konstriksyon ki dabor dan plas aksepté 50tonn manze. Zot ti'n kapab demann UAE e pei zanmi materyo, parey siman, dibwa, *plywood*, vit pou *sliding door* e lafnet, tol pou twatir. Se sa ki en Gouvernman responsab ti pou fer.

Msye Prezidan pa'n kapab adres nou solisyon lo kou sityasyon drog dan pei. Menm krim ek vol. Tousala pa'n aborde.

Mr Speaker, plizyer Seselwa ozordi pe viv deplizanpli dan bokou lenkyetid e entimidasyon, lo diferan nivo. En pep kot son nivo devlopman ti'n akselere pandan sa dernyen 20an avek en o standar lavi, tre o nivo.

Me ki nou vwar ozordi dan sa pei kot i konsern standar lavi. Bokou pe degrengole, bokou pe perdi sa ki'n travay dir pou konstrir. Bokou ki'n bezwen vann plizyer zot bann byen pou cope

ek en o nivo lavi e en nivo lenflasyon.

Bokou ki'n abandonn zot biznes, ouswa pe *struggle* pou kit zot biznes alaflot. Plizyer ki'n bezwen tir zot zanfan dan lekòl prive e retourn dan lekòl leta. Akoz zot mwayen in afeblir e pa pe kapab *meet* zot komitman finansyel.

Mr Speaker, plizyer ki ankor andete avek *loan* e kredi. Akoz sa i sel mwayen ki zot kapab sirviv mwan pour mwan, lannen apre lannen.

Sa ki pe fer *puzzle*, ouswa bayondibi deor pou pey zot bil tou lemwan. Sakrifye enn pou ranforsi lo lot. Sa ki pe esper en meyer lasante e ki pe tourn an ron.

Sa ki pe ganny persekute akoz son krwayans politik, ki li i pa pou ganny ni en travay, ni en pti Kontra.

Etranze ki pe ganny favorize pou pozisyon ou promosyon.

Sa manman ki pe desann kot *Welfare*, pou kapab aziste pou fer de bout zwenn. Apre pour li ganny dir, i pa kalifye.

Sa ki pe monte desann kot Biro Lanplwa e pe esper sa *call*, ouswa sa telefonn pou dir li vin komans travay.

Sa pti *sole traders* ki pe sey debourye e la ozordi pe ganny takse R500. E apre zot met ankor en lot R100 lo la. E ki mannyer nou ekspekte kou lavi i desann?

Mr Speaker, sa ki son trezyenm mwan saler kalkilasyon pa'n kapab zistifye. Sa ki'n ganny dir rann larzan *tax*, rann larzan *carer*, rann larzan *welfare*.

Sa ki son kontra in ganny koupe. Sa ki son *allowance* e *overtime* in ganny tire. Mr Speaker sa i vre Leta nou Nasyon.

Nou pe vwar serten pei zanmi ki pe vir ledò ek nou, ouswa pe ezite ed nou koman en pei. Parey nou ti abitye resevwar avan.

Sa ki pe get nou bann desizyon, sipor diplomatik koman bann desizyon iresponsab. En Sesel kot nou, nou annan – kot nou annan en mazorite *LDS* dan Lasanble ki per pou dir ek son prop Gouvernman kot i mal. E kot zot aprouv tou sa ki vin devan zot. San pran bann konsekans ki atase avek nou pei.

Mr Speaker en Sesel kot nou vwar degradasyon dan nou sistenm lasante, en sistenm, nou sistenm ledikasyon.

Mank konfyans dan nou sistenm lazistis. Persekisyon bann ki vilnerab, lenterferans dan travay medya kot serten zournalis i ganny menm *ban*, ouswa ganny maltrete. En Sesel kot *main* oponan politik i ganny persekute ankor pou bann rezon ki pa fonde.

Mr Speaker lalis i long, long. Akoz sa i Leta nou Nasyon. Mr Speaker mon'n ekout atantivman Ladres Leta nou Nasyon fer par Prezidan Larepublik e monn re-ekout ankor. Pour pli tar, pou mwan swadizan byen konpran.

Mon'n ekout serten lopinyon e mon konklizyon ki mon'n retire. Se ki Prezidan i vreman dekonekte ek serten realite nou pei.

(APPLAUSE)

HON EGBERT AGLAE

Mon'n dir ki bokou desizyon ki Egzekitiv in pran, in bezwen retourn an ayer. La se sa ki nou dir zot parey kanmaron. E plizyer Seselwa, ozordi pe kestyonn lentegrite sa Gouvernman fas a laverite. Parey dikton i dir, *'the truth shall set you free'*.

(APPLAUSE)

HON EGBERT AGLAE

Kestyon alors. Kwa ki laverite? Akoz menm si ou vin repet menm keksoz avek sa pep pour plizyer fwa, pa neserman fer li vin laverite.

Yer ou'n dir, napa pye dibwa ki'n ganny koupe. Me apre nou vwar lo medya, e portre i levidans konkret ki pye dibwa in ganny koupe.

Yer ou vini, ou dir nou person pa pou perdri son

lanplwa. E demen ou tande ki plizyer in perdi son lanplwa.

Yer ou vini, ou dir sa pep ki *STC* pou la pou fer desann pri lavi. E apre ou tande sa menm *STC* per fer 66milyon profi lo malere.

(APPLAUSE)

HON EGBERT AGLAE

Yer ou vini, ou dir ek sa pep Seselwa pou pas en premye. Me ozordi se etranze ki pe ganny favorize.

Yer ou ti dir ek sa pep, ki ou pa ti oule Arab. Ozordi se ou bann pli gran zanmi.

(APPLAUSE)

HON EGBERT AGLAE

Yer ou ti dir ek sa pep, ki *IDC* pou retourn anba komann Gouvernman. E Mr Glenn Savy pou ale, e ozordi zot *best buddy*.

(APPLAUSE)

HON EGBERT AGLAE

E zerans *IDC* i ankor parey i ti ete. Yer ou ti dir ek sa pep Seselwa, ki Mr James Alix Michel pour ganny ziz-e, in komet krim. Napa ki zot pa ti dir. Me la ozordi i tou le kontrer.

Yer ou ti dir ek sa pep ki ou pou lalit kont drog dan 100 zour, ler ou vin o pouvwar. Ozordi 4an apre dan lofis

problemm drog in pli pir ki zanmen.

Nouvo kalite drog, pli adiktiv e danzere pe rantre anba ou *watch* Mr Prezidan.

Yer ou ti dir ou pou met en lafen ek tonton makout. Me ozordi ou vwar en lot form *gangster*, tonton makout dan mask, ki pe teroriz serten parti nou kominote.

(APPLAUSE)

HON EGBERT AGLAE

Yer ou ti dir ou pour *advocate* lo lazistis *rule of law*. Selman plizyer nou frer Seselwa i ankor pe rimann, lo bann ka ki pe kout pei plizyer milyon.

E tandans ki nou riske pe vwar nou pei bezwen komans prepar li a lavenir pour en manke en *massive lawsuit*, ki pour lo ledo *taxpayers money*.

Mr Speaker
kontradiksyon,
kontradiksyon, i tro bokou. Ler ou dir ek sa pep ki i pa merit pourswiv Gouvernman. Be Msye Prezidan ou bliye ki ou ti fer lo lensidan '*radio freedom*', ki ti konsekans lo Gouvernman?

Konbyen ki zot in *advice* dan lepase pou pourswiv Gouvernman zot menm? Ki swa Lapolis, lasante eksetera, nou pa pour oubliye sa bann keksoz.

Sa ki pa bon pou ou, ou pa kapab donn ou kanmarad.

Sa ki pa bon – sa ki bon pour ou, i osi bezwen bon pour ou kanmarad.

(APPLAUSE)

HON EGBERT AGLAE

Now Mr Speaker. Prezidan Larepiblik in koz lo nesesite linite koman en pep. Mon 100 poursan dakor ek li. Me linite i bezwen komans avek li *from the top*.

Ki i abouti, dir zoli parol dan linite lo medya nasyonal, me ki apre dan zot bann rankont *meeting* politik, zot maltret e denigre zot oponan politik. Eski sa i en senbol linite?

Ler isi menm dan sa Lasanble, ki ou mazorite ki kontrole. Kot tou lesey pour entimid nou, e detri nou parey zot ti dir. Lepep, *US* pou disparet, zot ki *rule border!*

E la tou dernyerman i annan ki oule mont lo poto elektrik pou al tir *sticker* son oponan.

(APPLAUSE)

HON EGBERT AGLAE

Eski sa i tradwir dan en lapel pou annan linite?

Letan isi menm dan sa Lasanble, ou les ou Manm maltret zot oponan voler! Kriminel! Disan lo zot lanmen! Eski sa i en lapel pou linite?

Letan ou fer al aret bann aktivis politik lo *Facebook*. Akoz zot pe fer tandè zot lavwa. Eski sa i lapel pou linite? Letan ou anvoy plis ki 50 gard vin fer lafouy dan biro e batiman ou *main* oponan politik pou en *case* malisyè. Ki'n zis gat letan Lakour. Eski sa i apel en lapel pour linite?

Letan ou'n fer plizyer manman aret travay, pa renouvle zot kontra. San pran kont zot annan fanmir pou sonnyen, zanfan, det, *loan* pour peye. Eski sa ou pe enspir linite dan sa bann fanmir?

Mr Speaker, ankor enn fwa lalis i long. Mr Speaker, Leta nou Nasyon ozordi i kapab ganny mezire avek leta plizyer nou sistenm.

Premyèman, lasante. Annou regard en kou nou sistenm Lasante. Kestyon, parey ou dir ou konsilte. Eski ou'n demann sa pep si i satisfè avek sa sistenm lasante ozordi dan nou pei?

Akoz ki nou annan ankor bokou mankman. Latizann spesyalize mankman, dra, tapi, rido mankman. Napa asenans ek doktè, delo so napa.

Lapwentman ki preski ariv 1an. Plizyer loperasyon ki ganny *cancel* akòz mankman. *Waiting time* lo ban lopital, ouswa klinik parfwa in desot 5erdtan.

E la serten klinik si ou pasyan nimerò 26, i dir ou vin demen. Akòz zot pe war zis 25 pasyan. Kote ti egziste sa kalite pratik?

(APPLAUSE)

HON EGBERT AGLAE

Lanbilans ki ou *call*, i vin 1erdtan, ouswa 2erdtan apre. Apre dimoun i perdi lavi. Preskripsyon ki ou bezwen al *refill* dan farmasi prive.

E dayer mwan mon poudir zot, dir mersi nou sistenm kales kase in fer provizyon pou plis ki sa ventenn farmasi prive dan sa pei. Pou ede ki zot – pour ede.

E la ki zot le fer? Zot oule persekit serten sa bann farmasi ek zot bann regilasyon bankal sipòte par sa mazoriter *LDS*.

(APPLAUSE)

HON EGBERT AGLAE

Now Mr Speaker. Eski nou kapab annan en meyer sistenm lasante? Larepons i wi. Akòz *US* i konnen ki manner pou fer sa arive an 2025.

(APPLAUSE)

HON EGBERT AGLAE

Nou, nou annan solisyon. Me nou pa pour les zot *copy and paste* parey *speech Albanèz*.

(APPLAUSE)

HON EGBERT AGLAE

Mr Speaker, lot sistenm mezirab lo Leta nou Nasyon se ledikasyon. Parfwa mon demann mon lekòr kestyon apre kestyon. Lo kwa ki zot priyorite dan sa Gouvernman?

Minister Ledikasyon i dezyenm pli gro laliny bidzeter. I ankor pe vwar li avek en ta defi repetitif, sak fwa lannen skoler i komanse. Travay renovasyon ki pa ankor kapab konplete e lekòl pa kapab komanse.

Sa i montre ou, bann *bad timing* kote planifikasyon. Latab ek sez ki manke, ki en zouti enportan pou laprantisaz konfor e efikas. *Printer* e *photocopier* ki pa pe marse, *toilet* e tiyo ki ankor kase pe koul delo. Eski sa swadizan *saving* pre R20milyon ki Ladministrasyon LDS i ti fer dan *mid-year review*, pa ti kapa pran en pe sa larzan rezourd sa bann problemn koman en priyorite?

(APPLAUSE)

HON EGBERT AGLAE

En kestyon fondamantal se ki zot plan lo size *recruiting* sa bann mankman *teachers*? Dan leparse zot in ridikil Gouvernman Lepep, US avek nou bann *MOU*, bilateral ki'n

nou'n fer avek nou pei zanmi. Pou lasistans dan domenn ledikasyon ki ti anmenn bokou dibyen.

Avek bann *teachers* ki nou ti resevwar. Me ozordi i paret i pa enn zot priyorite. Nou vwar zoli plan met ater, parey Lekòl TVET, anvoy *teachers training* aletranze dan sa size. E zis apre zot decide leve en zour e ranvers sa bann desizyon pour pa fer sa lekòl.

Mr Speaker sanmenm sa ki nou dir zot napa en direksyon.

Mr Speaker lot size lagrikiltir. En pes *mess koumsanmenm!* Napa lankourazman pour sa sekter. Fermye in ganny kit deryer. O kontrer zot pe ganny takse plis.

Zot in tir sa pti *subsidy* ki pe met fermye *livestock* lo semen faid e fermen byento. Tou resaman swivan bann gro lapli an Desanm 2023. Bokou fermye in fer fas ek plizyer gran pert finansyel akòz linondasyon. Sirtou dan Port Glaud. E la, mon oule sit detrwa sa bann fermye. Guyto Hoareau, Rodney Mathieu, Jude Sirame, Noeldine Essack, madanm Esparon, Msye Grelle zot ki ganny trouve kot plato *ex-Mahe Beach*.

I enteresan pou vwar ki kantite letan in pran pour zot vizit sa bann fermye. Prezan

ou vini vizit, ou promet pou donn zot sipor. Ziska prezan nanryen, nanryen, nanryen!

Oli *inputs* ki zot in promet sa bann ferme? Oli lamenzman drenaz ki bezwen *desilt* ase souvan? Degradasyon semen kot Noelidine ki *PS* in dir pou get ladan. Mon fer li *DA* anvoy *mail*, apre *mail* zot pa reponn.

Selman apre zot mont lo *TV* e *zournal*. Zot dir zot pe siport nou bann ferme. Mon pli gro keston alors. Lekel sa bann ferme ki pe ganny siporte? Akoz sa bann ferme Port Glaud pa pe gannye sipor.

(APPLAUSE)

HON EGBERT AGLAE

Mr Speaker, kan mon lo size levennman Desanm le 23. La mon pa pe abord size lesplozyon *CCCL*, sa i a vin apre. La mon le koz lo size gro lapli, ki dapre Gouvernman *LDS* zis bann distrik dan nor ki ti ganny afekte.

Menm si plizyer rikord ka linondasyon dan lakaz zabitan Port Glaud. Sirtou lo rezyon Port Launay plato, ros ki'n deboule in antre dan lakaz, lateras grennen, pye dibwa tonbe eksetera ti ganny rikorde.

Mwan mon ti vwar mwan mon tousel sa zour swar e granmaten. Akoz larivyer *waterfall* ti'n deborde e kouver

e sa masin- e *the main bridge*. *DA* sa letan ti'n pri Baie Lazare. Mon konpran movetan. Me nou ti kominike.

Mon ti dir - mon ti ganny dir ki *DA* Anse Boileau ki reste Port Glaud dayer. Ki ti mon *ex-DA* i a vin get sityasyon. Me i napa en transport, mon'n al sey sers li, me lentansite delo lo semen ek pon pa ti permet mwan.

Me mwan ki konn mon travay, mon'n sey mon mye ek detrwa zabitan pou donn serten direktiv e sipor serten fanmir. Pour swa al reste kot en lot fanmir e lannmen nou a get prosedir evalyasyon bann domaz.

Be Mr Speaker. Landmen mon konpran, prezan lensidan *CCCL* i pas koman priyorite, sa mon konpran. Selman *at least* mansyonnen dan zot *Press Conference*. Ki i annan en pti distrik dan bwa, ki apel Port Glaud osi ki'n ganny afekte, ki'n annan ros deboule, ki annan linondasyon, ki lateras in grennen.

Me nanryen pa'n ganny dir lo distrik Port Glaud ankor enn fwa *LDS*, in les Port Glaud tonbe.

(APPLAUSE)

HON EGBERT AGLAE

DA ek mwan nou'n vizit tou lakour e nou soumet tou *file* baze lo prosedir ki mon konn

tre byen. Me ki nou'n vwar apre. Landrwa kot lateras in grennen kot en madanm Beoliere i ankor parey.

Zot dir li pa touse, sa bann letan ti letan lapli, mon konpran. Me ler letan in sek, prezan zot dir li, rod fason fer li menm. En madanm pansyoner. Be *come on!* Annou annan en pe konpasyon silvouple.

(APPLAUSE)

HON EGBERT AGLAE

Lot *issues* ankor se lanons R25mil led pour bann ki'n ganny afekte. Mon'n koz ek *PS*, mon'n koz ek Minis ziska ozordi i annan pa ankor resevwar.

E sa ki'n ganny - e i annan ki'n ganny zis en bout e zot dir li al fer rapel. Be zot. Seryezman, kantmenm *LDS* in tret nou voler, koronpi.

Me nou ti en Gouvernman ki ti annan en leker. Sirtou letan maler kot nou ti ed nou dimoun san kondisyon.

(APPLAUSE)

HON EGBERT AGLAE

Akoz nou lo kote *US*, nou konnen ki en sitwayen, fanmir ki viv ere e ki pe viv dan digenite. I kree en Nasyon ki pli zwaye.

La prezan mon oule koz lo size *CCCL*. Prezidan dan son Ladres *SONA* pa'n abord sa size parey ti ganny merit aborde. Kestyon se kan eski nou pou ganny en raport ki ava ganny soumet avek Lasanble Nasyonal ki'n arive kot *CCCL*? Sa nou pe espere. Mon anvi konnen lekel ki responsab?

Ki pou arive an term konpansasyon pou bann ki'n perdi tou e ki ti napa en lasirans? Akoz sa kondisyon ki si ou aksepte led ou pa kapab pourswiv Gouvernman? E mwan mon demann mon lekor ki kalite kondisyon sa?

Ou konnen Mr Speaker, sa sityasyon *CCCL* ti kapab ganny pli byen zere. I zis mank en leksperyans e konpetans sa Gouvernman ki'n fer *matter worse*. Sa pei in pas dan plizyer kalamite, 2006 *Tsunami*, 2013 *Felleng*, 2019 *COVID*. Nou Gouvernman ti reisi *manage* tou sa sityasyon, san ki pep i bezwen vin avek en o nivo fristrasyon.

(APPLAUSE)

HON EGBERT AGLAE

Me ozordi plis ki 2 mwan apre, i annan fanmir pa ankor ganny en sou lasistans. I annan biznes ki pa ankor re-debout. Eski zot pran kont tou sa konsekans sa?

Fanmir i ankor tromatize, biznes ki napa reveni. Ki vedir ou pa kapab pey en saler, ou pa kapab pey en *loan*, ou pa kapab pey en *rental*.

Plizyer in napa swa se remet en lot fardo finansyel lo li. Akoz i anvi son biznes, ouswa lakaz i retourn *back to normalcy*. Me sa Gouvernman in *fail* sa bann viktim Cascade. E in *fail* lakominote biznes Providence.

(APPLAUSE)

HON EGBERT AGLAE

Me mwan mon santi, zot ti kapab fer pli byen si zot ti annan en leker.

Mr Speaker, en lot size mon le aborde dan SONA se proze kapital. Plizyer proze in anonse enkli proze lotel. Ziska Prezidan li menm li in vin parey en *project manager*. Napa problem, pei i bezwen annan devlopman akoz se sa ki nou'n fer dan sa 43 an.

Si ozordi zot pe koz lo *Library* Nasyonal, se akoz nou'n konstri en *Library* Nasyonal pandan sa 43an. Si zot ozordi zot pe koz *track* lo Stad Linite. Se akoz nou'n konstri en Stad Linite dan sa 43an.

E si zot pe koz lo por Baie Sainte Anne. Se nou ki ti annan en plan pour konstrir sa por.

(APPLAUSE)

HON EGBERT AGLAE

Mr Speaker plizyer proze ki zot in fer *maintenance* lo la. Se nou ki'n konstri pandan sa 43an.

(APPLAUSE)

HON EGBERT AGLAE

Aret fer nou krwar zot ki'n fer. Sa bann proze lakaz ki zot pe koup riban. Lekel ki'n fer sa?

(APPLAUSE)

HON EGBERT AGLAE

Mr Speaker bokou koze i lo proze *West Coast Project*, fantastik! Me vin fran ek sa pep dir pep Seselwa. Se ki akoz Arab i annan son bann gro, gro lotel senk zetwal dan sa landrwa e zot anvi en meyer semen pou zot kliyan. E ki pa pep Seselwa ki an premye lo sa proze.

(APPLAUSE)

HON EGBERT AGLAE

Prezan ler ou get lenplimantasyon sa bann proze li menm. Proze pe ganny tay avek pour laglwar serten *millage* politik. E fer lapenn ler ou tann en Minis, mont lo *TV* e dir plis ki 50an semen pa'n ganny elarzi.

Be Minis ou pa koz lo ou proze drenaz Pointe Larue kot delo fek monte. Ki mannyer ou ti dir problem delo in rezourd.

(APPLAUSE)

HON EGBERT AGLAE

Eski sa 6milyon in byen ganny servi dapre ou? Kot nou'n vwar loto in bezwen pas atraver *runway*. E apre personn pa konnen lekel ki ti donn lord e met SCCA dan en dilenn sityasyon.

Konmsi sa msye Beau Vallon, "zis zot yap, yap, yap!"

(APPLAUSE)

HON EGBERT AGLAE

Kontra peyman *West Coast Project* oli? Nou ankor pe espere. E pli pir ler ou pas laba sirtou Baie Lazare, nou pa vwar okenn pti kontrakter Seselwa ki'n ganny *at least* en pti *subcontract* pou kas sa bann ros. Eski sa, se met Seselwa an premye?

Letan ti annan proze danm. *Driver pickup* ti met otaz sa Gouvernman aköz *Sinohydro* ti anmenn serten *pickup*. E la travayer – travay ti *pause* e kout Gouvernman Sesel plizyer milyon.

La ozordi aköz zot pa met en *clause* dan kontra pou donn travay nou bann pti kontrakter kas ros? Dayer zot

fer sa louvraz pli byen ki etranze.

(APPLAUSE)

HON EGBERT AGLAE

Sanmenm sa Sesel pou tou son zanfan! Mon pli krwar Sesel i pou son etranze e tou son milyonner.

(APPLAUSE)

HON EGBERT AGLAE

E mwan mon poudir ki mon santi loder gous e koripsyon lo sa *West Coast Project*.

(APPLAUSE)

HON EGBERT AGLAE

Mr Speaker, ozordi lendeks koripsyon pe ganny koze labous plen. Pour mwan si ou pa ankor sorti premye lo lalis lendeks koripsyon, vedir i ankor annan koripsyon dan ou pei.

(APPLAUSE)

HON EGBERT AGLAE

Ozordi ou pe al fer serten formalite ki swa biznes, devlopman ou akse serten servis. Si ou pa donn enn pti *incentive* ou ka pa pou marse, ouswa tarde. Eski sa pa en form koripsyon?

Ler kontra pe ganny donner e ki swiv par faver ou donasyon. Eski sa pa en form koripsyon? Letan ou tann dir

proze ou *service contract* pa'n pas atraver prosedir *procurement e tender*. Eski sa pa en form koripsyon?

Comme dir Tann May, wi mon dernyen dimoun bet isi dan Port Glaud. Me selman personn pa pou fer mwan vin pli kouyon.

(APPLAUSE)

HON EGBERT AGLAE

Mr Speaker, Prezidan in lans lapel dan SONA pour annan plis aktivite lazenes e sport. Fantastik.

Be eski Prezidan i bliye ki pou fer aktivite lazenes e sport ou bezwen resours. Sirtou lo nivo distrik.

Eski Prezidan i bliye ki ler i ti vin o pouwar 2020, i ti aboli *CSR tax*? Ki ti en sours finansyel pour soutenir plizyer aktivite e donasyon dan en fason.

Eski Prezidan i bliye, ki ler i ti *repealed* Lalwa ki govern *Board* Konsey Nasyonal Lazenes. Ki ti fer ki *SNYC* ozordi i zis en *Advisory Board* e ki pe enplimant – ki pa'n kapab enplimant okenn aktivite. E Mr Speaker i fer lapenn ozordi letan nou pe koz lo nivo aktivite lo nivo distrik.

Be kisisa tousala? Eski zot ti pe reflexir ki zot ti pe fer? Ouswa aköz pa zot nide, prezan zot deside kas tou sa ki pe marse parey zot in fer ek

APDAR. Aköz zot pa kontan sa ki Dokter Herminie, in ede pour batir e met anmars. Zot vini zot *repealed APDAR*.

MR DEPUTY SPEAKER

Ou'n ariv 30 minit Onorab. Ou ava *wrap up* aprezan. Silvouple. Mersi.

HON EGBERT AGLAE

Pour *wrap up* Mr Speaker. La ozordi ansyen *APDAR* i dan Minister Lasante. Se sa menm Minister ki sitan dan problem. Ki mannyer i pou *run* en bon program reabilitasyon?

Mr Speaker, gou ankor se Sant Reabilitasyon. Zot dir zot pe al konstri en Sant Reabilitasyon Larivyer Anglez. Eski zot konnen kwa sa en sant reabilitasyon? Eski zot konnen ki bann program e konponan enportan ki en sant reabilitasyon i bezwen? Mwan mon pa krwar pa mwan. Aköz sa ki zot pe al konstri i pour zis en *day care facilities*.

Mr Speaker, mon pa kapab konklir san ki mon koz lo size later avek lakaz. Minis ki responsab i annan plis ki 2an mon pe esper en vizit.

Prezidan in koz lo trenn lipye e efikasite. Be dir mwan ki mannyer i apele? Plizyer dat i ganny *set* e apre ganny kennsel. Fer zabitan espere apre Minis pa *turn up*.

Mon pe demann Minis silvouple, vini vin vizit nou dan Port Glaud. Akoz nou osi nou annan nou konsern.

Zabitan i osi oule konnen ki zistans bann proze mitigasyon delo lo semen sale - lo semen vizavi Vilaz Prezidan. Parski i fer 3an depi larzan in ganny mete dan Bidze. Nou ti a kontan i materyalize.

Pou konklir Mr Speaker. Leta nou Nasyon i ranpli ek promes vid. E ler mon antann zot pe koz 3an nou'n fer isi, 3an nou'n fer laba. E zot pe demann nou, zot pe demann ankor 5an.

Be si zis dan 3an *LDS* in arive fer Seselwa mizer. Seselwa pe mandyan, Seselwa pe zis dwa, Seselwa pe viv dan lapovrete. Biznes i dan problem. Be si nou donn zot ankor 5an, mon krwar Seselwa pou bezwen mars touni Lari Bazar.

(APPLAUSE)

HON EGBERT AGLAE

En terminan san ki sa pep Seselwa i bezwen konpran...

MR DEPUTY SPEAKER

Non-mon krwar, Onorab la. Non, ou'n al en pe tro bokou parske ou'n dir de fwa konklizyon. Ou 30 minit in arive. Nou pour *adjourn* la.

Nou rebran travay demen bomaten 9er. Mersi.

(ADJOURNMENT)